

清史要略



清史要略
卷之六
八
八
八

清史要略 6册

共 1 册 存 1 册 排架号

03945

書
卷

圖
市
州

52.37
7594

01818

共1冊

索書號碼

已號碼

瑞安陳懷孟冲編輯



清史要略

第一編 崑興時期

第一章

清之興自滿洲始滿洲建國自古唐虞時有肅慎氏者來獻弓矢成周之初數入朝貢後漢時亦稱挹婁北魏之世析爲七部曰粟末部曰伯咄部曰安車骨部曰拂涅部曰號室部曰黑水部曰白山部總謂之勿吉而隋唐以來稱爲靺鞨則南北方方言譯轉之異也七部之中粟末黑水爲強唐睿宗時有大祚榮者爲粟末部長國勢大張羈縻黑水以下諸靺鞨部受中國封爲渤海郡王後遂改國號爲渤海至後唐明宗時爲契丹所滅渤海之衰靺鞨黑水部次第恢復其舊土曰女真氏金之始祖也清之先即爲女真之別部當遼金末造有布庫里雍順者始建國於滿洲長白山東南鄂謨輝之野姓曰愛新覺羅氏愛新滿洲語爲金覺羅謂族言出金族也居鄂多理城衆頗歸之奉爲貝勒是爲清之始祖其後數世不善撫其衆國人叛之戕其宗有范察者遁荒野以免數傳至孟特穆受明封爲建州左衛都督孟特穆生有智略慨然有恢復之志以計誘其先世讎人之後四十餘人至呼蘭哈達山下誅其半以雪祖仇釋其半以爲用遂定居赫圖阿拉即建州左衛地也後稱興京孟特穆死後追謚曰肇祖孟特穆之孫福滿後追謚曰

興祖福滿之第四子覺昌安後追謚曰景祖覺昌安之第四子塔克世後追謚曰顯祖覺昌安與塔克世皆雄才有大略是時有尼堪外蘭者故覺昌安部人也居圖倫城陰結明寧遠伯李成梁合軍攻古埒城城主阿太章京之妻爲覺昌安長子禮敦巴圖魯之女覺昌安聞警恐女孫被陷偕塔克世往救之尼堪外蘭給城中人使殺其主出降并害覺昌安父子塔克世長子努爾哈赤有武略善騎射國人稱曰聰睿貝勒聞父祖遇害大慟怒詰明邊吏明許歸覺昌安父子喪封努爾哈赤爲龍虎將軍襲職建州左衛都督而迄不允執送尼堪外蘭或曰覺昌安父子實爲明李成梁所殺嫁其禍於尼堪外蘭故不允執送尼堪外蘭努爾哈赤日夜飲憾以復讐爲念至明萬曆十一年大發兵攻圖倫城卒殺尼堪外蘭以歸明白是約歲輸銀八百兩蟒緞十五匹并許開撫順清河寬甸鑿陽四關通互市十五年復征哲陳部克之十六年又克完顏部於是滿洲環境五部皆服十七年又收鴨綠江部疆域日廓二十一年又連滅輝發珠舍哩訥殷取烏拉併哈達諸部國勢益盛明萬曆四十四年努爾哈赤稱帝於滿洲建元天命時滿洲諸鄰部多漸併滅惟葉赫恃明援不下明亦倚爲北關努爾哈赤大怒定計先挫明兵次攻葉赫乃書七大憾以誓天其略曰明邊吏輕用尼堪外蘭之謀無故啟釁害我祖父憾一明不守盟約逞兵越界以助葉赫憾二明邊民每歲踰境行竊依約當殺而明以擅殺爲詞脅取十人抵罪邊境憾三明越境以兵衛葉

赫致我已聘之女改適蒙古憾四我國人民於柴河三岔撫安等路皆約耕田藝穀明不容刈穫遣兵驅逐憾五葉赫渝盟召釁而明乃偏信其言遣使詬詈肆行陵侮憾六哈達助葉赫二次來侵既被征服又脅服其國憾七遂大舉伐明毀撫順城明遊擊李永芳出降明分中路二軍南北路各一軍合兵二十四萬來攻努爾哈赤與戰於薩許爾城明中路二軍先敗努爾哈赤乘勝連破明南路北路軍而進破葉赫時天命四年爲明萬曆四十七年也於是遼河以東七十餘城俱下遂遷都瀋陽是時清威力所及南至朝鮮東北盡瀕海諸境內修文治外興武功制文字定八旗之制每有征戰與諸貝勒適野而謀畫地而議上馬而傳令以五大臣議政十大臣理事無留獄無壅情令簡而速事無不舉於是白山黑水之鄉王業日盛比於豐鎬京焉後至天命十一年爲明天啟六年努爾哈赤又大舉伐明入寧遠爲袁崇煥等所敗傷崩於瀋陽鑿雞堡行次年六十八後追謚曰武皇帝尋改謚曰高皇帝廟號太祖第八子皇太極立改元天聰是時明以魏忠賢用事誅戮賢士無遺類先後經略大臣熊廷弼孫承宗袁崇煥等皆善知兵而皆以黨人得罪死良將既盡羣盜並起明之內亂如此不待清之入識者早知明之必亡矣皇太極承努爾哈赤之遺業而益修武備屢舉兵伐明天聰六年明參將孔有德耿仲明以舟師來降明年廣鹿島副將尙可喜亦降有德仲明可喜皆明總兵毛文龍養孫時毛文龍爲袁崇煥所殺故皆叛降有德仲明

爲滿洲天祐兵可臺灣爲天助兵八年貝勒多爾袞太祖第十四子也征察哈爾獲傳國璽文曰制誥之寶蓋元順帝逃沙漠時所遺也諸貝勒大喜以爲天賜乃號瀋陽爲盛京用大學士希福范文程等議更定部院官制十年改元崇德國號大清是時蒙古朝鮮皆內附益大舉兵伐明崇德二年多爾袞與明督師盧象昇戰於保定盧象昇死之六年敗明薊遼總督洪承疇兵十三萬於松山承疇被擒降時北京傳承疇陣歿明帝大慟賜御祭尋聞生降大憤明國大震而又有李自成張獻忠等流寇之亂明由是益不能從事關東矣明皇太極崩年五十八謚曰文皇帝廟號太宗第九子福臨立改明年爲順治元年時明崇禎十六年也福臨卽位年方六齡幼主在上國有大喪無餘力以謀人國使明之君臣稍能善撫其民致力於內亂明之天下尙可以久存也而明當是時征稅繁重民不堪命而朝廷復厲行殺戮以威羣下搢紳之獄背項相望甚於萬曆民怨於下而君不知天變於上而人不問天下大亂於是李自成以崇禎十七年三月犯闕廷議復盡撤關外城守而召寧遠總兵吳三桂統邊兵入衛三桂行至豐潤而京師已陷天子自經李自成僭卽帝位國號大順改元永昌三桂猶豫不敢進自成脅其父襄使招之降三桂已許之俄聞自成部將劉宗敏奪其愛妾陳圓圓三桂大怒決計棄父降清遣使奉書於清睿親王大將軍多爾袞乞師討自成清召大學士范文程等決策進取文程曰自闖賊猖狂中原塗炭近且傾覆京師戕戮

君后此必討之賊也雖擁衆百萬橫行無忌然揆其敗道有三逼墮其主天怒矣刑僇搢紳士憤矣掠民貲產淫人妻女火人廬舍民憾矣備此三敗行之以驕可一戰破也我國家上下同心兵甲選練誠聲罪以討之兵以義勸何功不成遂大發兵從三桂攻自成薄山海關傳檄遠近所向効順群寇潰散自成敗走多爾袞入京師以禮改葬明崇禎帝后謚崇禎帝曰懷宗端皇帝令臣民服喪三日迎順治帝於奉天遷都北京而明遂亡時爲順治元年五月也是時明之銳師尙布滿天下而江南數萬里之地河山如故生聚未衰勤王百萬數日可集取自成如反手而三桂乃拱手以畀之清朱氏三百年之祚墮於一旦三桂之罪上通於天矣嗚呼國之興亡皆天也不然清太祖努爾哈赤之起不過遺甲十三領兵百人遂得滅尼堪外蘭克完顏破明軍扼奉天以爲根據地太宗皇太極更征服朝鮮經略蒙古至是遂統一華夏何興之暴也李自成旣敗走由山西入陝西清命英親王阿濟格率吳三桂尙可喜等豫親王多鐸率孔有德等分兩路進攻自成前後受敵出走湖廣阿濟格與吳三桂等又連追之自成連敗走延寧蒲圻至通城餘二十餘騎掠食九宮山中爲村民所困自縊死或言自成陷泥淖中村民聚集鋤碎其首至糜爛不可辨云時順治二年九月也自成旣伏誅張獻忠尙據四川以成都爲根據地初李自成陷京師僭帝號獻忠亦僭號於成都國號大西改元大順名成都曰西京遺諸將分屠諸郡邑慘無人道全蜀數

清史要略

千里無人迹至是李自成走死清命肅親王豪格帥師進征張獻忠於四川獻忠部將劉進忠以保寧降爲清嚮導清師連追至西充鹽亭間之鳳凰坡與獻忠遇發矢射殺之磔其屍其妻陳氏又招集餘衆走貴州入遵義駐桃花洞爲其黨所焚死明之流寇悉爲清所平時順治三年十二月也

第二章

清既定鼎燕京入主中原而明北京亡明太子慈烺又棄市而黃河以南猶擁立諸藩奉明正朔當明崇禎帝殉國耗至南京時明神宗孫福王由崧穆宗孫潞王常淥皆避難至江淮明諸臣議所立潞王賢而疏福王昏而親兵部侍郎呂大器等主立賢鳳陽總督馬士英等主立親互相爭取決於兵部尙書史可法可法心善立賢議以馬士英方握兵柄不得已定議迎立福王始稱監國尋卽帝位改元弘光謚崇禎帝曰烈皇帝廟號思宗命兵部侍郎左懋第往清請祭告諸陵及崇禎帝不許乃陳太牢寺廳哭奠三日盡哀清招之降不屈死南京旣建國馬士英以擁戴功入閣爲相出史可法督師江淮南京士民譁曰何乃奪我史公太學生陳方策上疏有秦檜在內李綱在外等語朝野以爲名言時江南之地數萬里皆尙爲明有畫江自主未嘗不可爲晉中宗宋高宗而督師史可法又慷慨誓必死清攝政王多爾袞移書可法取銷帝號可法報書歷引史事以折之忠肝義膽照映日月可法爲人廉信與下均勞苦其督師也行

不張蓋食不兼味寢不解衣日夜涕泣以復仇雪恥爲己任又得高傑黃得功左良玉等相與輔助之皆健將也而乃爲相臣馬士英所制不得志士英故仇東林黨人執政之初卽首翻黨議起用閹黨阮大鋮相與搏擊正人以洩其宿忿於是賄賂公行粦政交作一時善類如張慎言呂大器姜曰廣劉宗周等皆先後引去加以福王荒淫日事聲色小朝廷復因以大亂故雖以史可法之忠盡激發力圖恢復而迄不能爲明社效一朝夕之力清兵南下萬衆土崩雖曰天命豈非人事哉清豫親王多鐸師入揚州高傑左良玉皆已陣亡史可法力戰死遠近聞之莫不痛惜至比之宋之文天祥云一時吏民死節者無算多鐸軍留屠十日而南福王走蕪湖士英大鋮出走杭州清師與明叛將劉良佐追福王至蕪湖黃得功中流矢歿總兵田雄執福王以降明南京又亡時順治二年五月也是時潞王常淥在杭州亦降是年六月明兵部尙書張國維朱大典刑部員外郎錢肅樂舉人張煌言諸生王翊等又擁立明太祖十世孫魯王以海稱監國於紹興定海總兵王之仁石浦遊擊張名振等以海軍應劃錢塘江東岸以自守魯王令譽宿著浙東義士輸誠者不少黃宗羲兄弟與朱永佑吳鍾巒等皆從之閏六月明禮部尙書黃道周福建巡撫都御史張肯堂等又擁立明太祖九世孫唐王聿鍵卽帝位於福州改元隆武尊弘光帝曰聖安皇帝唐王在明季諸藩中最好學有氣節當崇禎帝時憤明將亡願蠲金築城率勤王師爲天下倡義是其心

清史要略

昭天地盟鬼神矣崇禎帝降詔切責廢唐王爲庶人而錮之嗚呼崇禎帝亦可謂謀之不臧者矣崇禎帝鑒於成祖宸濠之變而抑唐王殆甚不亦惑乎至是唐王立爲帝歸附者頗衆何騰蛟總督湖廣楊廷麟守贛各擁衆數十萬亦皆翼戴唐王受爵命且各疏請王鎮其地是時唐藩領土自福建兩廣雲貴以外兼有湖南及江西湖北之一部乃頒詔浙東欲與魯王通好時馬士英阮大鋮自杭州至紹興魯王部將方國安聽其鼓嗾縱兵劫閩使盡奪其糧餉且檄數唐王罪於是閩浙衝突而脣齒之勢離矣明年福王潞王同遇害於北京是時江浙之間民兵四起嘉定則侯峒曾黃淳耀等江陰則閻應元陳明遇等松江則陳子龍夏允彝等吳江則吳易孫兆奎等績溪則金聲江天一等常熟則嚴栻項志寧等徽州則溫璜吳應箕等太湖則陸世鑰任源邃等太倉則王湛蔡仲昭等崑山則王佐才顧炎武等崇明則田仰荆本徹等寧國則邱祖德錢龍文等餘姚則孫嘉績熊汝霖等會稽則鄭遵謙于穎等嘉興則屠象美錢秉起等泰和則劉士楨劉稊升父子新城則李翹徐伯昌等而又有朱盛瀝盧象觀等奉瑞昌王於宜興金有鑑王期昇等奉通成王於長興夏禹亨艾南英等奉益王於建昌其餘尙不知凡幾各集衆自保効死弗去或通表唐王受其封拜或近受監國魯王節制魯唐二藩亦藉以阻清軍之南下然大率起於倉猝未經訓練餉械又皆苦於不足率旬月卽敗諸主謀者亦皆先後死惜哉然而不恤屠戮之慘矢萬死不顧

一生之計爲故主謀恢復其立意較然不欺其志事雖不成其義實有足多者唐王之立也鄭芝龍兄弟與有力焉福州建國芝龍兄弟最擅權使王不能大有所爲芝龍又陰通款於清王知不足恃欲棄閩由贛而入湘次延平清貝勒博洛師入自衢州南下至仙霞關二百里間空無一人亦芝龍受清意撤之也王急走汀州載書十餘簏以自隨清兵追及之王被執至福州不食而殂黃道周先是被執不屈死芝龍降清時順治二年八月也是時魯王紹興已失守部將方國安謀執王以獻清魯王遁入海督師張國維等死之江浙閩贛諸省遂悉歸清而湖廣之間尙有崎嶇危難之中收拾灰燼之餘折而不撓窮而益奮者湖則何騰蛟廣則瞿式耜唐王敗式耜與兩廣總督丁魁楚共迎立明神宗之孫桂王由榔於肇慶由榔崇禎中封永明王故或亦稱曰永明王桂王其父常瀛封國也由榔在肇慶亦初稱監國上尊繼號改元永曆尊隆武帝曰思文皇帝尙未知凶訃也桂王卽帝位何騰蛟聞之亦上表勸進時唐王聿鍵弟聿鐸率遺臣自福建至廣州明大學士蘇觀生等又擁立之改元紹武與肇慶對峙日治兵相攻殺不暇外禦清遂得以乘機南下未一月而清師入廣州唐王聿鐸與大學士蘇觀生等皆自殺周益達等二十四王皆遇害而廣東又歸清時是年十二月也嗚呼魯唐桂唐皆以明裔受遺臣之擁戴謀恢復宜相與同心協力共圖進取而其臣各懷挾私心自分畛域彼此猜嫌乃成水火以敗逃窮蹙之餘蠻觸紛爭偷安

清史要略

旦夕不旋踵而滅亡不亦宜乎廣東敗肇慶大震桂王奔梧州輾轉至桂林時何騰蛟已敗死於湘潭清命定南王孔有德靖南王耿仲明平南王尚可喜軍合攻桂林瞿式耜力戰死之時順治七年十一月也桂王復出奔輶轉至雲南依孫可望可望者明流寇張獻忠遺黨也獻忠伏誅可望率衆入雲南至是桂王來奔可望受之邀求爵命尋又稱兵挾制反戈相向而納款於清引清師下雲南桂王在雲南上聖安皇帝謚曰安宗簡皇帝思文皇帝謚曰紹宗襄皇帝大赦清師至桂王出走緬甸清以緬甸僻遠欲置之弗復追尋從平西王吳三桂請乃命吳三桂爲大將軍帥師征緬甸緬人懼盡殺明從官宗室執桂王以降清海內悉爲清有而明盡亡時順治十八年十二月也初明北都之亡也亡於吳三桂之乞援於清今桂王之敗又敗於吳三桂之帥清師征緬甸明之亡皆三桂爲之也讀史者於此其孰不齒擊心傷於吳三桂之不臣哉明年爲康熙元年四月吳三桂復綏殺桂王於雲南並殺其太子是時魯王臣張名振張煌言等尙奉魯王赴廈門依鄭成功尋魯王又從鄭成功渡臺灣初魯王之入海也建行朝於舟山島與王翊據四明山寨互相連絡清兵先攻破四明山寨王翊死焉後入舟山島張名振等奉王出走海外行朝之內被難而死者不計其數其悲壯與宋之崖山相等在順治八年秋至是張名振病死於廈門未幾魯王亦病死於臺灣張煌言退居落迦山被執不屈見殺明宗室走海外者亦亡而鄭成功亦於是年死

臺灣鄭成功者鄭芝龍子也母日本田川氏女產日本初名森福王時從父回國入南都太學受業於錢謙益謙益字之曰大木唐王時父引之入見王與之語大奇之撫其背曰憾朕無女妻卿賜國姓改名成功俾統衛兵優以駙馬禮自是中外人多稱之爲國姓爺俄封忠孝伯掛招討大將軍印及唐王亡芝龍降清成功大憤慨然去儒冠儒服赴孔廟哭焚之航巨艦走海上稱罪臣國姓成功招義士起義師仍稱隆武年號出沒於閩海間時成功母遇害於安平成功聞之慟大舉師陷安平海澄同安等縣橫行海上與魯王臣張名振張煌言等舟山之師相犄角明桂王卽位成功改奉永曆年號初受威遠侯封尋封廣平公尋晉封延平王拜招討大將軍據廈門金門兩島軍威大盛移檄沿海崇明太平寧國徽池無爲和州瓜州鎮江平陽瑞安等州縣皆望風納款入南京謁孝陵東南大震清屢遣使與之和許以海澄公成功不受旋成功部將黃梧施琅等皆出降甘輝潘庚等皆戰死明桂王又亡成功留子經守廈門而自率師入臺灣據之臺灣東南海中一荒島地也初崇禎間成功父芝龍徙饑民數萬至其地而開墾之芝龍去爲荷蘭人所據築城闢土全島悉歸其掌握成功至逐荷蘭人改臺灣島爲安平鎮築館舍以居明宗室遺臣之渡海者魯王君臣寓焉外置兵於廈門金門兩島以爲門戶又遙結斐律賓羣島及西班牙諸國以爲外援清聞之知成功終不可致乃誅其父芝龍及鄭氏子弟之在京者時順治十八年也越明年

爲康熙元年成功與魯王同病卒於臺灣成功自隆武二年起兵誓死爲明復讐經營海外十餘載而卒不能達其志於萬一及退據臺灣庶亦海外之扶餘也不一年而又竟歿年僅三十有九嗚呼天之所廢人莫能興不信然歟成功卒傳其子經孫克塽皆仍稱明永曆年號越二十一年至康熙二十二年七月而臺灣始平明崩始盡亡

第三章

順治帝初卽位睿親王多爾袞與鄭親王濟爾哈朗同輔政二王皆帝叔父也旣入關多爾袞功多加封爲皇叔父攝政王尋又晉爲皇父攝政王獨攝政當國攝政王恐民不忘明乃施收拾人心之術約舉之有數端一爲明崇禎帝后發喪成禮自孝陵以下十四陵皆設官典守一明官吏降附者各予升級仍令視事朱姓諸王亦仍其封爵一明之職官紳士曾殉國難者皆給予謚號及優卹諸典一被斥官吏非犯贓者及士爲清望所歸並隱居山林而才德可稱者皆徵辟錄用一蹂躡之後有鰥寡孤獨及乞丐街市者皆給糧養之一正額之外一切加派如遼餉練餉勦餉諸名目盡行蠲免而明季廠衛諸弊政亦一律革除之一官制衣服暫用明制一時明之遺民亦頗受其牢籠至順治二年六月民心頗定乃漸用威力以壓服漢民首厲下薙髮之令攝政王初入關已令漢民一律薙髮旋以抵抗者衆且福王方稱帝於南

都乃下令曰朕前因分別順降之民故以薙髮分順逆今聞甚拂民願是反朕以文教定民之初心自茲以後天下臣民薙髮與否悉聽其便至是乃嚴行之復下令曰向來薙髮之制未即畫一而姑聽其自便者因欲待天下大定而始行之也今中外一家君猶父民猶子天下一體豈可違異若不畫一終屬異心不幾爲異國之人乎自今布告之後京城內外限旬日直隸各省地方自部文所到之日亦限旬日需使薙髮遵依者爲我國之民遲疑者同逆命之寇必置重典若巧辭爭辨者不輕貸着地方文武各官嚴行察驗如再有爲此事瀆進章奏致使已定地方之人民仍存明舊不隨本朝之制度者殺毋赦是時檄下各縣並有留頭不留髮不留頭之諭令薙匠負擔遊行於市見蓄髮者執而薙之如有抵抗者輒殺而懸其頭於擔之竿以示衆令至江南士民大憤羣起而反抗之無力者或憤而死或逃隱山林或建髮塚而痛哭致祭者有力者則聚衆興師流血百萬前者既仆後者復繼如江陰之死守嘉定之受屠亦大率因是而起吁慘矣時有孔子之裔孔文譙者爲其家之宗子衍聖公孔文植執行孔廟典禮以新制不便奏請蓄髮用先王之衣冠嚴旨譴責姑念聖裔免死著革職永不叙用於是漢民除僧道婦女外盡爲辯髮胡服矣是年九月又籍明公侯伯駙馬皇親田地給旗人耕種明年五月又嚴隱匿滿洲逃人之禁犯者多死滿漢之民至是又顯分軒輊矣攝政王當國七年大小政務悉歸攝政王一人之掌握至順治

七年十二月出獵於邊外之喀喇城死焉年三十九祔土太廟追尊爲義皇帝廟號成宗明年爲順治八年帝始親政年方十四近侍蘇克薩哈等告攝政王生前曾私製帝服匿藏御用珠寶指爲潛圖不軌鄭親王濟爾哈朗惡攝政王初奪其權乃合詞證之其獄遂成帝大怒撤去其廟諡其母妻之封典悉行追奪籍沒家產停其嗣子多爾博襲爵同母弟豫親王多鐸已死追降爲郡王大學士剛林祁充格等俱以其黨置重罪餘黨亦悉治罪有差嗚呼當太宗初崩帝方冲齡內憂外患一時並集使無攝政王當國則太祖太宗所手創之王業將烟消而雲滅矣攝政王之功不亦偉哉奈何身死未幾乃以疑似之獄而遽奪其謚封盡誅其黨與帝得母寡恩歟使攝政王果欲圖謀不軌何不謀之於太宗初崩帝位未定之日而乃潛圖於帝位既成名分久定之時其爲誣陷也無疑矣矧攝政王爲太祖所最寵愛子太祖崩遺命太宗傳位於九王卽攝政王也太宗崩諸王亦多欲立攝政王者以成太祖之志也攝政王獨主立順治帝攝政王之無逆心可知矣後至乾隆卽位奉特旨昭雪還其襲爵從祀太廟攝政王之功固自弗可沒也已雖然攝政王自當國以來生殺任情高下在手上下內外咸祇知有攝政王而不知有皇帝而又以疑忌逼死帝兄肅親王豪格而奪其妃摺降同輔政之鄭親王濟爾哈朗而爲多羅郡王且幾陷於大辟灸手可熱宅心不純宜其死不旋踵而禍暴發也或曰攝政王之禍伏於帝幼冲時攝政王逼帝太后博

爾濟吉特氏下嫁及帝年長深以爲辱而不能明言其罪又畏攝政王之勢恐激成巨變隱忍而不敢發及至身死借他罪以誅之帝之心亦良苦矣或曰此出於當時南人之傳說恐未足爲據也我聞攝政王當國其所設施范文程而外多出於洪承疇金之俊之徒洪承疇金之俊皆明臣而降清屈事二姓臣節不終爲世所詬厲深矣然當滿漢一家之日洪承疇造請密室建以漢人養旗人不令旗人營生計之策從此滿漢分居漢人得安其農工商賈之業二百七十年來免受其擾累雖出租稅以養之而猶有利焉金之俊初降攝政王先使人謂攝政王曰我有十事當與爾要爾能悉從則我降否則有死而已攝政王召問之之俊曰茲事於滿洲則無損於漢人則甚願爾如許之將以不從者而餌其從某度江南不難下矣攝政王問其詳之俊乃提十不從之綱曰男從女不從生從死不從陽從陰不從官從隸不從老從少不從儒從而釋道不從娼從而優伶不從仕宦從而婚姻不從國號從而官號不從役稅從而語言文字不從攝政王皆允之於是之俊降旋得參機密聞當時定制如王公不得私離京城內奄出宮者斬之類皆之俊輩爲之謀也嗚呼二子亦皆有功於漢族者殆亦自悔其非而以是補過歟帝旣親政銳意圖治經營建置不遺餘力官制如設宗人府定京察考選軍政設日講官置內閣學士翰林院滿漢掌院學士侍讀侍講學士並侍讀侍講等官典禮如御經筵詔直省學臣求遺書予明末殉難諸臣謚詔禮部議定

宮闈女官名數品級賦稅如改折各直省本色錢糧歸於一條鞭撤各省守催錢糧滿官詔各直省立限報災刑獄如命刑部通察刑獄無干牽連者省釋之諭內外法司清理庶獄詔貪吏得贓十兩以上者除依律定罪外籍其家一時規制燦然足觀焉惟宦官之制太祖太宗以來痛懲往失不設奄人帝以宮中使令乏人偶用此輩乃立十三衛門置鐵牌以制之奄人不過四品不得干預政事而閹茸之徒積習過深其弊終不盡至將崩乃遺詔罷十三衛門仍隸內務府是時朝多良臣若魏裔介魏象樞楊雍建輩皆侃侃直言敢諫臣也帝在位十八年年二十四順治十八年正月崩謚曰章皇帝廟號世祖第三子玄曠即帝位改明年爲康熙元年或曰世祖爲僧於五臺山非崩於帝位也先是順治十七年八月貴妃董鄂氏薨世祖哀悼過甚既追封爲皇后又加贈以謚號數月以來均鬱鬱不自樂迺遜位出宮披緇雲遊至五臺山清涼寺遂卓錫焉家人百方勸之不肯回不得已諱言病崩以大喪告天下後康熙帝五奉太皇太后皇太后幸五臺山虔禮諸寺卽謁世祖也及至世祖殂乃止不再幸其說不知然否

第四章

康熙帝卽位年甫八齡索尼蘇克薩哈遏必隆鰲拜四人爲輔政大臣初時尙多善政除奉遺詔罷十三衛門外如蠲逋賦禁非刑豁免山東臨街房屋稅及各省田賦增加餉練等中外頗稱頌之至如江蘇哭

廟之獄緣吳縣知縣任維初濫用非刑貪賄浮征道路側目諸生金人瑞倪用賓等十八人率衆千餘於世祖哀詔到蘇巡撫等官舉行哭臨大典之日聚哭於文廟並至府堂進揭帖巡撫朱國治廵庇知縣指人瑞等爲震驚先帝之靈大逆不道朝廷命侍郎葉尼等往勘不分首從一律凌遲處死輒大爲士民所竊怨四大臣之中以鰲拜爲最專橫貌帝幼冲獨攬朝政遏必隆附之索尼不能制獨蘇克薩哈與之爭鰲拜銜而殺之鰲拜輔政久驕恣益甚帝深惡之帝旣親政鰲拜仍復結黨擅權帝乃與侍郎索額圖謀因其入見令武士執之羣臣皆請置重典帝以其顧命大臣且於先帝之朝屢立戰功從寬革職籍沒其家產子弟黨與皆得罪時康熙八年五月帝親政已二年矣鰲拜旣伏辜帝銳意圖平治是時明宗室諸王偏安割據者皆已蕩滅無遺類其遺臣之子孫奉明正朔於海外者亦獨臺灣鄭氏而已海內郡縣悉已統一雖有陝西民楊起隆福建民蔡寅及江南金和尙先後皆詐稱明朱三太子雲南民王枝葉詐稱明桂王孫河南民袁進詐稱明周王孫先後謀起兵卒皆烏合小醜擾掠鄉村不旬日卽滅所慮者惟勝國降將猶分鎮封土握兵馬財賦之大權隱如敵國焉先是太宗建國錄明降將功封孔有德爲恭順王耿仲明爲懷順王尙可喜爲智順王世祖入關又以明降將吳三桂功最大封爲平西王并改封孔有德爲定南王耿仲明爲靖南王尙可喜爲平南王尋以東南騷亂命定南王孔有德徇廣西平南王尙可喜

靖南王耿仲明徇廣東平西王吳三桂徇四川及雲貴耿仲明以順治六年道死於江西孔有德亦以九年李定國之亂自裁於桂林有德無子爵除而仲明子繼茂襲封及南方既定吳三桂晉封平西親王王雲南尙可喜耿繼茂王廣東尋移繼茂王福建繼茂卒子精忠嗣所謂三藩是也三藩之中三桂功最高兵最强方其入滇之始軍書旁午朝廷假以便宜雲貴督撫咸受節制用人不受吏兵二部之掣肘用財不受戶部之稽核其所除授號曰西選西選之官徧天下據五華山明桂王舊宮爲藩府莊田七百餘頃廣市西番蒙古名馬通使達賴喇嘛重歛土司金幣開礦榷鹽厚自封殖諸將子弟敎以戰術水陸衝要徧置私人子應熊尙公主居京師朝政巨細無所不悉以是根蒂益固異志益堅而尙可喜老病以兵事屬其子之信之信以酬虐橫於粵精忠以暴斂肆於閩皆挾邊防爲名歲耗巨帑統計三藩連餉年需二千餘萬兩會有查如龍者明福王遺臣也上血書於吳三桂勸其舉兵恢復中原書未達事敗被逮帝遂大疑三桂等以藩鎮强大難保巨患日夜陰爲之備而諸藩亦內不自安康熙十二年三月尙可喜首疏請撤藩歸老遼東三桂精忠聞之亦於是年七月疏請安插以相嘗試三桂客有劉玄初者奇士也力勸三桂永鎮雲南弗效閩粵二王之所爲三桂不聽疏上帝從尙書米思翰明珠莫洛等議果下徙藩之令三桂自以功多朝廷必優詔慰留之及詔下大失望遂於十一月殺巡撫朱國治等舉兵反自稱天下都

招討兵馬大元帥以明年爲周王元年蓄髮易衣冠貴州巡撫曹申吉提督李本深雲南提督張國柱皆起應之變報達京師舉朝震駭大學士索額圖請誅議撤藩者以謝之帝不許惟詔止閩粵二藩勿徙公布三桂罪狀削其官爵下其子應熊及家屬於獄命順承郡王勒爾錦及都統赫業等征之旨十二年十二月及十三年正月事也三桂旣據有雲南貴州遣兵進犯四川湖南四川巡撫羅森襄陽總兵楊來嘉各叛應耿精忠聞之亦以三月反陷全閩自稱總統天下兵馬大將軍裕民元年孔有德之婿廣西將軍孫延齡亦舉兵附三桂自稱安遠大將軍數月之間六省盡失中原動搖當官者無守志而三桂以子孫並質京師冀免其誅又年老持重不欲輕去雲貴根據地又覬覦朝廷裂土議和畫江爲國用是徘徊湖湘間兵未遽北上三桂客劉玄初又謂三桂曰此時宜直擣黃龍而痛飲胡乃阻兵不進逍遙河上坐失機宜歟三桂弗從玄初遂去帝窺知三桂之隱乃以四月賜其子應熊孫世霖並死獄中命貝勒尙善爲安遠靖寇大將軍助勒爾錦等進攻三桂三桂大懼分兵二路一由長沙出江西與精忠之軍合一由四川而進窺陝西陝西提督王輔臣舉兵寧羌以應寇氣益盛未幾甘肅亦陷是時諸藩中惟尙可喜鎮廣東尙按守臣節三桂屢致書誘之反可喜執其使者以奏朝廷深倚賴之晉封爲平南親王而精忠分遣部將馬九玉曾養性白顯忠等據浙之溫台金衢贛之廣信建昌饒州又約臺灣鄭成功之子鄭經與潮

州總兵劉進忠夾攻廣東三桂亦遣故廣西提督馬雄進兵肇慶夾攻可喜可喜東西受敵又內制於其子之信乃乞病請援而其子之信已陰受三桂招討大將軍輔德親王封拜遂改職易服嚴兵守可喜府移檄州郡並降三桂可喜以憂憤卒時廣西將軍孫延齡雖受三桂封爲臨江王與廣西提督馬雄故有隙積相忌而延齡妻孔四貞當其父有德死時入養宮中爲太后養女延齡爲和碩額駙內輔政大臣至是孔四貞又日夜以朝廷恩德勸延齡反正延齡意爲動馬雄偵知之密白三桂遺其從孫世琮引兵赴廣西入桂林擒殺延齡爲康熙十五年十二月也當陝甘之應三桂也三桂欲取道川陝入犯京師會朝廷以大學士圖海爲定遠大將軍任西征事圖海至陝西一戰而王輔臣降餘兵多遁陝甘略定三桂由是不能得志於西北維時耿精忠與鄭經有隙朝廷乘其內亂遣師連破精忠部將馬九玉白顯忠兵閩地幾得其半精忠恐懼不知所爲乃遺其子顯祚詣大軍獻總統印自請勦海寇立功贖罪部將曾養性聞之亦以溫州降朝廷復精忠爵及官屬令之從征是時尚之信以三桂誅求繁急苦之亦陰通款於江西官軍率兵迎降詔復爵時康熙十六年也三桂既連失陝西福建廣東三大援江西又爲大軍所定於是三桂之領地自雲貴外獨有四川湖南及廣西之一部而已又自軍興以來東西調發財用漸竭川湖賦稅不足以供軍需情現勢絀恐諸將解體欲示威重維人心乃以康熙十七年三月僭即帝位改元紹

武尋改利用以衡州爲定天府都焉國號大周置百官封諸將頒曆朔舉考試三桂時年七十六是時安親王岳樂簡親王喇布將軍穆占諸道官軍專力湖南東南邊境諸州縣皆次第爲官軍所得八月三桂暴病死諸將迎三桂孫世璠於雲南而立之改元洪化初十四年陝甘之變四方騷亂帝欲親征廷臣以京師根本重地車駕遠出恐有謠言姦宄竊發固請毋行及三桂僭號帝復下親征之令廷臣又以賊勢日蹙無勞遠出爲請帝未決會三桂死乃止世璠既立不敢留衡州退居貴陽恃川湖廣西爲屏蔽自三桂死部下失措莫能定戰守之策官軍勢益振明年官軍連下常德長沙衡州漢中克桂林走世琮十九年官軍又克成都湖南廣西四川三省又略定是時尚之信以其弟之孝謀襲藩位令藩下人張士選赴京告之信心懷怨望放言訕上都統王國棟故之信私人也至是亦助之孝發其罪狀之信聞之抗疏駁辨詔令之信至京對簿藩下有李天植者怒國棟讒構誘殺之事聞天植坐謀反伏誅同死者百有八人之信遂以是年八月賜死之孝并坐褫平南將軍職時耿精忠亦以藩下參領徐鴻弼等遣人赴都首精忠蓄逆謀列罪五款精忠弟昭忠亦具疏入告帝密諭康親王傑書令精忠自請入觀是月精忠入朝帝下法司勘問部議黜爵磔死帝以精忠部將馬九玉尙握兵柄命繫精忠獄待鴻弼等至京對簿是年十月官軍貝子彰泰提督趙良棟等分三道合征貴陽世璠走雲南明年二月官軍又進逼雲南世璠抵死

守不下十月克之世璠自殺雲貴亦平時精忠部將馬九玉亦解都統任回旗於是朝議三桂宜戮屍精忠及其黨與應按律議磔詔乃析三桂骸骨頒示海內梟世璠首並磔死精忠於市三藩悉平時康熙二十年也統計三藩之亂綿歷將十年蔓延殆十省人民塗炭貨財耗竭其禍皆自吳三桂始我聞吳三桂初舉兵反傳檄天下藉口爲明復仇自名爲興明討虜大將軍試問緬甸之役捕殺桂王而絕明裔者誰歟而彼猶復以興明爲辭欲以收拾天下之人心何其頗之厚而不自愧也又聞當時貝勒尙善答之曰蓋聞殿下以勝國爲口實果爾則亦人臣之所當然不能忘忠於舊君者惟果欲納忠於勝國舊君則殿下不宜受我清朝之爵土不宜倒永曆之干戈既已使舊君無噍類而自求利達臣僕於我朝疊承恩寵今復回心轉慮納忠舊君果何心哉未知三桂聞之其亦有所自解焉否耶毀宗滅族析骨骸以頒示天下也宜矣矧我又聞吳三桂之初追桂王也洪承疇曾說三桂曰吾儕今雖同隸滿洲實一時隱忍而已公追桂王務宜從寬我輩皆尙欲曠日彌久以待天下之變嗚呼洪承疇其亦有恢復明室之思耶異哉而三桂不能用迨至天下大定而始以興明爲口實即使實心爲明不亦晚乎三藩既平朝廷盡籍藩產入官充餉撤藩兵歸京師別設將軍都統旗兵駐防廣州福州荊州等處不復以兵柄土地世予臣下凡宗室自親王以下爵分九等功臣自一等公以下爵分二十六等率優以虛榮而無實權由是前代封建

之弊絕其任全國之防守者自旗營外各省有提督總兵等官統綠營兵事然皆但掌兵符不擅財賦且以文臣督率牽掣其間由是前代藩鎮之弊亦絕而清統一之業乃大告成

清史要略

第一編終



清史要略

第二編 隆盛時期

第一章

瑞安陳懷孟沖編輯

三藩既定中國乂安朝廷以臺灣鄭氏尙在海外議與媾和約令保境罷兵與民休息許如箕子之在朝鮮徐福之在日本不登岸不薙髮不易衣冠而閩督姚啟聖故仇鄭氏必欲滅之執不可議乃止會鄭經死其子克塽克塽爭立臺人殺克塽而立克塽年方十二朝廷聞其內亂從內閣學士李光地及閩督姚啟聖請乃命鄭氏降將水師提督施琅率兵艦往攻臺灣破之克塽出降封爲海澄公而臺灣亦平時距三藩之滅二年也由是朝廷得專意經營邊境以絕外患是時中國境外大敵有二一則俄羅斯之於黑龍江沿岸一則準噶爾之於天山南路是也

初當明季時清方遣兵定索倫薩呼爾等部而俄之遠征軍亦越外興安嶺以達黑龍江之下流周覽山川部落以徐試其侵略會清有事中國不遑注意東北俄遂以順治八年築城雅克薩河口清將海色率兵逐之無功而返十一年五月俄人斯特巴諾引兵下黑龍江清都統明安達禮破其軍松花江口十五年俄人巴西古赴尼布楚部署軍事令斯特巴諾以所部可薩克兵五百人當前敵清寧古塔都統沙爾

呼達率艦隊四十七艘載火器與戰斬殺過半斯特巴諾死焉殘兵退入尼布楚者僅十七人而已是時俄人雖以侵略黑龍江之故數與中國相戰爭然未知中國國力之若何順治十二年嘗兩遣使賚方物以請互市爲名至北京覘虛實而中國亦方憫然自大不識俄羅斯之爲何物視與朝貢諸國等順治十一年清廷與俄皇書有云爾國遠處西北從未一達中華今爾誠心向化遣使貢獻方物朕實嘉之特賜禮物即令爾使人賚去以明朕柔遠之意意爾其欽承永效忠順以世恩寵俄人不解漢文無由知其所云也康熙六年什爾喀河土酋等特穆爾逃入俄境九年清遣使至俄京莫斯科令交罕特穆爾且約東邊人禁抄掠俄亦遣使與中使偕赴北京以康熙十四年欲與中國訂界約開貿易交換俘虜清廷宣言非先交罕特穆爾則他所請皆毋庸置議迄不成俄人益經營雅克薩築塞精奇里上流以相策應將席捲黑龍江東北數千里地而中國以其逼近陪京不可滋蔓思有以創之兩國之決裂遂近在旦暮間矣二十一年帝命副都統郎坦以行獵爲名渡黑龍江偵察雅克薩城形勢郎坦歸言俄兵寡不足慮帝乃定征俄之策先遣人赴寧古塔造巨舟築墨爾根齊齊哈爾二城置十驛通餉運又絕俄人之貿易至是康熙二十二年清兵擊俄將摸里尼克兵於愛珲附近俘其全軍致諸齊齊哈爾二十四年清都統彭春大率水陸兩軍北征陸軍凡萬人携巨礮二百門自齊齊哈爾陸行水軍凡五千人艦百艘自松花

江出黑龍江兩軍齊集雅克薩城下俄驍將圖爾布青以四百五十人拒守不肯屈卒以兵械窳敗衆寡懸殊勢不能支退至尼布楚是役也俄軍戰死及生擒者殆百人官兵毀其城而還獻俘京師圖爾布青之還尼布楚也俄陸軍大佐伯伊頓復率可薩克兵百人來援合軍而東至雅克薩城故址築土壘爲防守計官軍聞之乃以二十五年七月復引兵八千載大砲四百門進攻欲一舉平其壘俄軍抵死抗拒壘堅不可拔圖爾布青中砲斃伯伊頓代之守逾年不下時俄兵皆穴居病溼死者甚衆官軍以長圍困之俄軍不死於戰則死於病存者僅六十餘人城旦夕且下而兩國之和議乃得告成官軍乃以二十七年八月解圍歸愛珲及墨爾根自出師至此前後逾二年時俄皇彼得第一新立受制於其姊索布亞未有實權又以戰地絕遠不便援應亟欲與中國媾和朝廷亦以師老厭兵先以二十五年因荷蘭人之介紹彼此書問往還二十六年俄全權公使費多羅進次色楞格斯克遣人至北京告俄使已至約以是地爲兩國使臣會議所二十七年清命內大臣索額圖佟圖偉馬喇等爲公使令天主教徒張誠徐日昇從扈以精騎萬餘軍容甚盛會士謝圖與準噶爾構兵道梗不得前改以尼布楚爲會場帝復命都統郎坦發兵一萬自愛珲水陸并進爲使臣後援二十八年八月開議俄使初欲劃黑龍江爲兩國界索額圖不可謂東自雅克薩西至尼布楚巴楞格斯克凡俄領黑龍江及貝加爾湖殖民地當盡以予我以是議不

諧張誠輩調停其間往復數四改議北以格爾必齊河及外興安嶺南以額爾古納河爲界俄使復不允議中輶索額圖遂拔營向尼布楚城旦夕且宣戰俄使不肯決裂乃允以額爾古納及格爾必齊兩河爲中俄界線國界之議以成尋及逃人事會罕特穆爾已在莫斯科受希臘教洗禮更名波威爾索額圖聞之知終不可致遂不復言爰於是年九月九日兩國公使各以國文約書相交換而副之以拉丁譯文恐約書文義彼此有相違者以拉丁文爲準所謂尼布楚條約是也約凡六條大意如下一自黑龍江支流格爾必齊河沿外興安嶺以至於海凡嶺南諸川注入黑龍江者屬中國嶺北屬俄二西以額爾古納河爲界河南屬中國河北屬俄三毀雅克薩城居民及雜物聽遷往俄境四兩國獵戶人等毋許擅越國界違者送所司懲罰五兩國彼此不得容留逃人六行旅有官許文票者得貿易不禁約既就乃書以滿漢蒙古拉丁及俄羅斯五體文字勒碑格爾必齊河東及額爾古納河南爲界標中俄接壤自此始帝以俄人東略之志終不能絕爰於精奇里河口設屯田兵爲守備焉

第二章

準噶爾者漠西厄魯特蒙古部也自元之亡也蒙古分爲三大部在漠南者曰內蒙古在漠北者曰外蒙古卽喀爾喀蒙古在漠西者曰厄魯特蒙古內蒙古舊與滿洲通好和親而喀爾喀蒙古與厄魯特蒙古

尙兩相雄長於西北厄魯特蒙古卽故元之牧場分駝馬牛羊四部稱爲四衛拉特譯言四大部也元亡明興元之遺臣猛可帖木兒據有其地其後謂之瓦刺卽衛拉特之轉音也明正統時部衆甚盛其汗也先數入寇邊土木之役虜明英宗以去尋送還自景泰中也先死而瓦刺不振其地復分爲四部曰和碩特部居烏魯木齊附近曰準噶爾部居伊犁曰杜爾伯特部居額爾齊斯河附近曰土爾扈特部居塔爾巴哈台附近總謂之厄魯特蒙古當明季時西藏有宗教之爭黃教喇嘛欲藉厄魯特之力以拒紅教喇嘛於是和碩特部長固始汗與三部聯合自青海入西藏以青海爲根據地並據有西藏地之東部而遙握西藏之兵權同時準噶爾部長巴圖爾渾台吉亦自伊犁蠶食近部勢力漸張渾台吉死其子兄弟爭立少子噶爾丹方爲喇嘛在西藏歸藏逐其諸兄自立爲準噶爾部汗曾西藏第巴桑結欲絕和碩特部之干涉乃納交於噶爾丹噶爾丹相與侵和碩特部敗固始汗之子達顏汗而併有其領地於是厄魯特四部悉屬於噶爾丹尋又統一天山南路而兼有科布多青海等地厄魯特之東與漠北喀爾喀蒙古相接喀爾喀蒙古者故元韃靼大汗達延季子札賚爾之後也其地分爲三部曰土謝圖汗據土拉河流域曰札薩克部占杭愛山西麓地白車臣部占克魯倫河流域喀爾喀蒙古與厄魯特蒙古世不相能而土謝圖汗又執殺噶爾丹使者於是噶爾丹遂東擊喀爾喀蒙古土謝圖札薩克車臣三部汗皆南入降

於清噶爾丹於是復併有漠北地遂南向欲與中國爭衡矣康熙二十九年六月噶爾丹引兵二萬餘越呼倫池而南進次索岳爾濟山附近而掠烏珠穆沁部人畜清命尙書阿爾尼督蒙古兵襲擊之於烏爾會河戰不利而退噶爾丹益深入烏珠穆沁境七月帝分兩道出師命裕親王常寧爲安北大將軍簡親王雅布等副之出喜峯口而使阿爾尼率所部會福全軍又別調盛京吉林及科爾沁兵助戰車駕幸邊外以節制之常寧軍遇敵於烏珠穆沁境戰復不利噶爾丹乘勝渡西喇木倫河愈深入至烏蘭布通去京師僅七百里詔常寧福全兩軍會擊之八月朔大敗噶爾丹於烏蘭布通敵乘夜遁遣喇嘛詣軍前乞和以緩追騎而自引敗卒由克什克騰部渡西喇木倫河北去越六日官軍始悟發輕騎追之不及而返事聞詔切責諸軍坐失事機而噶爾丹中途奉書謝過誓自此不復犯邊會帝有疾引還乃詔諸王班師三十年帝以準部連年寇邊職由喀爾喀蒙古土謝圖汗啟蒙召侮當有以懲之而喀爾喀蒙古三部新附衆數十萬亦不可無以撫綏訓練之也乃議出塞大閱示以威嚴以多倫諾爾爲會場命理藩院檄調新附諸部及科爾沁等四十九旗豫屯會場百里外待命五月車駕出張家口幸多倫諾爾盛設兵衛先傳諭土謝圖汗等令具疏請罪然後設帳受其朝帝躬擐甲冑大閱嚴申約束乃宣恩德赦土謝圖汗罪仍留其汗號其所屬授王貝勒以下爵有差令

與內蒙古四十九旗同列仍聽遊牧近邊於是喀爾喀蒙古遂爲中國外藩焉噶爾丹之遁也以科布多爲根據地居伊克阿拉克湖畔使部衆從事漁業休養數年復思東出奉書索土謝圖汗益急且遣使誘內蒙諸部叛歸己科爾沁親王以聞三十四年帝密諭科爾沁等部令傳語噶爾丹僞許內應誘令深入當以一戰覆之是年九月噶爾丹果率騎三萬據克魯倫河上流自秋徂冬不去亦不犯漠南但揚言借俄羅斯鳥槍兵六萬將大舉入寇帝以此賊不滅則中外無寧歲當以全力制之議令將軍薩布素引滿洲軍會科爾沁所部出其東撫遠大將軍費揚古馳赴歸化城調陝甘兵出寧夏自翁金河出其西而車駕自將禁旅出獨石口爲中路尙期夾攻三十五年三月帝率中路軍出邊逾月而渡瀚海近逼敵境而東西兩軍以道阻不至途次復聞風說俄人將助寇大學士伊桑阿等力請回鑾帝怒不許遂進兵至克魯倫河噶爾丹望見御營大驚宵遁北大軍至河則北岸已無一帳帝初以噶爾丹必扼克魯倫河以拒戰故分兵三路以東西軍攻其腹背中軍扼其吭及至克魯倫河則噶爾丹已遁走帝曰我聞噶爾丹練習戎行所向無敵今不扼克魯倫河知其無能爲也時西安將軍博濟甘肅提督孫思克等督陝西甘肅諸軍與費揚古軍會以五月十三日抵土拉河上流東岸之昭莫多要噶爾丹於中路始陽敗以致之繼出奇兵繞陣後襲轄重以潰之噶爾丹大敗以數十騎遁其可敦阿弩死焉可敦者準噶爾部稱其汗之

妃也厄魯特降者三千人帝還京師是時伊犁已爲噶爾丹兄僧格子策妄阿拉布坦所據方噶爾丹之長準噶爾也欲殲其兄僧格遺族以絕後患策妄阿拉布坦遁至是聞噶爾丹與中國搆釁乘間歸襲伊犁通好中國則自阿爾泰山以西皆非噶爾丹所有又連年與中國戰精銳牲畜亡失略盡回部青海皆乘機叛去噶爾丹窮蹙無聊竄居搭米爾河畔欲取道翁金河至哈密謀進止又爲清軍之留屯翁金河者所敗勢益窘帝復幸歸化城欲因以降之噶爾丹卒倔強不奉命帝以噶爾丹迄無伏罪意三十六年二月帝復渡黃河幸寧夏命內大臣馬思哈及將軍薩布素會費揚古兵大舉深入噶爾丹欲西歸伊犁則根據地已失策妄阿拉布坦方將伏兵於途擒而獻之欲南投西藏則交通之路又已爲官軍所絕不得出乃以是年閏三月十三日飲藥自殺策妄阿拉布坦以其骸骨及一女來獻所部盡降土謝圖等三汗復歸舊牧朔漠悉定四月帝還京師御門受賀親撰碑銘勒石太學自秦漢以來歷朝武功或命將或親征惟以告於廟社未有告先師者在泮獻馘復古制自清康熙始

第三章

噶爾丹雖伏誅凡噶爾丹之蹂躪塞外諸部及擾攘中國邊境皆出於西藏第巴桑結之鼓嗾帝敗噶爾丹俘厄魯特部衆具知其詳帝大怒於是西藏古三危地在喜馬拉雅山之北崑崙山脉之

南爲世界第一大高原也隋唐時始通中國所謂吐蕃是也吐蕃故無文字無宗教唐貞觀中吐蕃國王有曰噶木布者尙唐宗室女文成公主篤主信佛教其後印度況泊爾國王又以女拜木薩妻噶木布亦篤信佛教噶木布受二后之感化於國中大建寺院令臣民悉歸依佛教又自印度迎僧侶入國都拉薩傳教並用印度文字由是全藏悉化爲佛教國焉其僧侶謂之喇嘛喇嘛者西藏語無上之義也自後喇嘛勢力漸大至元時有僧八思巴者受元封爲大寶法王爲元國師遂握有全藏政教兩界之大權至明時西藏喇嘛有紅教黃教之分紅教喇嘛卽元以來僧八思巴之舊教也其教不禁娶婦服飾本印度製裟舊式衣冠皆赤色教徒或恃密咒炫幻術漸失佛教本旨於是又有宗喀巴者出以宗教改革自任因別立一宗排幻術禁娶婦服黃衣冠以示別謂之黃教喇嘛其徒多通大乘尙苦修學行卓然出紅教喇嘛上其實同一經典同出一源所異者一則衣冠異色二則咒語稍別三則傳子與呼畢勒罕之不同而已呼畢勒罕者譯言轉生化身也自明成化十五年宗喀巴圓寂其大弟子有二一曰達賴喇嘛一曰班禪喇嘛嗣宗喀巴爲黃教喇嘛宗主相傳達賴爲觀音分體班禪爲金剛化身在印度已轉生數十世常在輪回本性不昧自是以後皆惟達賴班禪兩大喇嘛互相轉生而已其勢漸盛亦兼有西藏政治權與紅教喇嘛相埒紅教盛行於後藏黃教盛行於前藏至是達賴五世羅卜藏堅錯用其近親桑結爲第巴

第巴者位亞於達賴攝理一國之政事者也桑結尤惡紅教喇嘛乃以達賴五世命招致厄魯特蒙古以逐之於是和碩特部長固始汗相與襲殺護法紅教喇嘛之拉達克酋長藏巴汗奉班禪喇嘛統治其地由是黃教達賴班禪兩喇嘛分主前後兩藏而紅教悉南遁不丹及泥泊爾境全藏實權均歸於和碩特部桑結又惡和碩特部之干涉藏事陰結準噶爾部長噶爾丹征服和碩特部事具見前篇於是藏事悉決於桑結康熙二十一年達賴五世卒桑結秘不發喪一切矯命行之威震全藏屢陰嗾噶爾丹南侵中國噶爾丹敗帝知其秘詔書切責之時爲康熙三十五年桑結遣人來朝密奏輸誠謂達賴五世歿已六年矣今轉生又十五年當以今年十月宣告內外乞暫秘之帝以達賴喇嘛自崇德以來即已與清通使六十餘年未嘗有隙又累朝頗利用其力以綏服蒙古而第巴者又達賴喇嘛所任理事之人若窮治其罪慮有他變不如因其陳情而宥之會策妄阿拉布坦已奉詔出師協擒噶爾丹桑結又遣使要諸途戒弗妄動又使人諭青海諸首領各繕修其器械赴察罕陀羅海地方會盟意甚叵測帝益大怒適噶爾丹自殺而桑結失援和碩特之勢復長固始汗曾孫拉藏汗留鎮西藏國都復干涉藏事康熙四十四年桑結謀毒殺拉藏汗不成拉藏汗集衆討桑結誅之因奏廢桑結所立假達賴而立新達賴伊西堅錯爲六世帝正深惡桑結狙詐遂因而冊封拉藏汗爲翌法恭順汗使鎮藏地而詔執假達賴獻京師厥後拉

藏汗所立之伊西堅錯青海諸蒙古皆以爲僞因自奉裏塘之噶爾藏堅錯爲眞達賴迎居青海請賜冊印與藏中所奏互相是非青海喇嘛勢力亦不亞西藏相持不能下準噶爾部長策妄阿拉布坦乃乘兩部紛議之際而謀襲西藏康熙五十六年策妄阿拉布坦遣部下大策零敦多布等引兵六千自伊犁西南行繞大戈壁踰和闐南境崑崙山由騰格里突入西藏殺拉藏汗執拉藏汗所立達賴六世幽之藏中大亂朝廷聞之初疑大策零敦多布兵或聯合拉藏汗侵擾青海乃命西安將軍額倫特督軍西寧又檄侍衛阿齊圖等嚴守噶斯以備不測而拉藏汗乞援之疏至乃於五十七年正月詔額倫特及侍衛色楞等督滿漢兵自西寧出青海赴援自五月至九月清師食盡矢竭全軍盡覆十月帝又命皇十四子允禟爲撫遠大將軍駐師西寧改四川巡撫年羹堯爲總督備兵成都期以明年分道出發會廷臣俱言藏地遼遠塗險且惡不能遽至不如固守邊圉於是師久不進至五十九年春詔允禟移駐木魯烏蘇治餉以西寧軍屬都統延信出青海又以年羹堯坐鎮四川令以川軍屬護軍統領噶弼出打箭爐分道入藏於是蒙古諸部亦各率部兵隨西寧軍扈新達賴進征詔即軍中封新達賴爲宏法覺衆六世達賴喇嘛大策零敦多布自引兵拒西寧軍於楚瑪拉池附近再戰再北而川軍已馳入西藏國都拉薩號召大小第巴宣示德意誅喇嘛助逆五人幽九十餘人喇嘛震懾大策零敦多布聞之北竄西寧軍遂以九月八日

送新封達賴喇嘛入西藏西藏平班師留蒙古兵二千鎮之而以拉藏汗舊臣貝子康濟鼐及台吉頗羅鼐分掌前後藏政權至雍正初設駐藏大臣以監之西藏遂爲中國屬土焉

第四章

帝在位宵旰勤勞勵精圖治而尤以民生爲念是時黃淮兩河頻年衝決下流地方城郭田廬時遭漂沒朝廷屢遣大臣督修糜帑金數百萬歷年既久迄無成效帝甚患之又欲察民生之疾苦知稼穡之艱難於是屢舉南巡之典康熙二十三年十月車駕幸山東登泰山自宿遷臨閱黃河令河道總督靳輔增修隄防渡河舟行過高郵見居民草屋臨流牀竈半在湖水中惻焉念之因登岸步行隄畔十餘里召集耆老秀才詳問致災原由尋渡江寧謁江寧謁明太祖孝陵見其頽廢勅地方官勤謹禁護道出明故宮僅存故址慨然者久之旋自江寧還經泗水東境過少昊陵顏子林駐蹕曲阜祀闕里親釀酒於孔子墓下命孔氏子孫講周易大學徧觀車服禮器賜衍聖公以下書籍裘服各有差二十八年正月車駕復泝運河而南以二月幸杭州渡錢塘謁禹陵企慕其治水之功焉因念今日之水所以不治由於洪澤湖之水勢甚大加以黃運二河合併而出故益不可制乃欲導江相北使不得侵入清水又欲疏洩洪澤湖以殺其勢於是三十八年二月復南巡三月渡河相度地勢察視隄工諭河道總督于成龍測量水土繪圖以進

車駕復至杭州回過蘇州幸洞庭東山有水東民人告菱湖坍田賠糧以其詞付巡撫帝問扈蹕守備牛斗曰太湖廣狹若干答云八百里帝曰何以具區志祇稱五百里答云積年風潮衝坍隄岸故今有八百里帝曰去如許地方何不奏聞開除糧稅乎答曰非但水東一處即如烏程之湖溇長興之白茅嘴宜興之東塘武進之新村無錫之沙墩口長洲之貢湖吳江之七里港處處有之帝曰朕不到江南民間疾苦利弊焉得而知耶遂諭令查明奏免四月又諭戶部截留江浙漕糧竟免積欠以紓民力四十二年復南巡渡黃河徧閱徐家灣高家堰翟家壩等處隄工以張鵬翮爲河道總督指示方略四十四年復南巡閱楊家莊高家堰黃河九里岡等地方工程四十六年再南巡江浙閱視溜淮套見沿河所立標竿多在民墳墓之上命盡行撤去我聞帝於河務日夜憂念至揭而書諸宮中之柱上恐或一日忘也洵可謂精而且勤矣然我聞黃河水道上流不甚變遷自開封以東則代有轉移相傳禹所導之河道經天津而入海者自後漸遷於東南漢時已注於濟南之北方今黃河口附近後漢明帝時王景從今河南之滎陽至北派依今之大清河與故道無大差異南派則依清河合泗水洛水從海州之南而入海宋南渡後勢益南趨緣金人不利於北流因導之南行以嫁禍於宋也然以地勢而論北高南低上流潰決則從北而南

亦當然之事也至元時北流盡絕以一淮水受全黃河之水以迄於明遂頻受河患河道亂流至有十餘處之多雖有潘季馴者爲當時治河之能臣也其論治河之策曰河勢宜合不宜分宜急不宜緩合則流急急則沙刷而河深分則流緩緩則沙滯而河淤必以隄束水借水刷沙爲治河之良法此眞切實而不可易者奈明季財政竭蹶不能維持行之而其功不獲成惜哉清初之河患卽承明季潰決之遺也河督靳輔主築隄岸疏下流塞决口此則一勞永逸之策也可謂潘季馴後一人矣帝亦深然其說卒以與巡撫于成龍等之意未合而又爲御史郭琇所參劾乃遭罷免不能竟其用自靳輔去後河務遂不克成功此亦未嘗非帝之一大憾事也帝所過沿途諮詢具悉地方官賢否並周知民生疾苦恤困窮免賦稅而又察孝廉舉遺逸清蹕所至盛典昭焉終康熙之世南巡者凡六往返供億悉發內帑沿途宮不施采績相傳每處所費不過一二萬金自三代以降人主巡行天下供億之盛驛騷之繁往往竭盡天下財賦諸臣曰朕欲周知地方風俗小民生計故有事於巡行凡一切供御之需悉出內府儲備其沿途日用亦悉照各地方時價採購秋毫不許有累於民如有官吏借名科派以致擾害人民者悉以軍法從事大小文武官員如有私相餽遺及扈從大小官員隨從人等有橫行生事者亦悉以軍法從事凡經過地方

方百姓各安生業皆如當時務令墾無廢市隴不輟耕弗違農時所過民田不許踐踏嗚呼帝真可謂洞悉民隱而善體民心者矣夫國之本在民民之生在養帝藉巡行天下備知地方之利弊閭閻之疾苦關心民瘼視切如傷古五帝三王之遺也漢文帝唐太宗不足論矣其子孫帝王相承至二百六十餘年之久非有以也夫

帝又以是時兵革方定民未得休息因屢蠲天下之錢糧以恤民生自康熙元年以迄五十年所免天下錢糧共一萬萬兩有奇又諭自康熙五十年起三年之內天下錢糧通免一周使遠近均霑德澤如是三年之中所免天下錢糧又三千八百餘萬兩帝又以生齒日繁錢糧日增胥吏藉以舞弊民力又因而不足乃定爲永不加賦之制先是國初編審戶口其制率沿前代五年一舉丁增而賦隨之所報不實後更定一年彙報而編審之冊仍無實數帝乃諭令天下以康熙五十年額定丁冊爲準嗣後新增者謂之盛世滋生人丁永不加錢糧垂爲定制清代之法祖宗所定之制子孫不得變更由是賦額一定雖有掊克聚斂之臣永不能倡加賦之議二百六十餘年之中民皆被其澤帝德之及人也遠矣

第五章

帝好學年十七八時以讀書過勞致患咯血而不肯少休及至老耄猶日夜披書卷而不肯釋手每日御

經筵聽日講官進講經義皆以未明出御初尙先聽各部奏事畢始臨經筵中年以後命先進講而後奏事六十年無一日間三藩之亂軍書旁午日必數至諸臣以機務繁重請隔日進講帝曰軍事或數日至或一日數至不可以日限計凡人精神工夫弗使間斷裨益身心良非淺鮮其仍每日進講以慰朕惓惓嚮學之心帝之好學非以學問爲塗飾耳目之具欲躬行實踐故兢兢業業不敢稍懈帝嘗謂講官曰爾等以經書進講之時無非內聖外王修齊治平之道每講之時朕必詳詢敬聽學問無窮並非空言惟當躬行實踐庶於所學方有裨益爾等其毋隱諱眞義以助予好學進修之意康熙二十三年南巡泊舟燕子磯夜至三鼓猶不廢讀侍講高士奇請少節養帝告之曰予五歲即知讀書自八歲踐阼輒以大學中庸之訓詁諮詢左右必求得大意而後予心始覺愉快日日讀書必字字成誦從不肯自欺及四子書既已通貫乃讀尙書於典謨訓誥之中體會古帝王孜孜求治之意即欲使古昔治化貫現於今及讀大易觀占玩象於聖人立教垂世之精心予皆反復探索必使中心理會無纖毫扞格深味古今義理足以悅我心予之不覺疲勞以此故也帝於學問上自天象地輿曆算音樂法律戰術下至騎射醫藥蒙古西域拉丁諸文字無所不習且又往往創立新法別啟津途勅撰巨籍如佩文韻府淵鑑類函數理精蘊曆象考成音韻闡微康熙字典韻府拾遺駢字類編分類字錦子史精華等書嘉惠士林都數十種而於

算術地理則尤能滙通今古貫澈中西先是宋元時中國算學已有天元術爲最高至明而失其傳至是西洋代數學漸輸入於中土帝先得其術譯曰借根方以授梅文鼎之孫穀成文鼎在明末與王錫闡同以精中西天文算術音律箸書專家帝所撰之數理精蘊曆象考成三角形論等書咸本於是穀成旣得代數術知與天元名異實同由是天元術遂因借根方法而復明於世帝又引耶穌教士徐日昇張誠白進安多等於內廷使日日輪班進講西學教授測量法算學天文人體解剖物理等學又與耶穌教士南懷仁等相與研求曆象創觀象臺於北京頒定康熙永年曆法又製新式鎗砲精繪皇輿全圖前此中國地圖皆無經緯度線記里多誤帝於是分命使臣按省測量編爲新地圖一時輿圖之精密又遠過於前代帝又善書生平臨摹法帖多至萬餘所寫寺廟多至千餘幅愛董其昌字畫所有真跡悉彙登秘閣帝嘗出理學眞僞論以試詞林又刊定性理大全朱子全書等書特命以朱子配祀孔廟十哲帝嘗曰朱子學說凡天文地理樂律曆數俱非泛然空論皆能確見其所以予嘗細爲尋繹雖欲求毫釐之差亦不可得其折服若此由是時學者羣趨於程朱之學如李光地張伯行湯斌熊賜履等皆以理學耆儒躋顯仕當時有朝鮮學者謂帝之尊崇朱子非真心服實一種權術而已彼蓋察天下之人心窺當時之趨

向於是呼號天下謂朱子之道即帝室之家學其實彼何嘗識朱子之學問要不過利用朱子學說以鉗天下之口而避夷狄之稱耳嗚呼此其說亦未可盡非也然當是之時文治大興得人之盛軼於漢唐科舉之外復有特科如康熙十七年詔舉博學弘儒備顧問著作之選令在京三品以上及科道在外督撫布按及學政各舉所知以應於是內外諸臣疏薦送部百四十三人詔戶部月給俸祿明年三月集諸被舉者於體仁閣試之得彭孫遹等五十人俱授爲翰林院官令纂修明史一時通才碩彥如湯斌朱彝尊施閏章毛奇齡李因篤陳紹崧汪琬潘耒尤侗等皆與其選又兩次南巡江浙召試諸生得吳士玉等七十三人亦各授官有差於斯時也封疆大吏與在朝之臣莫不以得一士爲榮延訪之使四出束幣所加不遺澤野而績學不求聞達之士與公卿抗席而居往往崛起閨閣由徒步入翰林預修書海內聞風靡不嚮化叶盛矣或曰此乃以海內初定明室遺臣多有存者士大夫或以逸民自居著書言論常慨然有故國之思帝知此輩不能不以恩禮羅致之故委曲從時特懸其格以相待亦收拾漢人之一術也當時如呂留良李顥傅山黃宗羲魏禧顧炎武萬斯同應撫謙輩爲明季大儒皆夷然不屑就其立意較然不欺其志者矣帝又廣求天下之遺書康熙二十五年四月詔禮部翰林院曰自古帝王致治崇文興籍具備猶必博採遺書用充秘府蓋以朕見聞而資掌故甚盛事也朕留心藝文晨夕披覽雖內府書籍篇目

粗陳而衷集未備因思通都大邑應有藏編野乘名山豈無善本今宜廣爲訪緝凡經史子集除尋常刻本外其有藏書秘錄作何給值採集抄寫爾部院會同詳議務令搜羅罔軼以副朕稽古右文之至意尋又詔曰自古經史書籍重發明心性裨益政治必精覽詳求始成內聖外王之學朕披覽載籍研究義理凡厥指歸務期於正諸子百家泛濫詭奇有乖經術今搜訪藏書善本惟以經學更乘實有關係修齊治平助成德化者乃爲有用其他異端詖說概不准收錄或曰此亦漢武帝罷黜百家表章六藝之遺意爲統一天下思想言論之策也

第六章

帝在位六十餘年失政雖在所不免如開捐納復八股封世祖乳母樸氏爲奉聖夫人及納姑爲妃等類然通觀其大體則卓乎三代下之賢君矣我聞帝平日一切起居飲食皆有常度未嘗稍改雖酷暑燕處從不免冠北征度漠南巡治河雖卒役不能踰其勞祈雨禱疾步行天壇並醯醬鹽而不御年踰六十猶扶病力行之凡政事利弊必推求其故惡虛文尙實際嘗自言昔人每云帝王當舉大綱不必兼綜細務朕心竊謂不然一事不謹即貽四海之憂一時不謹即貽千百世之患不矜細行終累大德故朕每事必加詳慎即如今日留一二事未理明日即多一二事矣若明日再務安閒則後日愈多壅積萬幾至重

誠難稽延故朕蒞政無論鉅細卽奏章內有一字之譌必爲改定發出蓋事不敢忽天性然也其務勤謹若是以實心行實政故其時政事修明風俗純厚是時賢臣輩出漢臣如范承謨魏裔介魏象樞湯斌熊賜履于成龍李光地陸隴其張伯行楊雍建杜立德蔣伊等滿臣如圖海費揚古伊桑阿等其尤著也餘尚不可勝紀是以興造功業制度遺文後世莫及雖有明珠噶禮索額圖等樹黨擅權然皆不旋踵而受誅嗚呼自古功德兼隆由漢以來未有如清康熙之盛也帝生平所最引爲憾事者惟儲位之廢立是帝有子三十五人胤禟最長然非嫡出嫡而長者爲胤禩帝立爲皇太子時康熙十四年也清自太祖以來皆不預立儲位太祖曾言有德者卽登大位否則當擇善者以畀之清之立太子自此始胤禩旣立爲皇太子帝簡大學士張英教之又命儒臣熊賜履等爲之講明性理凡南北巡狩未嘗不令從行俾知民間之疾苦地方之利弊康熙三十五年帝討噶爾丹於漠北時太子在京留守聽視朝政世皆稱其賢未幾乃忽變而爲貪暴失德狀類狂疾時太子兄胤禵爲直郡王弟胤祉爲誠郡王胤禎胤禩胤祥胤禩俱爲貝勒皆不滿皇太子各結黨引類欲傾皇太子以長子胤禩四子胤禎八子胤禩爲尤力太子聞之亦植黨羽以自保自是太子之惡聲日聞未幾乃有太子黨與內大臣索額圖等窺伺乘輿密圖不軌之事索額圖伏誅越數年詔執皇太子廢之幽禁咸安宮時康熙四十七年也自太子廢諸王覬覦儲位者

益植黨暗爭胤禟密告帝言相者張必德謂胤禟相當大貴請立爲皇太子且言欲誅胤禩不必出自皇父之手帝大怒立誅張必德帝素知胤禟柔奸有異志至是益疑其密布羽翼希望非分且疑故太子之狂疾或有他故乃窮治之果得胤禟胤禩令蒙古喇嘛咒咀太子用術魔魅狀發掘十餘所詔革胤禟胤禩爵釋廢太子胤禩而胤禟之病遂瘳瘡四十八年三月帝念儲位不定異日且爲亂階廢太子胤禩旣病瘡遂再詔立爲皇太子未幾而皇太子之狂疾又發且嘯聚凶徒親近佞幸帝屢隱忍之而其疾終不已至五十一年仍廢黜禁錮或曰皆皇四子從而陷之也帝自是遂不復言建儲事矣羣臣以是請者皆往往得罪如翰林院檢討朱天保則正法大學士王掞御史陶鑾則遣戍由是羣臣亦皆不敢議康熙五十八年有佟國維者又疏請立胤禟爲皇太子爲帝所切責以孝懿仁皇后之父故姑免死至六十年帝深引以爲憾事宣諭廷臣有朕衰老中心憤懣衆人虛誑等語明年十一月帝崩在位六十一年壽六十有九謚曰仁皇帝廟號聖祖皇四子雍親王胤禟卽帝位以明年爲雍正元年或曰聖祖崩非傳位於胤禟胤禟竊而襲之也胤禟自少頗無賴好飲酒擊劍不見悅於聖祖出亡在外所交多劍客力士結爲兄弟十三人技皆絕妙高者能鍊劍爲丸藏腦海中用則自口吐出夭矯如長虹殺人於百里之外次者能鍊劍如芥藏於指甲縫用時擲於空中當者皆披靡胤禟亦習其術康熙六十一年冬聖祖將赴南苑行

猶會有疾回駐暢春園彌留時手書遺詔傳位十四子十四子胤禩也賢明英毅常統師西征甚得西北人心故聖祖欲立之時胤禩偕劍客數人返京師值知聖祖遺詔設法密盜之潛將十字改爲于字藏於身獨入侍暢春園盡屏諸昆季不許入內時聖祖已昏迷矣有頃微醒宣詔大臣入宮半晌無至者驚見獨胤禩一人在側知被賣乃大怒取玉念珠投之不中胤禩跪謝罪未幾遂宣言聖祖上賓矣胤禩出告百官謂奉遺詔冊立并舉玉念珠爲證百官莫辨眞僞奉之登極是爲雍正帝或曰竊詔改竄之策年羹堯實主之其說頗暗昧不明或又曰聖祖傳位之詔親書於隆科多掌中隆科多出雍正迎問隆科多急抹去其掌之十字祇存四子字雍正遂得立異說不一未知孰是證之雍正帝卽位後深惡諸兄弟而慘殺之則雍正帝得位之不正其事不爲無因矣雍正帝甫卽位輒詔郡王胤禩解撫遠大將軍職還京師謫守陵寢胤禩爲聖祖所最愛立功西藏中外頗稱道之故帝忌之特甚尋詔諸兄弟名上一字改爲允字以與御名同也元年革履郡王胤禩爵二年報廢太子胤礎元於幽所三年革郡王胤禩爵四年削胤禩胤禩籍尋又詔更胤禩名爲阿其那胤禩名爲塞思黑阿其那塞思黑滿洲語謂犬豕惡之甚而屏之於之類之外也尋又囚胤禩於宗人府胤禩於保定並拘胤禩胤禩等尋又宣胤禩罪四十款胤禩罪二十八款胤禩罪十四款忽又由禁所報胤禩胤禩病故蓋帝陰遣人殺之也或曰二人死皆無屍胤禩胤世祖之追誅多爾袞愛新覺羅氏之家法然也

第七章

禪尋亦鋗死誠親王胤祉亦革爵胤祉夙以文學著稱帝故惡之一時因黨附諸王而獲罪者不知凡幾如編修陳夢雷內大臣勒什亨德寧貝勒蘇努尙書七十阿爾松阿貝子魯賓滿都護公爵鄂倫岱永謙及裕親王保泰簡親王雅爾江河等或死或遺或降革有差諸王之子孫親戚亦皆伏辜帝於諸兄弟中惟怡親王胤祥爲帝同母弟也而又謙恭寅畏善承意旨故獨爲帝所信任餘均仇視如路人焉骨肉之禍至此極矣嗚呼清之同室操戈不自雍正始太宗之誅阿敏莽古爾泰攝政王之誅碩託阿達禮豪格世祖之追誅多爾袞愛新覺羅氏之家法然也

雍正帝性慘覈不如聖祖之寬大然其綜核之才亦爲中主所不逮帝在藩邸四十餘年於人情世態無不洞悉見當時地方官吏不甚整飭故甫卽位卽首頒振肅紀綱之詔十一道訓飭督撫提鎮以下文武各官又甄別翰林詹事等官不職者勒令解退又以所在旗人往往橫暴無理小民受累地方官吏莫敢誰何諭令密奏以聞又以宗室八旗子弟往往挾親貴之勢恣爲威福大率不習教育命設宗學二覺羅學八以敎宗室之子弟官學十以敎八旗之子弟清貴族之有敎育自此始其最優者爲解除賤業奴隸之名籍山西陝西各屬有所謂教坊樂籍者世執賤業不得與齊民伍其先世當明永樂靖難時不附燕

兵成祖惡之貶入教坊樂籍世世不得以自拔清初猶存帝特令革除改業爲良民浙江紹興之惰民句籍其先世當元末時從陳友諒抗明太祖爲明太祖所貶或曰係宋將焦光瓊部屬叛宋投金被斥元人謂之怯憐戶明太祖定戶籍扁其戶曰匱其業與山陝樂籍無異亦並令革除之江南徽州之泮檔寧國是江西浙江福建所屬山縣內之棚民以冶鐵造紙爲業者廣東濱海之蟹戶以船爲家者亦皆先後除籍齒於齊民大哉皇仁及於賤民洵千古之盛典也但防制臣下過於嚴密清初官制多沿明舊通政司收受章疏有敷奏封驳之權內閣票擬批答爲承旨立法之府帝以其職權太重乃別設奏事處命內外諸臣有機要重事密封直達御前使通政司成爲閭曹又創立軍機處典軍務密事置大臣章京等職於是內閣亦幾同虛位又詔六科改隸都察院不得仍前之獨立禁部員不許兼攝他司事令各省督撫將幕客姓名造冊報部又密設緹騎四出偵伺凡閨閣細故無不上達有狀元王雲錦元旦在家與戚友爲葉子戲忽失一葉次日趨朝帝問夜何所事雲錦具以實告帝笑曰不欺暗室真狀元也乃袖出一葉示之卽雲錦夜間所失者也按察使王士俊將赴任張廷玉薦一健僕供役甚謹後士俊將入都陛見僕豫辭去士俊問故僕曰吾亦欲入都面聖者始知此僕爲帝之侍衛受命而來伺察其舉動者也帝又一日

密取刑部大門之匾額匿之次日以刑部有無匾額質部員部員不察皆以有對帝命出匾額以示之曰是額在此已久汝輩皆不知平素出入時之疏忽可知因大加詰責如斯之類不勝枚舉故一時大小臣工靡不畏懼嗚呼帝何乃察察以爲明得母近苛歟帝又嚴朋黨之禁初卽位卽語諸臣曰朋黨惡習起於明季此風至今未息爾大臣有則痛改無則永以爲戒反覆數百言誥誠至切以是時諸王尙各植黨自衛不亟予解散恐蹈聖祖末年之覆轍故初御乾清門聽政即諄諄以此爲王大臣戒自是日夜謀翦除王黨無微不至人心惶恐門戶之見轉深帝以爲欲除朋黨之源當令輿論之所是非與朝廷之所賞罰相爲一致於是御製朋黨論以駁宋歐陽修君子有朋之說頒示滿漢諸臣其大要謂天尊地卑而君臣之分定爲人臣者義當惟知有君則其情固結而不可解而能與君同好惡夫是之謂一德一心而上交訓誡殷殷較前更爲諄切嗚呼由歐陽子之論世固或有借其說以助標榜之私者實亦不能無弊顧帝謂欲除朋黨之源必令輿論之所是非與朝廷之所賞罰相爲一致異哉是非者天下之公賞罰者一人之私使朝廷之賞罰固能公爾忘私則輿論豈有故違朝廷而別有所謂是非者帝又言能與君同好惡夫是之謂一德一心若是可見其所謂朝廷之賞罰者不過人君之好惡而已烏能強輿論之是非而必從哉帝又嘗語廷臣曰朋黨小人自古帝王之所必誅唐虞之世共工驩兜比周爲黨舜必置之於

法嗚呼舜之賞罰自不背天下之是非非舜強天下之是非而從其賞罰也充帝之說必令天下之人皆愚而彼獨智然後可不然則其說徒自欺欺人而已是時廷臣中以朋黨獲罪者不知凡幾而獨任田文鏡如李紱蔡珽謝濟世輩皆一時之名臣也以疏劾田文鏡故帝皆目爲朋黨而逮治幾論死田文鏡一居心忮刻之小人也小有才而行政苛細其所歷山西河南布政使河南巡撫河東總督諸任靡不以嚴酷武健稱而帝深倚任優渥之至曰使各省督撫皆能如田文鏡者則天下允稱大治矣當時雖以鄂爾泰張廷玉之得君又皆負重望享盛名然亦不能始終如一而田文鏡獨得恩禮終身不少衰或曰田文鏡之獲信任幕客鄖先生之力也田文鏡督河東鄖先生謂田文鏡曰公欲爲名督撫否耶田文鏡曰然鄖先生曰若欲爲名督撫必任我之所爲毋掣我肘也田文鏡問所爲鄖先生曰我欲爲公作一疏疏中一字不令公見此疏上公事成矣田文鏡心知其異許之蓋參隆科多之疏也隆科多爲帝之元舅又爲先帝顧命之大臣帝之獲當璧隆科多又與有力焉帝深倚畀之既而隆科多恃功不法日漸驕恣當長吏部時其所銓選官員悉不待旨准逕自稱爲佟選佟其姓也其擅權自專大率類是帝陰惡之而中外大臣無一人知者鄖先生獨窺知帝隱故爲田文鏡作疏劾之疏上隆科多果獲罪禁錮終身而田文鏡之寵遇日隆嗚呼鄖先生卽帝所密使假手於田文鏡以參隆科多者也不然彼雖知帝意其曷敢探

帝之私哉我聞田文鏡尋與鄖先生頗忤鄖先生輒憤然去而田文鏡之奏事輒不當帝意數被斥及再以重幣聘鄖先生而帝眷復如前鄖先生之由來可知矣然帝不假手於他人而獨假手於田文鏡帝必以田文鏡爲可倚能任鄖先生之所爲而母敗我事此亦足見帝信任田文鏡之一端也田文鏡又自以不由科目出身每因奏事痛詆科目中人謂往往藉舉主門生之名以植黨援無誠心帝亦信其言至諭科目出身官員等務去其朋比黨援之惡旨爲朝廷殫竭忠誠秉公辦事將見君臣上下一德一心治道自此而日隆世風自此而日厚嗚呼吾知之矣帝所謂君臣上下一德一心無朋黨之惡習者必皆如田文鏡然後可則帝之爲治可灼然見矣後乾隆立始得河南地方自田文鏡爲督撫以來苛察搜求而所屬府州縣吏復皆承其意旨剝削成風河南之民無不重足而立側目而視於是田文鏡之奸狀畢露田文鏡殆古之酷吏若歟同時大臣中有李衛者亦爲帝所信任然衛故豪士爲政頗疏節闢目不如田文鏡之苛細云

第八章

當康熙時厄魯特蒙古諸部之對於中國準噶爾部跋扈和碩特部馴擾故朝廷常懲準噶爾部而扶和碩特部至雍正元年和碩特部之青海部汗羅卜藏丹津與準噶爾部汗策妄阿拉布坦合謀叛中國羅

卜藏丹津者和碩特部長固始汗之孫也承其父達什巴圖爾牧青海及河套準噶爾部汗噶爾丹爲聖祖所敗達什巴圖爾率其部屬來朝詔封達什巴圖爾爲和碩親王餘授貝勒貝子公爵有差聖祖征西藏青海部兵皆從征諸部長以功晉封王公爵者浸衆羅卜藏丹津襲封親王爵自以爲固始汗嫡孫當恢復先人霸業總長諸部會聖祖崩雍正初立遂乘機欲先脫中國羈絆乃誘諸部盟於察罕陀羅海令各仍故號不復稱王貝勒貝子公等爵而自號達賴渾台吉以統之居西寧塔爾寺之青海大喇嘛察罕諾們亦從焉又陰結準噶爾汗策妄阿拉布坦爲後援於是青海與準噶爾聯合而遠近遊牧喇嘛二十餘萬亦皆同時騷動西寧戒嚴時獨羅卜藏丹津同族郡王額爾德尼親王察罕丹津不從先後挈衆內附帝命川陝總督年羹堯爲撫遠大將軍駐西寧以四川提督岳鍾琪參贊軍務羅卜藏丹津叛舊駐西寧之兵部侍郎常壽幽之年羹堯分兵北扼布隆吉河防其內犯南守巴塘裏塘等地斷其入藏又請勅富寧安等屯吐魯番及噶斯泊截其通準噶爾之路而岳鍾琪自松潘至西寧沿途相機剝撫西邊數十里烽煙肅清青海奪氣羅卜藏丹津所遺分寇西寧之衆皆先後敗歸乃惶懼請罪時雍正元年十二月也二年正月帝知羅卜藏丹津窮蹙益趣年羹堯進兵初期以四月草生時前進岳鍾琪以爲青海廣漠寇衆不下十萬兵貴不測願乘春草未生假精兵五千馬倍之兼程擣其不備帝壯之詔授岳鍾琪爲奮

威
軍以二月出師直抵賊帳賊尙未起馬皆無銜勒倉皇大潰羅卜藏丹津衣番婦衣遁俘其母弟妹暨逆黨頭目斬賊八萬降男女數萬駝馬牛羊器械甲帳無算岳鍾琪慮羅卜藏丹津入藏引軍自河源西南追而羅卜藏丹津則已橫越戈壁北投準噶爾矣大軍乃還自出師至賊巢前後凡十五日往反兩月自古用兵出塞未有如斯之神速者詔封年羹堯一等公岳鍾琪三等公勒碑太學如聖祖之征準噶爾例青海悉定乃分其地賜厄魯特之不附逆者而於西嚮設大臣以轄之朝廷遣使準噶爾索羅卜藏丹津策妄阿拉布坦不奉詔時西北兩路大軍皆已撤惟成兵分屯哈密巴里坤吐魯番布隆吉河等處絕其東侵之路雍正五年冬策妄阿拉布坦死其子噶爾丹策零立遣使來朝帝賜勅諭仍令執羅卜藏丹津以獻噶爾丹策零年少好兵善馭士卒諸台吉皆樂爲之用帝以大軍旣撤若一日準噶爾有變則喀爾喀青海西藏必被其擾亂且爲中國之隱憂決計討之廷臣多以爲未可獨大學士張廷玉力贊用兵與上意合帝遂命傅爾丹爲靖邊大將軍屯阿爾泰山出北路岳鍾琪爲寧遠大將軍屯巴里坤出西路分兵進討會羅卜藏丹津與其族屬謀殺噶爾丹策零事覺被執於是噶爾丹策零遂藉以爲緩師地詭稱遣使送羅卜藏丹津來獻朝廷因召兩將軍還京兵止不進時雍正八年也而噶爾丹策零窺中國備弛逕發兵二萬西犯巴里坤南境縱掠駝馬於是廷議復增兵決戰九年五月噶爾丹策零又悉衆北

犯先遣諜佯爲官軍所得詭言大隊未至祇少數兵在博克托嶺傅爾丹勇而寡謀遽信之以兵萬餘往襲諸將交諫不聽果中敵伏官軍被圍於和通泊萬矢雨集胡騎四合索倫蒙古之兵皆潰終夜甲仗聲不絕官軍得生還者二千人而已噶爾丹策零益乘勝東犯蒙部朝廷諸將迭更代類恇怯不敢戰賴三普諾額部長策凌屢敗準噶爾兵而杭愛山光顯寺之戰厥功尤偉三普諾額部爲喀爾喀蒙古土圖之分部策凌故元太祖十八世孫圖蒙肯之裔也幼居京師侍內廷尚公主爲清額駙累歲從征有功詔封碩親王杭愛山光顯寺之戰在雍正十年七月噶爾丹策零由北路傾國來寇繞避科布多大營潛至杭愛山探知策凌他出突襲其帳策凌反旆馳救策凌部下有脫克渾者能晝夜行千里每登高峰顚輒以兩手張其衣若皂雕鼓翼而立故賊遠望不覺盡得賊形勢虛實歸報遂嚮導蒙古兵二萬繞閑道出山背時天昧爽自高而下如風如雨賊夢中起人不及弓馬不及甲遂大敗策凌追擊倍途轉戰十餘次追至鄂爾昆河之杭愛山即古燕然山之南麓也其地右阻山左逼水道狹不容衆又橫亘以大喇嘛寺卽光顯寺也一名額爾德尼昭賊不得走策凌乘暮薄險蹴之呼聲震大漠敵兵三萬擊斬其半擠墜溺死亦半河水爲赤策凌兵僅傷十餘人以約順承郡王錫保師不至無人夾攻朝廷檄撫遠大將軍馬爾賽邀其歸路又不從命故敵得乘夜突圍遁去詔晉封策凌和碩超勇親王諸將皆獲罪而噶爾丹策

零亦自此畏懼請和雍正十二年六月詔罷兵遣侍郎傅鼐學士阿克敦往諭噶爾丹策零以阿爾泰山爲準噶爾喀爾喀之邊界彼此不得侵越噶爾丹策零旋於乾隆元年遣使入覲并貢方物羅卜藏丹津亦於乾隆中戡定伊犁時就俘準噶爾始平按青海蕩平皆年羹堯岳鍾琪兩名將之功也準噶爾之役以年羹堯既伏誅岳鍾琪之策又不用遂有和通泊之敗聞初傅鼐與岳鍾琪議進兵岳鍾琪赴傅爾丹營中見壁上刀槊森然問何所用傅爾丹曰此皆吾所素習者故懸以勵衆岳鍾琪笑頷之出語人曰爲大將者不恃謀而恃勇亡無日矣傅爾丹後果如岳鍾琪言而敗使無額駙策凌杭愛山光顯寺之捷則準噶爾之患不知何底矣岳鍾琪非善知兵哉年羹堯岳鍾琪皆世爲名將當康熙雍正間平西藏平青海累戰建奇勳衛青霍去病之流也而帝皆深忌之年羹堯本藩邸舊人帝初登極慮諸王爲變常令年羹堯衷甲以從其所賞賜皆爲前後勳臣所未有雍正三年西事將竣忽調年羹堯爲杭州將軍以解其兵柄問其罪名但以賀表內朝乾夕惕誤作夕惕朝乾而已或曰帝令密訪胤禟在西寧軍中時劣迹跡年羹堯力爲奏辨帝滋不悅假是以奪職也未幾又令削太傅銜革將軍任尋又坐以九十二款大罪勒令自裁並誅其子一等男富其父太傅遐齡亦坐死罪大學士朱軾力爭以子刑父非法免死與其兄廣東巡撫希堯並革職族人皆戍邊永不許出仕有匿年羹堯子孫者以黨附叛逆論岳鍾琪亦向爲帝所

優獎祇以準噶爾之役因別將石雲倬兵遲發致被賊竄爲大學士鄂爾泰護大將軍張廣泗所劾奪少保降侯爵落職拘禁擬死罪至乾隆中始放歸田里再起復立大功嗚呼年羹堯之怙寵鷙張目無朝貴同僚無不怨恨聞年羹堯在西域行營時引用私人但咨吏部不由奏請謂之年選與吳三桂之西選隆科多之佟選時人稱之曰三選年羹堯自西陲還朝公卿跪接於廣寧門外年羹堯策馬而過毫不動容王公有下馬問候者年羹堯亦但領之而已至天子御前箕坐無人臣禮帝皆隱忍優容之而誅之之意已早決世以比霍氏之驟乘云及降爲杭州駐防禦時日坐湧金門側無一人敢出其門驚相戒曰年大將軍在也其餘威尙如此平日之氣燄可知誅夷之禍有自來矣岳鍾琪忠厚長者雖當其督川陝時謗言四起讒搆於帝前者不絕或謂其將擁兵叛清或謂其爲岳飛後欲修宋金之報復皆鑿空架陷毫無實據曾靜遣其徒張熙貽書勸岳鍾琪反岳鍾琪立擒以聞忠肝義膽照映日月帝乃一時褒以忠赤而卒以是疑岳鍾琪帝何寡恩之若是自古梟雄之主其待臣下殊不可料也或曰年羹堯岳鍾琪之部下皆多異人以是而招帝之忌其說殆或然歟

第九章

帝在位十三年崩壽五十有八謚曰憲皇帝廟號世宗皇四子弘曆即帝位改明年爲乾隆元年初世宗

居藩邸時親見聖祖諸子覬覦儲位爭奪紛紜因洞悉古今建儲之弊或儲君恃貴驕矜漸至失德或左右羣小逢迎諂媚引誘作非或有奸宄之徒窺伺讒搆以搖動儲位若斷然廢去又恐國本不立非所以計久長乃折衷於二者之間而創爲密建儲位之法於雍正元年八月御乾清宮召王大臣入諭以建儲一事非審慎周詳不可又不能不早爲之計朕擬親寫密封存之匣內置宮中最高處世祖御書正大光明扁額後以備不虞又別書密旨一道藏諸內府爲異日勘對之資永爲定例諸臣皆曰聖見周詳臣等遵議乃令諸臣退世宗親自密書應立皇子名緘封錦匣收貯祇留總管事務大臣掌之至是弘曆立即世宗所密書應立皇子是也世宗雖嚴酷其所以從民意恤民生收拾天下之人心者亦復不少如加封孔子先世俱爲王爵封明裔朱之璉爲延恩侯減江浙浮糧興京東水利攤丁銀入地畝徵收因洞庭湖風波險惡命於湖南別建試院因二月天氣尙寒命改於三月會試一時士民亦多被其澤者惟喜言祥瑞求長生清虛學道田文鏡李衛等復逢迎其意旨疏薦方士賈士芳妻近垣等入內供奉十餘年來禱祠林立封神殆遍於是欽天監及封疆奏報皆侈談符瑞如珠聯璧合瑞雪卿雲甘露醴泉嘉禾芝草麒麟鳳凰黃河澄清日食不見之屬不可屈指數世宗雖外示謙讓而聞言內喜以爲帝王自有眞也當婁近垣之入侍招鶴則仙禽降庭禱雨則春霖立沛世宗信之欣然以爲神仙可致尊之爲妙應眞人居之

光明殿至宮中崇作賈士芳下獄被戮而張太虛王定乾之徒復聯翩而入其時大臣持祿而阿諛小臣畏罪而將順世宗復動以猜疑誹謗戮辱臣下故淟涊盈廷無敢發言者直至金石燥烈鼎湖龍升儲君嗣位始盡逐西苑供奉諸方士還故里嗚呼世宗之英明神武不減秦始皇漢武帝其好神仙長生之術亦酷似之自古梟雄之主往往私帝王萬世之業於其子孫而猶以爲未足至欲專之於一已之身彼恐子孫之不肖卒不能長保其遺業其用心亦良苦矣嗚呼天下豈真有神仙之術與不死之方哉矧爲神仙之說者必曰清淨曰虛默天下豈有爲帝王能清淨虛默而無所事事哉以秦始皇漢武帝清世宗之智勇過人而皆溺於其說不自覺抑又何其愚也世宗之崩傳聞異辭有謂爲被刺者謂自曾靜勸岳鍾琪舉義不成獄興辭連呂留良世宗嚴治之戮留良父子并其徒嚴鴻達屍盡誅其族一時株連者無算於是漢人之義憤大起如甘鳳池輩日夜謀報復不能得朝廷嚴搜捕之不止留良孫女某劍術之精尤冠儕輩爲祖父復仇入宮行刺世宗實未得令終也又或謂世宗平日多養俠士於是各藩黨與亦大多俠士之流世宗誅鋤諸王殆盡恐其黨爲諸王報讐凡天下劍客不爲帝用者皆欲盡殺之有某僧者即世宗少時所結兄弟十三人之第一人也其術尤高不肯爲帝用亡走山澤聞世宗深患之一日值在某所命結義兄弟三人易服往密布精兵以爲後援圍守要隘僧覩三人至笑曰若輩受主命來捕我耶

汝主多行不義屢以私憾殺人吾即死汝主亦必不能苟免月餘必有爲吾報仇者汝等識之吾今不死不足以爲大丈夫言訖仗劍自殺三人者攜具首復命并以其語聞世宗大懼防衛綦嚴寢食爲之不寧月餘固無故暴死於內寢宮廷秘密諱爲病歿實則爲某女俠所刺也某女俠者卽呂留良孫女爲某僧之女弟子也其說甚異我聞世宗是日早朝尙視事如恒午後忽召鄂爾泰入宮外間已喧傳暴崩之耗鄂爾泰入朝馬不及鞍轡騎煤羸而奔髀血涔涔下宿禁中七晝夜始出當時天下承平長君繼統何所危疑而倉皇若此太子嗣位又諭內監等國家政事毋許妄行傳說外言亦毋得傳入內廷又何所猜忌而有此詔諭由此觀之世宗被刺之說殆或不誣歟乾隆帝卽位以莊王胤祿果王胤禮大學士鄂爾泰張廷玉輔政或曰乾隆帝爲海寧陳氏子非世宗子也陳氏自明季衣冠雀起漸聞於時至之遴始降清位大學士厥後陳詵陳世倌陳元龍父子叔姪並位極人臣遭際最盛康熙間世宗時爲皇子與陳氏尤相善會兩家各生子其歲月日時皆同世宗聞之乃大喜命抱之來久之始送歸則竟非己子且易男而爲女矣陳氏大懼不敢剖辨遂力秘之未幾世宗卽位即特擢陳氏數人至顯位迨乾隆時其優禮於陳氏者尤厚嘗南巡至海寧卽日幸陳氏家升堂垂詢家世將出至中門命卽封之諭之曰厥後非天子臨幸毋輕啟此門也由是陳氏遂永鍵其門乾隆帝實自疑將欲親加訪問耳或又曰乾隆帝旣自知非滿

人在宮中嘗屢屢服漢衣冠欲竟易之一日冕旒袍服召親近曰朕似漢人否一老臣跪對曰皇上於漢誠似矣而於滿則非也帝乃止其事甚秘不可得其詳云

第十章

有清一代乾隆時最稱極盛先以武功言之西北平準噶爾回部東南滅臺灣西南定貴州四川間諸苗族及賓服緬甸暹羅安南廓爾喀等國

準噶爾自康熙雍正以來旋服旋叛其地又橫亘於喀爾喀與西藏之間準部一日未服則西北邊備一日不得息肩故聖祖世宗屢集廷議並有此賊不滅天下不安之諭乾隆朝自四年許和後邊事稍寧至十四年噶爾丹策零死諸子爭立國內大亂其宰桑薩拉爾台吉三車凌納默庫班珠爾阿睦爾撒納等先後來降阿睦爾撒納者故拉藏汗之孫而策妄阿拉布坦之外孫也爲輝特台吉屢欲乘機襲準部據伊犁至是內附備言伊犁可取狀帝聞之大喜欲用爲轄導詔封爲親王議大舉兵廷臣鑒於雍正九年和通泊之敗皆不欲深入惟大學士傅恒贊成帝意遂於二十年春以尚書班第爲定北將軍阿睦爾撒納爲定邊左將軍出北路陝甘總督永常爲定西將軍薩拉爾爲定邊右將軍出西路盡簡八旗吉林索倫精銳以從往征準噶爾所至準夷各部落大者數千戶小者數百戶携酮酪獻羊馬跪迎恐後兵行數

千里無一人抗者兩軍遂於五月朔會兵博羅塔拉河越五日而至伊犁準汗達瓦齊走保格登山阻淖爲營衆尙萬餘大軍追及之侍衛阿玉錫等乘夜以輕騎直薄其營敵衆驚潰達瓦齊從百餘騎踰天山走回疆欲投烏什城城主霍吉斯已承班第檄即執之以獻並獻前青海逃酋羅卜藏丹津送京師伊犁蠶定班第薩拉爾各以功封一等公阿睦爾撒納晉食親王雙俸其後達瓦齊霍吉斯亦皆錫封親郡王入旗籍帝之用兵伊犁也非欲郡縣其地將俟準夷戡定後仍厄魯特四衛拉特之舊分設杜爾伯特和碩特綽羅斯輝特四部各以降人爲之汗長爲中國外藩帝又知阿睦爾撒納有異志當出師之初即密令班第告以朝廷處分伊犁之意見又使科爾沁親王額駙色布騰代奏期以七月中旬俟命並使其衆流言非已爲汗準不得安又用其國汗舊印移檄諸鄰部班第等密以聞帝命卽軍中誅之時大兵已凱旋隨班第等僅五百餘人餘皆厄魯特部衆也班第不敢發先是帝令阿睦爾撒納以九月至熱河行飲至禮班第等因趣之行使喀爾喀親王額林沁與之俱旋欲使入內地則易成擒也阿睦爾撒納遷延中途以俟至八月朝命猶未至知事有變入境且得禍行至烏古倫河乃謂額林沁曰阿某非不臣實中國無信今入境如驅犬羊大丈夫當立事業安肯延頸待戮解副將軍印擲與之曰持此還大皇帝可也擁衆馳去並劫薩拉

爾以行遂嗾伊犁使再叛伊犁諸喇嘛宰桑等爭蠭起應之永常兵數千屯烏魯木齊不敢往救班第自殺事聞帝以色布騰隱匿不予代奏褫爵額林沁縱逆賜死並逮永常改命策楞爲定西將軍往剿策楞聽參贊玉保誤報謂阿睦爾撒納已就擒奏聞於朝而阿睦爾撒納已從容入哈薩克將軍參贊互相咎託言馬力竭頓師不進於是厄魯特四部皆騷動阿睦爾撒納聞之自哈薩克歸會衆於博羅塔拉河謀自立帝聞之大怒褫策楞玉保職以達爾黨阿富汗代之又命巴里坤辦事大臣兆惠爲右副將軍故超勇親王策凌之子成袞札布爲左副將軍同往征會厄魯特諸部內訌又痘疫盛行兆惠兵至諸酋迎戰皆敗死阿睦爾撒納復竄在哈薩克其汗阿布賚許擒獻阿睦爾撒納至阿布賚使人收其馬阿睦爾撒納驚逸徒步入俄羅斯境尋患痘死俄人以其屍送恰克圖時乾隆二十二年也明年兆惠等再進剿餘衆自二十三年至二十五年歷三載先後縱殺凡山谷僻壤及川河流域可漁獵資生之地計二十餘萬戶六十餘萬口皆殲滅無遺類吁慘矣事平分設滿兵駐防漢兵屯種置伊犁將軍以統治之

回部在天山南路其舊汗本元太祖次子哈薩岱之裔世封回部明季時有天方教主謨罕禱德之二十六世孫瑪墨特自西方至傳教於其國各回城皆靡從之遂爲其部汗後皆爲瑪墨特子孫焉厄魯特蒙古強盛回部隸屬於準噶爾部下至是阿睦爾撒納竄死天山北路全入中國回部大和卓木波羅泥都

小和卓木霍集占欲乘機謀恢復陰勒部衆傳檄各城咸戒嚴以待回部數十萬皆爭起響應襲殺中國招撫使者阿敏道帝命雅爾哈善爲靖逆將軍於乾隆二十三年往征回部兵至庫車霍集占迎戰敗入城固守城依山以柳條沙土交築礮攻不入提督馬得勝掘地道以入將及城雅爾哈善欲急切收效嚴令晝夜力掘敵人自城上晝見燈火機遂洩敵自內注以水穴城之卒六百人盡沒時降日鄂對在軍中爲畫伏兵截擒霍集占之策雅爾哈善不從霍集占果夜率衆開西門遁事聞雅爾哈善馬得勝等皆伏法改命尙書納木札爾代之並令兆惠自伊犁移師會剿兆惠至烏什波羅泥都奔喀什噶爾霍集占奔葉爾羌兆惠偵知之追至葉爾羌兵少不敢攻城乃於城東水草處結營欲伺便以取勝也聞敵之積聚在城南棋盤山謀取之以充軍實由城南奪橋渡橋忽斷城中兵出截殺無算總兵以下陣歿者十餘人餘兵浮水還據濠築壘以守軍中乏食駝馬亦盡又無水嚼冰飲相持三閱月無生還望矣將軍納木札爾亦於途中遇敵陣亡富德在北路冒雪來援又不得達會巴里坤辦事大臣阿里袞以兵夜至合富德軍大呼進鞭駝馬蹴地聲甚壯敵不知多少駭遁入城始與兆惠合振旅還阿克蘇分兩路進師兆惠由烏什取喀什噶爾富德由和闐取葉爾羌兩和卓木各棄城遁去富德等追至伊西洱庫河敵兵紛紛降霍集占禁之不能止乃與波羅泥都共入拔達山部富德檄其酋素爾坦沙縛以獻素爾坦沙擒殺之波

羅泥都首爲其從人竊去乃函送霍集占首以獻回部悉平乃仍以其頭目爲伯克令分掌回務置戍兵設參贊大臣等官鎮之歸伊犁將軍節制統號天山南北路曰新疆兆惠由一等公加賞宗室公品級鞍轡富德由一等伯晉一等侯其餘將士皆封賞有差時乾隆二十四年也我聞回酋霍集占有妃號香妃者帝聞其美將軍兆惠陞辭時帝命生致之至則郊迎入處之西內爲建香妃樓樓外設肆市室廬禮拜堂具如西域式以悅之而妃終不爲屈袒衣中藏白刃以數十計語宮人欲得當以報故主也太后鋤祐祿氏聞之恐會帝有事於圓丘宿齋宮太后急召香妃至慈寧宮縊殺之帝趨救之不及命葬以妃禮嗚呼是乃豫讓張良之流也孰謂於遠夷巾幘中得之哉

臺灣自順治十八年鄭氏建國凡二十三年迄康熙二十二年平置臺灣府諸羅臺灣鳳山三縣至康熙

六十年有朱一貴者爲鳳山縣民黃殿等所擁託爲明裔稱曰中興王僭號永和自始亂甫七日而全臺盡陷中國官吏守兵紛紛潰遁渡澎湖入廈門廈門水師提督施世驃聞警與南澳鎮總兵藍廷珍先後渡海會澎湖聞臺民已起義拒賊藍廷珍等乘之自澎湖直入亦凡七日而克復臺府朱一貴走臺灣裏溪爲村民所擒獻檻送京師磔於市臺灣再平至是乾隆中分諸羅以北置彰化縣淡水廳乾隆五十一年又有林爽文之亂爽文爲彰化縣巨族以豪富雄一方聚衆結社號曰天地會亦曰三合會橫行鄉里數十年官吏莫之敢問是年十一月總兵柴大紀檄知府孫景燧知縣俞峻等發兵往捕焚鄰近無辜數小村以怵之爽文因民怒遂作亂陷彰化淡水諸羅鳳山諸廳縣孫景燧俞峻等死焉爽文自稱盟主大元帥五十二年春柴大紀自往剿之累戰皆捷復諸羅諸羅爲臺府北障敵志在必得悉衆來攻大紀與城民固守亘半載不下詔改諸羅爲嘉義縣封大紀伯爵是年冬總督福康安及將軍海蘭察奉命赴援遂以十一月解嘉義之圍明年春擒殺爽文以下數十人臺灣復平同時與爽文先後擾亂臺地者前有乾隆三十年黃教之亂後有六十年陳周全之亂皆小醜率旬日卽滅不足錄

第十一章

苗族者太古時中國之舊民族也本繁殖於黃河揚子江流域間其後爲漢族所驅除退處於南嶺及橫斷山脉附近而蔓延於後印度半島其在中國境內者復有種種之異名在四川者謂之僰謂之生番在兩廣者謂之僮謂之黎在湖南貴州者謂之猺在雲南者謂之猡謂之野人語言風俗皆與漢族絕異中國之治之也亦常羈縻之仍其舊俗官其酋長故自元明以來有宣慰宣撫招討安撫長官等土司又有土府土州縣均世襲其職清初亦因其舊分設土官屬平西定南諸藩鎮撫之吳三桂之亂諸土司頗爲所用及事平朝廷不暇窮治而苗民不知耕作專以刦殺爲生土官又以積威苛斂虐使恣爲不法於是

禍患相尋亂端時起以貴州之苗族爲最强其餘雲南廣西四川各處苗寨亦皆叢雜遼闊復以疆界相錯地方官互相推諉苗族遂爲西南邊防之一大患雍正四年鄂爾泰總督雲貴倡建一勞永逸之策謂必改土歸流事權盡一然後可以安民可以治苗世宗贊之雍正六年詔授鄂爾泰爲雲貴廣西三省總督任征苗事鄂爾泰用遊擊哈元生總兵石禮哈知府張廣泗等先後征關苗疆二三千里幾當貴州全省之半諸土司皆相望繳勅印納軍械至雍正九年三省邊防鑑定鄂爾泰以功封伯爵召還入閣張廣泗亦由雲南巡撫移督湖廣繼任者皆易視其事官吏又以徵糧過急激之生變雍正十三年春貴州各苗寨復蠭起聚集清江台拱間陷黃平以東諸城副將馮茂復誘殺降苗六百餘人苗民益大忿至手刃妻女而後出戰詔以哈元生爲揚威將軍副以提督董芳會剿二人意見不合張照爲撫苗大臣又密奏改流非策且致書諸將倡棄地之議以致號令不一師久無功全局幾盡變至是乾隆帝卽位盡罷張照董芳哈元生等治罪而授張廣泗爲七省經略廣泗分道並舉所向克捷大破苗民於丹江古州都匀清江台拱間之大森林所謂牛皮大箐是也先後斬馘無算於是貴州之苗族悉平廣泗以功封三等輕車都尉世職越十年而又有四川之苗亂所謂大小金川之役是也金川爲四川西邊諸土司之一本吐蕃領地俗信喇嘛教居小金川者曰攢拉居大金川者曰促浸自順治康熙間先後授兩金川酋土司職俾

分領其衆康熙末大金川酋莎羅奔從征西藏有功雍正立授爲安撫使勢漸強盛至是謀兼并諸鄰部先以女妻小金川酋澤旺奪其印繼以兵力侵略打箭爐附近諸土司擊傷中國赴援之官軍乾隆十二年帝以張廣泗前征貴州苗有功命移督四川相機剿治廣泗用澤旺弟良爾吉爲嚮導銳意進討而大金川地險堅碉林立難攻十三年帝乃命訥親爲經略起故將軍岳鍾琪赴軍前效力訥親廣泗專取以碉固碉之策將士多傷亡軍氣大沮良爾吉又與其兄澤旺妻通莎羅奔女也密以官軍動靜報莎羅奔以致攻戰數月又無效帝乃改命傅恒爲經略廣泗訥親皆論死傅恒至軍首誅良爾吉閒諺以絕悉撤圍碉兵爲直擣中堅之計壁壘爲之一新十四年春帝以叢爾土司勞師兩載誅兩大臣意不樂將命班師而傅恒已與岳鍾琪分兵深入莎羅奔前從征西藏時曾隸岳鍾琪麾下素服岳鍾琪威德至是岳鍾琪單騎抵其巢莎羅奔大驚伏地請罪遂帥衆詣軍前是役也官軍不戰而奏凱旋皆岳鍾琪之功也詔封傅恒一等公復岳鍾琪三等公爵乃班師還未幾羅莎奔兒子郎卡代掌土司事會朝廷用兵西北不遑他顧郎卡遂復乘間與鄰部構釁勢漸猖獗三十一年帝令川督阿爾泰檄松岡梭磨卓克基沃日革布什哨綽斯甲布小金川黨瑞巴旺九土司環攻之時九土司中東以小金川西以綽斯甲布爲最强郎卡乃與二部締密約阿爾泰不能制會郎卡死小金川酋澤旺老病郎卡子索諾木又與澤旺子僧格桑

結爲攻守同盟之計三十六年兩金川遂各攻殺他土司與中國援兵開戰帝賜阿爾泰死以溫福桂林分代其職旋又以阿桂代桂林三十七年十二月官軍抵小金川僧格桑竄大金川帝欲一舉兩滅以溫福爲定邊將軍阿桂副之三十八年春溫福爲索諾木兵所襲陣歿全軍皆覆小金川復陷詔授阿桂定西將軍副以豐伸額明亮十月克小金川分兵三道進攻大金川索諾木懼於三十九年秋酈殺僧格桑獻其屍請緩師阿桂不許四十年八月大破大金川兵於勒烏圍而索諾木與其從祖莎羅奔已先期走噶爾崖十二月三路軍會攻於噶爾崖四十一年二月二酋帥衆降金川全境悉平阿桂以功封公爵詔以小金川爲美諾廳大金川爲阿爾古廳隸四川

自征服西南諸土司後中國與後印度半島諸國次第接近諸國中緬甸最强緬甸古朱波地自古不通中國宋時始見於史冊元時嘗往征責貢賦明時設三宣慰司以羈縻之然自萬曆二十二年朝貢久虛清康熙元年執送明桂王於吳三桂後亦不通朝貢至乾隆十五年始由茂隆銀廠廠長吳尙賢附表達雲南總督願充外藩曾其國有內亂吳尙賢亦以中飽廠課事下獄事又中止是時緬甸爲木疏十司雍籍牙所據諸土司皆相率降服惟桂家木邦二土司與之抗桂家者桂藩之遺裔前隨桂王入緬者也乾隆二十七年桂家土司宮裏雁爲雍籍牙子莽紀覺所敗竄滇邊爲內附計總督吳達善誘殺之木邦土

司亦兵敗走死於是緬酋無所忌矣故莽紀覺及其弟孟駁先後迭侵略諸土司至舉兵內犯總督又戒邊將母與戰緬人遂并輕中國大入寇清軍迭敗績總督劉藻自刎楊應琚逮問將軍明瑞領隊大臣觀音保等皆戰歿三十四年帝以傅恒爲經略阿里袞阿桂副之分兵水陸並進連戰又頗失利時緬人苦於暹羅之牽掣遂乞和會阿里袞死傅恒病諸將以兵多染瘴日有死亡亦爭請許和於是遣使往來訂和議約以進表納貢歸俘虜返侵地諸事迄不實行而總督使者又爲所拘留帝大怒復議興師會再征金川不暇討緬至是金川平帝乃遣阿桂往勘邊界增兵爲進攻計未幾緬甸內亂暹羅又受中國冊封於是緬人懼於乾隆二十五年遣使入貢五十五年復遣使祝萬壽朝廷因賜冊印封爲緬甸國王時緬酋爲雍籍牙季子孟雲也暹羅在緬甸東南故隋唐時赤土國也後分爲暹與羅斛二國元時暹國爲羅斛所併稱曰暹羅斛國明時更號暹羅朝貢不絕清康熙時受中國封貢使頻至與緬爲世仇其國王因信任外族流寓故國民不親附常有內亂康雍間有希臘人孔士坦丁在暹羅最爲暹羅國王所信任暹羅國王因之乞法王路易十四爲保護法遣兵赴暹羅爲暹羅國民所逐并殺孔士坦丁緬酋雍籍牙子孟駁乘機攻陷其國都會緬與清開戰漢人鄭昭方寓暹羅起兵爲暹羅復讎遂緬兵建新暹羅國時乾隆三十四年也鄭昭以流寓漢族居然擴張殖民地於南洋而爲其國王蓋亦偉矣惜僅十餘年其告捷

之使未達於京師而昭已又爲暹羅貴族所廢於是前朝王族法亞查克利以乾隆四十七年即王位遣使通貢於中國朝廷因冊封之卽今暹羅王室之始祖也安南在暹羅之東古交趾地也明永樂時嘗爲中國所滅置交趾布政司以統治之明宣德時有黎利者起兵自建爲大越國嘉靖時又有莫登庸崛起與黎氏並立分爲南北朝萬曆時莫氏又爲黎氏將鄭松所逐有阮潢者又自立爲廣南王於是安南復分爲大越廣南二國至清康熙五年大越王黎維禧遣使入貢朝廷封爲安南國王乾隆三十八年廣南土豪阮文岳與其弟文惠文慮起兵覆廣南分其地爲三部文岳據中部稱大帝文慮居南部文惠居北部乾隆五十三年文惠復舉兵滅安南安南嗣王黎維祁出亡民間其遺臣阮輝宿扈王族二百餘人自廣西龍州附近入邊帝以黎氏奉貢守藩者百餘年乃安置其家屬於南寧命兩廣總督孫士毅出兵征安南不閱月而恢復安南國都東京承旨封黎維祁爲安南國王檄廣西歸其家屬明年阮文惠復襲據安南帝改命福康安代孫士毅征安南文惠以其兄文岳方與暹羅搆兵恐中國再舉乃更名光平遣使奉表詣關乞降帝以維祁再失國乃天厭黎氏不堪扶植遂因封阮光平爲安南國王編置維祁家屬於漢軍旗授佐領福康安旣定安南乃移兵西征廓爾喀廓爾喀本巴勒布國舊分葉楞布額庫木三部於雍正九年各奏金葉表文貢方物後悉併爲廓爾喀與後藏鄰是時後藏六世班禪喇嘛入都祝萬壽病

痘卒京師遺骨西歸擁貲昆鉅兄弟爭奪廓爾喀乘機侵入後藏并舉兵內犯中國帝命福康安往征之乾隆五十七年六月福康安由青海入後藏連破廓爾喀屯兵盡復藏地分兵三道侵入泥泊爾六戰皆捷距廓爾喀國都加德滿僅一日程福康安軍自以爲必獲全勝頗驕滿至八月突爲敵所乘大敗護軍統領以下陣歿者十餘人時聞廓爾喀南鄰披楞與廓爾喀有夙讐福康安急檄披楞相與夾攻廓爾喀廓爾喀大震恐乃再遣使請和與盟而還增留番漢蒙古兵戍藏是爲官兵駐藏之始

第十二章

帝於戰功備極隆尙每克一敵下一城必告成孔林獻俘午門奏捷於宗廟及太后宮懋典隆儀彬彬具舉又建紫光閣圖繪蕩平準部回部金川諸功臣像於其上以媲美前代麒麟雲臺凌煙諸閣晚年又御製十全記詔繙寫滿漢蒙番四體書勒石樹碑昭垂久遠十全者謂兩定金川兩平準噶爾兩勝廓爾喀一勘回部一滅臺灣一綏緬甸一服安南也或曰是時武功雖多大率得自然之勝利藉以宣揚國威恢張領土皆天也非戰之效也而帝善鋪張揚厲追蹤漢唐居然一喜四海春一怒四海秋矣然自是朝野上下傲然自大積習相沿蔑視外族至釀成異日之種種失敗者亦復不少此由於中國向來閉關自守不知外國之地勢情形不通外國之語言文字謬自尊崇以中國爲天朝外國之來我中國皆爲朝貢使

也觀其與俄英之交涉其氣象可想而知矣俄自康熙二十八年締結尼布楚條約以後東北邊境之紛議漸泯未幾喀爾喀三汗內附中國北境與俄領西伯利亞之交涉事繁於是中俄互市之間題以起康熙末俄使貢國書至京請改商約中國惟與俄使鑿鑿爭覲見禮節強使行叩跪禮於其所請則置之不答俄使不得已屈從之察知中國無議約意徒手而返雍正三年俄皇彼得崩女帝加他鄰第一立五年復遣使來申前請且欲會議蒙古西伯利亞國界詔以郡王策凌內大臣四格侍郎圖理琛爲議約使與俄公使薩瓦會議於後貝加爾州之布拉河地方是年八月約成所謂恰克圖條約是也亦稱布拉條約約凡七條一兩國邊吏當互查彼此逃人捕送本國但逃亡在和約以前者勿論二以恰克圖爲兩國通商之地自額爾古納河岸至齊克泰奇蘭以楚庫河爲界自此以西以博木沙畢鼐爲界各立界標誌之三以烏特河地方爲兩國中立地彼此不得侵佔四俄國商人得三年一至北京貿易但人數以二百名爲限留京不得過八十日往來當由官定之路徑不能迂道他往違者沒收貨物五京師俄羅斯館聽嗣後俄人來京者居住俄公使欲於京師建會堂中國當予以補助聽俄國教徒居住教徒得依本國例規於堂內讀經禮拜六遞送公文者來往當由恰克圖七兩國邊界各置頭目秉公辦理一切此條約得兩國政府批准後兩國文書往來均不以皇帝名中國以理藩院俄國以薩那特衙門彼此貿易及國交之

端緒遂日漸繁密矣至是乾隆二年忽停止北京之貿易令統歸恰克圖二十七年設庫倫辦事大臣凡中俄文牘必經其手二十九年又以俄人私收貨稅及兩國邊民偷竊馬匹事閉恰克圖市場三十三年庫倫大臣以俄人悔罪請開市入告准開市如初其後四十四年五十年復以他細故閉關者再五十七年庫倫大臣松筠等又以俄人恭順乞恩入請乃復與增訂市約在恰克圖買賣城互換約凡五條一恰克圖互市於中國初無利益大皇帝普愛衆生不忍爾國小民困苦又因爾薩那特衙門籲請是以允行若復失和罔再希冀開市二中國與爾國貨物原係兩國商人自行定價爾國商人應由爾國嚴加管束彼此貿易貢物交易後各令不爽約期即時歸結勿令負火致啟爭端三今爾國守邊官皆恭順知禮我遊牧官羣相稱好爾從前守邊官皆能如此又何致兩次妄行失和以致絕市乎嗣後爾守邊官當慎選賢能與我遊牧官遜順相接四恰克圖以四十數卡倫爾之布哩雅特哈哩雅特不法故致有烏呼勒咱之事今爾國當嚴加禁束杜其盜竊五此次通市一切仍照舊章已頒行爾薩那特衙門矣兩邊民人交涉事件如盜賊人命各就近查驗緝獲罪犯會同邊界官員審訊明確後本處屬下人由本處治罪爾處屬下人由爾處治罪各行文知照示衆其盜竊之物或一倍或幾倍罰賠一切皆照舊例辦理是時俄人以閉關七年之故損失不少急欲回復市利故此次交涉極臻和平而松筠等則以俄人感激皇仁倍申

誠敬等語列款具奏其夸飾若是而恰克圖之約較之尼布楚之約平地失去烏特河等地方數百里迭次增修而毫不知覺何其愚也英自康熙十九年通商中國二十三年在廣州建設商館後以廣州稅額繁重不及寧波之輕欲舍粵而就浙至是乾隆二十年英人與諸國商船聚泊於浙海有且衆二十二年乃令更定浙海稅則視粵海加重以爲限制洋商之計英人氣沮至二十四年英商洪任輝自寧波赴天津以廣東貿易之困難哀訴中國政府語侵粵海關監督中國政府遣員按問卒坐洪任輝以妄控之罪錮之澳門附近獄中久之始赦歸四十九年又有英船在廣州黃埔者以舉放祝砲裝置不慎誤殺一華人地方官遽捕砲手處以死刑英政府聞之亟謀改良兩國之交涉乃以五十七年遣正使伯爵馬戛爾尼副使斯當東等入中國要求駐員京師建設商館貿易寧波天津居留粵浙海島以及減輕稅額任聽傳教等件並不爲祝帝壽來也中國官吏認英爲朝貢之國以英使臣爲祝嘏而至循例予以旗章題曰英國貢船強使立之及至京師政府又循例強使於覲見時行叩頭之禮馬戛爾尼等恐以此等小節損失感情妨礙商利勉循入觀以所要求諸款向政府提議帝以荒遠不識天朝禮制妄行乞請無足深責一方賜使臣筵宴優加賞賚以盡懷柔之意一方則勅諭英王盛稱天朝威德於英政府所要求者駁斥無遺付使臣遣之而馬戛爾尼等惘然而去眞所謂天威不可窺測也然其驕誕之狀況亦不過十全武功之慣態而已

第十三章

是時文治亦稱極盛自聖祖獎勵經術文學之士一時學者至起帝於乾隆元年亦循康熙間故事詔開第二次博學弘儒科避帝御名改曰博學鴻詞科初取得劉綸等十五人明年續取得萬松齡等四人各授以翰林院官十四年詔舉經學得吳鼎等四人並授國子監司業車駕所至又輒召諸生試詩賦與以科目出身如巡江浙得王昶等八十五人巡山東得黃道熙等十七人巡天津得姚文田等十六人幸五台得龍汝言等九人又開陽城馬周科得人之盛視康熙時又或過之時又編纂巨籍上自經注史乘下至音樂方術語學之屬如三禮義疏明史通鑑輯覽清通典通志通考律呂正義一統志圖書集成等書無慮數十種比康熙間所出版者尤倍多焉復開四庫全書館網羅古今已刊未刊之書勒成一部以紀购爲總纂官延攬海內績學之士如戴震邵晉涵姚鼐朱筠王念孫任大椿等三百餘人參與校勘內典書十三年每進一書輒爲提要冠諸卷首又別爲簡明目錄綜計四庫全書存書三千四百五十七部七萬九千七十卷存目六千七百六十六部九萬三千五百五十六卷書成建文淵閣於北京紫禁城文源閣於世宗爲皇子時讀書之圓明園文溯閣於奉天陪都文津閣於塞外熱河爲貯藏之所此謂內廷四

閣尋又以江浙兩省爲全國文學之苑囿乃命建文匯閣於江蘇揚州之大觀堂文宗閣於鎮江金山寺文瀾閣於浙江杭州聖因寺之行宮亦各藏四庫全書一部聽學者閱覽抄錄此謂江浙三閣帝曰我國家荷承休命重熙累洽同軌同文所謂禮樂百年而後興此其時也嗚呼帝之稽古右文三代下襄以加矣或曰是時文學雖優其所取大率純尙虛聲無裨實用又復銷磨天下之士氣使畢精瘁神於吟哦品藻中雖爲唐後取士之通病而帝益變本而加厲焉觀其改博學弘儒科爲博學鴻詞科其宗旨可知矣帝又頻頻親自製詩令廷臣賡和巡幸所至到處留題一時相習寔成風尙梁元帝隋煬帝之遺也何足道哉其搜集遺書未嘗非提倡學術之根本然我聞紀昀嘗以帝巡遊無度從容爲帝言東南財力竭矣上當思所以救濟之帝怒叱之曰朕以汝文學尙優故使領四庫書館實不過以俳優畜之汝何敢妄談國事嗚呼帝之愛文士皆以俳優畜之也雖然文人之見輕於世古今皆然豈獨帝之於紀昀已哉我又聞自順治康熙雍正乾隆以來文字之獄迭起往往一言之侵一字之疑罪及枯骨禍連子孫順治二年有黃毓祺之獄毓祺自明亡匿迹於通州法寶寺爲鳳陽巡撫陳之龍所獲搜其詩詞謂欲復明錮死獄中並云錢謙益曾留毓祺宿且許助資招兵逮訊無據會首告謙益之盛名儒匿不赴質得釋康熙二年有莊廷鑨之獄初明相國朱國楨嘗著明史稿藏於家國變後家中落質其稿於廷鑨廷鑨爲補崇禎朝

事語多指斥清因竄入己名將刊行會卒無子其父胤城哀之爲之戒其事歸安知縣吳之勞索賄不遂首告之廷鑨戮屍其父胤城弟廷鉞皆立斬書中列名及官吏失察與刊刻收藏者凡七十餘人皆坐死婦女皆給邊序中所稱舊史朱氏者指國楨也嫁其禍於南潯富人朱佑明亦坐斬并殺其五子康熙二十五年有戴名世之獄初桐城方孝標嘗著演黔紀聞頗觸忌諱戴名世南山集採錄之又與其門人余生書謂以弘光之帝南京隆武之帝閩越永曆之帝兩粵與滇黔應如昭烈之在蜀帝昺之在厓今史家避諱萬端終明之世三百年無史豈不可歎事聞名世寸磔族皆棄市孝標戮屍其子孫皆斬余生瘐死獄中方苞方正玉尤雲鏗劉巖等因連獲譴者三百餘人是時又有江南人沈天甫等撰忠義錄語多忌諱詭稱故明黃尊素等所作吳甡爲之序持向甡子元萊索詐事聞皆棄市又有楚人朱方旦著中說補立說頗新異具出世法又發明腦之功用其徒顧弘齊陸光旭翟鳳彩等互相標榜比之宣聖事發皆被誅又有鄒流騎以刊刻吳偉業所著鹿樵紀聞逮治幾死又有陳鷗年著有重游虎邱詩總督噶禮挾宿讎按句旁注而奏之謂其語含誹謗幸帝察知其誣免究雍正三年有汪景祺之獄景祺作西征隨筆中有詩頗譏訕聖祖又爲年羹堯作功臣不可爲論事聞以大逆不道誅妻子期親并戍黑龍江寧古塔等處五服以內族人皆斥革拘管雍正四年有錢名世之獄因名世曾作詩稱頌年羹堯平藏功德革職發

回原籍並書名教罪人扁額令地方官張掛其居宅雍正五年有查嗣庭之獄嗣庭典試江西時以維民所止命題許者謂維止二字乃取雍正斬首之意或曰維止係嗣庭所著之書名也中記世宗宮廷事頗詳又搜其日記中於聖祖用人行政有譏評語遂逮問死於獄判屍梟示子亦坐死家屬流放並以汪景祺查嗣庭二人皆浙江人之故詔停浙省鄉會試是年又有鄒汝魯之獄因汝魯進河清頌有舊染維新風移俗易語謂其語近譏訕革職發遣雍正七年有謝濟世陸生柵之獄濟世以劾田文鏡得罪發軍前効力注大學謗及程朱坐以借抒怨望擬斬旋免死令充當苦差生柵以與濟世有連坐遭戍著通鑑論十七篇中論君主有云人雖怒之而不敢洩欲報之而不敢輕其蓄既深其發必毒詔謂罪大惡極命在軍前正法雍正八年有徐駿之獄駿在翰林上書言事於陛下之陞字誤書作狴帝怒其蠶率立斥放歸又檢其詩集內有清風不識字何得亂翻書及明月有情還顧我清風無意不留人等句指爲譏訕命正法雍正十年有呂留良曾靜之獄留良爲明末大儒學者稱爲晚村先生清初嘗以博學弘儒及山林隱逸薦誓死不就至雍髮爲僧至是靜見留良所評時文中論夷夏之防及井田封建等語好而求其書留良子毅中悉以父遺書授之靜讀之益傾服日與留良弟子嚴鴻達及鴻達弟子沈在寬等遊時傳川陝總督岳鍾琪自以爲宋岳飛後與金世仇清爲金裔將謀報復靜遺其徒張熙貽書勸岳鍾琪反鍾琪

以聞命逮入都廷訊以靜猶祇訕及帝身而留良則上誣聖祖靜尙誤聽流言而留良則出自胸臆留良之罪遠出靜上詔戮留良及其長子葆中其徒嚴鴻達屍留良次子毅中及鴻達之徒沈在寬皆立斬悉盡誅其族私淑呂氏之黃補庵與刻呂氏集之車鼎豐車鼎賁藏呂氏書之孫用克周敬輿設祠奉祀呂留良之朱振基王奇助等亦皆坐死連坐發給爲奴者二十三家曾靜張熙特邀赦典免死歸田里至乾隆卽位仍令殺之呂留良曾靜之獄世宗又以曾靜供詞及御駿呂晚村學說合而刊之名曰大義覺迷錄頒示天下世宗崩乾隆卽位詔各直省繳還頒發大義覺迷錄原書論者謂二帝各自有深心也雍正時又有裘璉少時曾戲擬張良招四皓書訖者摭其詞以入告謂諷聖祖易儲爲廢太子胤礎而作逮治死獄中又有某試官以論語或問禘之說一章命題帝以禘作示旁帝解指諸掌作謹科多掌中詔解謂刺帝登極事伏誅或曰其人爲鄧東岳又帝嘗微服游於市中入一書肆翻閱書籍於時微風拂拂吹書葉上下不止一書生忽高吟徐駿清風不識字何得亂翻書之句帝聞之以爲有意譏刺下詔殺之乾隆十九年有世臣之獄以世臣詩稿中有霜侵鬢朽歎途窮及秋色招人憊上朝半輪明月西沈夜應照長安爾我家等句帝謂其自擬於蘇軾黃州之謫且世臣身爲侍郎有何途窮之歎乃遣戍於黑龍江乾隆二十年有胡中藻之獄乾隆初鄂爾泰張廷玉同輔政二人互相傾軋各立門戶中藻爲爾泰門生與爾

泰從子鄂昌等相倡和著有堅磨生詩鈔帝謂堅磨出自魯論乃指佛肸而言中藻以此自號是誠何心
又中藻督廣西時試題有乾三爻不象龍說帝謂龍同音乾隆爲朕年號顯存譏諷並挑剔其詩句謂
有意詆毀又以鄂昌本滿人其所作塞上吟乃稱蒙古爲胡兒沾染漢人習氣與中藻同逮問中藻凌遲
家屬皆坐斬賜鄂昌死並撤鄂爾泰出賢良祠乾隆二十一年有彭家屏段昌緒之獄昌緒家中存有吳
三桂檄文得自司存成淑信兄弟昌緒爲之濃圈密點家屏家藏有明季野史數種又所刻族譜曰大
彭統紀自謂爲黃帝之裔其命名曰大彭與累朝國號同一稱謂譜中凡遇明神宗年號於帝御名皆不
闕筆謂其目無君上家屏賜死昌緒坐斬並置存成淑信於重典乾隆三十一年有齊赤若之獄赤若以
呂留良黨遺戍歸刻其書巡撫熊學鵬以聞並誣原任侍郎齊召南爲徇隱逆詞詔磔赤若落召南職乾
隆四十二年有王錫侯之獄以錫侯刪改康熙字典另刻字貫其序文凡例將聖祖世宗及帝御名開列
逮獄論死自巡撫以下均獲失察咎革職乾隆四十三年有徐述夔之獄以述夔所著一柱樓詩有詠正
德杯云大明天子重相見且把壺兒擋半邊帝謂壺兒即胡兒又有明朝期振翮一舉去清都之句帝謂
其顯有欲興明朝去清朝之意命與其子懷祖俱戮屍孫食田食書及校對餘首髮沈成灌等俱坐死是
年又有沈德潛之獄德潛予告歸帝以己所著詩集委之改訂頗多刪潤德潛死調其詩集進呈則平時

爲帝點竄及捉力之作咸錄焉帝大恚命革去官謚撤出賢良祠撲毀所賜祭葬碑文等又閱其詠黑牡
丹詩有奪朱非正色異種也稱王之句指爲逆詞令剖棺剉屍乾隆四十四年有智天豹之獄帝謁陵回
京師天豹使其徒張九霄於道傍呈獻大清天定運數一本中編大清天號三十餘條而於乾隆年號僅
及五十七年而止又於聖祖廟諱直書不諱命天豹立斬九霄斬監候乾隆四十六年有尹嘉淦之獄帝
自五臺山還至保定府嘉淦使其子齎表赴行在爲其父會一請謚且乞從祀孔廟帝謂其狂妄交刑部
治罪隨據部查出嘉淦所著各書中多狂悖語坐絞立決此外又有擇詞不精引用失當爲人告訐因而
獲罪者如程明禋爲人作壽序有創大業等字論斬王爾揚爲李範作墓志於考字上用皇字逮治章玉
振刻其父行述有於佃之貧者赦不追等語下獄蔡顯爲人題小照詩謂其語近隱刺伏誅全祖望著皇
雅篇敘述清世祖得天下之正也許者謂內有爲我討賊清乾坤之句冠賊字於清字之上悖逆不道餘
亦多有微辭獲譴幸大學士某爲之解釋始得免若此之類尙不可勝數嗚呼百年之內大獄數十文人
何辜乃遭此厄當順治康熙雍正間天下初定人心未一故老遺臣尙在人間爲人主者慮死灰之復燃
而乃故施雷霆不測之威亦或出於勢之不得已也至乾隆時海內無事人民無復有繫戀舊君之思而
猶毛舉細故株連滿庭於是比附妖言告訐詩文之事紛然而起曹一士嘗疏論之曰比年以來小人不

識朝廷誅殛大憝之故往往挾睚眦之怨借影響之辭攻訐詩書指摘字句有司見事生風多方窮贊或致波累師生牽連親故破家亡命甚可憫也臣愚以井田封建不過迂儒之常談不可以爲生今反古述懷詠史不過詞人之習態不可以爲援古刺今即有序跋偶遺紀年亦或草茅一時失檢非必果懷悖逆敢於明布篇章使以此類悉皆比附妖言罪當不赦將使天下告訐不休士子以文爲戒殊非國家義以正法仁以包蒙之意觀此則當時文禁之森嚴冤獄之繁興概可知也我聞是時有投匱告訐誣人作詩觸犯忌諱於刑部衙門者司官將白於堂官移訊之有主事某見之曰此乃唐人辭達所作之開元後樂大抵言天寶亂後事有何觸犯於時諱而移訊之耶事乃已嗚呼告訐風起何奇不有羅織而及於千餘年前之文獄伊誰使之然歟且此時禁書之令又復厲行明代遺老著述文章凡有關於史乘者盡令燬滅無遺不必論矣他如謝濟世之梅莊雜著錢謙益之初學集有學集屈大均之翁山詩文集金堡之徧行堂集陳建之喜逢春傳奇等書亦悉搜剔不少餘力自乾隆三十九年至四十七年據兵部所報天下銷燬之書都五百三十八種一萬三千八百六十二部帝猶以爲未足至乾隆五十七年尙嚴諭遵行中

有云江蘇浙江江西等省素稱文人淵藪民間書籍繁多所以不能禁絕者皆由督撫等視爲等閒耳嗚呼帝旣蒐集古今之遺籍而又嚴申文字之禁下燬書之令俾天下學者爲之束筆此秦皇李斯之所以

流毒萬世貽譏千古而帝悍然爲之而不顧吾不知其所謂獎勵文學者果何如哉

第十四章

雖然帝亦可謂好學能文者矣我聞帝御製詩至十餘萬首所作之多爲陸放翁所不及常自誇其博雅每一詩成使儒臣解釋不能即答者許其歸家涉獵往往有翻閱萬卷而不得其解者帝乃舉其出處以爲笑樂帝又善書酷愛董其昌字與聖祖相似爲當時書家所傾倒或謂其書法雖妙似少氣魄尙不如聖祖之有骨力世宗之有才氣也帝無事不欲追蹤聖祖不獨獎勵文學與恢張武功爲然聖祖康熙六十一年召滿漢文武諸臣及致仕人員年六十五以上六百八十人宴於乾清宮前名曰千叟晏帝亦於乾隆五十年詔開千叟宴自王大臣至蒙古貝勒貝子公台吉額駕回部番部朝鮮使臣暨士商兵民等年六十以上者凡三千人聖祖時南巡江浙北巡塞外帝亦循其舊例南巡者六東巡者七西巡者五至於盛京興京近畿之天津保定熱河河南車駕時出紀不勝紀蓋臨御六十年中每當春和巡幸東南秋畋木蘭無虛歲或曰聖祖南巡爲治黃河乾隆時南服無事雖車駕所過亦嘗謁孔林祭岱廟減租稅增學額優禮耆年召試文學典禮不可不謂優矣然其供需之侈驛騷之繁將十倍於康熙時勞財傷民耗剝元氣當時廷臣亦多諫諍者然一經抗論輒嚴譴隨之如編修杭世駿疏論時事中有謂巡幸所至有

司一意奉承其流弊皆及於百姓帝大怒命置重典賴侍郎觀保諫免赦歸田里尹會一視學江蘇還奏言上兩次南巡民間疾苦怨聲載道帝嚴諭詰之曰汝謂民間疾苦試指出何人疾苦怨聲載道試指出何人怨言坐謫戍內大臣博爾奔察從帝至蒼石先是沿途連設避暑山莊七十二處圈地數十里雜植時花分置亭榭所費約億萬計帝四顧茂林修竹綠草如茵清風習習幾不如盛暑之將至顧而樂之謂奔察曰此真無愧避暑山莊也奔察曰陛下就宮內言之耳若外間城市狹隘房屋低小人民皆蠣處其中兼之戶籠銜接炎熱實甚故民間有諺曰皇帝之莊真避暑百姓仍是熱河也帝大怒揮之出爲之不怡者累日或曰奔察幸而爲滿臣尙不至遭禍若漢人則罕有獲免者自是朝臣皆相與結舌吞聲無復有爲民請命者矣我聞帝南巡六次合之普免天下之錢糧四次免七省之錢糧二次數達二十餘萬兩東巡西巡之費尙不在內是時府庫充溢經聖祖世宗兩朝所經營雖極帝一時之揮霍而又加以軍需之浩博歷代無其比用於大小金川者七千餘萬兩用於新疆者二千餘萬兩用於緬甸者九百餘萬兩用於臺灣者八百餘萬兩用於廓爾喀西藏者又不下一千萬兩統計前後軍費額先是各省大小武職俱有虛額名糧帝命將此項歸入養廉另行挑補實額當時大學士公阿桂輒奏

爭謂國家經費驟加如不覺其多歲支則難爲繼此項經費歲增三百萬統計二十餘年即須七千餘萬兩請除陝甘四川滇黔諸省外其餘腹地均可毋庸挑補實額帝不從於是舉康熙以來綠營兵額之不足者悉數挑補一舉而添兵六萬有奇歲添新餉三百萬兩其府藏之豐盛可知矣卒之帝後數十年果如阿桂所云至屢議裁減兵額而國庫日絀不能以節養或謂清異日衰敝之原因皆帝有以貽之其言不爲無見矣總之帝性好夸飾事事皆欲突過前人而適滋流弊此則帝一生得失之大關鍵也

追

清史要略

第三編 衰弱時期

第一章

瑞安陳懷孟冲編輯

乾隆帝在位六十年當帝踐阼之初嘗焚香告天若得在位六十年卽當傳位嗣子不敢上同聖祖康熙紀元六十一年之數嗣於乾隆元年以次子永璉循用世宗雍正初年成式書名密置於乾清宮越二年病殤贈爲端慧太子尋欲以七子永琮繼貯幼未果行又早世謚曰悼乾隆三十八年冬至祀南郊始以十五子顥琰名昭告上帝並默禱如所定嗣子不克負荷卽降之罰使其夭折俾得再簡元良延宗祚是日復遣詣盛京祀陵隱然以神器攸歸面稽於祖也至是乾隆六十年九月御勤政殿立皇十五子嘉親王顥琰爲皇太子明年元旦御太和殿親授寶璽傳位於皇太子爲皇帝改元嘉慶自爲太上皇帝上皇雖歸政凡遇軍國大事及用人行政諸大端仍躬親指教時嘉慶帝年已三十有七矣事事皆稟承太上皇之命而行而心甚慊太上皇寵相和珅之爲人珅本滿洲官學生應役鑾儀衛昇御轎一日乾隆帝車駕將發倉卒求黃蓋不得帝曰是誰之過歟各員皆瞠目相向不知所措珅從旁僥言曰典守者不得辭其責帝見其儀度俊雅聲音清亮乃曰汝輩之中安得有此自是得倅寵之門一躍而爲侍衛擢爲副

都統遷侍郎充總管累遷尙書拜大學士長軍機封公爵子豐紳殷德尙公主寵任之專一時無兩珅故無學行惟攬權聚歛是圖疆吏以下畏其勢皆輦貨事之如國泰王亶望陳輝祖福崧伍拉納浦霖等職欵動及數十百萬之多皆恃珅爲奧援珅又往往僭擬乘輿服物外省貢品優者先入其第次乃以供內府漸至風示各省章奏先具副封白軍機處然後上聞專政既久吏風益壞人民遂相率思亂始則山東王倫繼則甘肅田五終則川楚之白蓮教珅復稽壓軍報虛張功級濫叨封爵且於核算報銷時勒索重賄以致軍餉尅扣教匪滋蔓論者謂清自乾隆以後由隆盛而轉爲衰弱嘗敗壞於珅一人之手非酷論也當嘉慶帝正儲位未宣諭之先珅密知之於先一日呈遞如意於嘉慶帝以示由已擁戴之意嘉慶帝輒深知其姦宄嘉慶帝卽位珅日侍太上皇左右見太上皇耄荒倦勤騎恣益甚嘉慶帝外示優崇至呼爲相公而不名遇有奏事太上皇者皆令珅代奏之而內相猜忌隱忍容納不露圭角珅自乾隆中葉以後擅權二十餘年罪惡昭著無一人敢彈劾者大臣中如嵇璜元勳上公如阿桂亦僅稍能持正而已其他中外諸官如錢澧謝振定曹錫寶武億洪亮吉等雖各與之忤卒亦未敢直劾其身宣布其罪至嘉慶四年正月太上皇崩壽八十有九謚曰純皇帝廟號高宗高宗崩翌日御史廣興廣泰給事中王念孫等交章劾珅方爲總理得意甚越三日奪職下獄尋宣布其二十大罪賜自盡以戶部尙書福長安扶同

徇隱亦坐死後釋之珅之得罪抄沒贓賄凡百有九號已占值者二十六號計銀二億二千三百八十九萬餘兩未估值者尙有八十三號或謂又當八億兩有奇以二十年之宰相所蓄當一國二十年歲入之半額而強其貪黷可知矣珅雖伏誅而珅所激釀之白蓮教匪已徧布於西北各省而不可收拾白蓮教一名清茶門其始當元順帝時有樂城韓山童者卽以其祖父所創之白蓮教誘惑人民自謂彌勒降生故又稱曰彌勒教江淮間之愚民多信之託名宋裔謀反被擒其子林兒逃據亳州國號宋明起乃亡明天啟時又漸起於山東山西陝西四川直隸河南等省其首爲蘇州王森得妖狐之異香自稱聞香教主被捕死獄中其徒徐鴻儒等繼之謀反山東自稱中興福烈帝尋敗磔於京師白蓮教又亡至清乾隆時其教又起教主爲安徽劉松被捕戍甘肅其徒劉之清以河南麻邑童兒王發生詭稱明後朱姓謀起兵覆清事覺之清伏誅發生年幼免死之協遠遁官吏大索株連無辜奸民乘間煽動於是聶傑人張正謨等起荊州姚之富齊林妻王氏等起襄陽孫士鳳徐天德冷天祿等起四川張士龍張洪潮張天倫等起陝西蔓延達五行省皆以官逼民反爲詞時朝廷方苦征剿苗匪貴州則石柳鄧湖南則石三保吳半生吳隴登吳八月等八月雖未久就獲其子廷義廷禮仍負嵎自固而軍機大臣和珅又諱敗爲勝故亂匪益多至是嘉慶四年苗事始大定而教匪愈張甚其教假持齋治病爲名僞造經咒畫像惑衆歛

財起於荆宜而漸及於襄陽熾於川陝而至於甘肅以秦楚間之老林爲窟穴以鄂豫間之鄧州新野爲門戶朝廷雖屢出師征剿而匪旋撲旋起氣燄益盛帝知賊匪之所以日衆大率由地方官之橫求無藝民不聊生激而從賊爰改易方略下哀痛之詔開自新之路行堅壁清野之策定兵勇並重之例除滿漢異同之見用德楞泰洪亮吉等之言也由是教匪次第漸平襄賊齊王氏姚之富等最先亡川賊王三槐滅以額勒登保楊遇春楊芳三人之功爲多時嘉慶八年七月也是役也閱時歷九載糜費達二億所殺亂民數十萬而官兵鄉勇之死亡五省官民之遭難者尙不知凡幾國家元氣耗傷殆盡我聞是時賊匪四起到處殺僇官長署爲民賊惟南充知縣劉清平日大得民心賊亦不敢犯至呼爲劉青天所謂古之循吏者非歟教匪旣滅未幾而又有陝西寧陝新兵之變亦賴楊遇春楊芳往援芳單騎入營曉諭變兵始乞降歸伍而帝反以縱兵釀變罪楊芳戍伊犁聞者冤之尋赦回而四川綏定陝西西鄉亦迭起兵變雖不旋踵而皆定亦足見人心之不平矣是時閩粵海賊亦乘閒大起先是安南阮光平以兵力得國乏財招納亡命令劫商舶以佐國用內地奸民附之遂深入閩浙海疆有鳳尾帮水澳帮諸名目爲定海總兵李長庚所破至是其餘黨蔡牽起閩海朱𣸣起粵海勢甚盛牽犯定海時長庚爲浙江提督造霆船攻

牽幾獲之牽走降閩督玉德遁去合朱𣸣由臺灣入閩海又爲長庚兵所敗牽與長庚同鄉里素畏長庚故一蹙於定海北漁山再敗於臺灣南鹿耳門旦夕得以奏凱而先後閩督玉德阿林保皆忌長庚功或以軍符牽掣之或則密疏中傷之使長庚卒以十二年冬戰歿於黑水洋惜哉牽復與𣸣合游弋浙海尋潰爲閩軍轟斃牽亦於嘉慶十五年八月爲長庚部將邱良功王得祿所追於漁山外洋敗舉礮自裂其船沉於海而死餘黨先後出降海賊悉平不數年又有天理教之亂天理教者白蓮教之緒餘也自嘉慶八年白蓮教滅後其餘黨四散分而爲八卦榮華紅陽白陽諸教天理教卽八卦教之改名黨徒尤衆徧傳於畿南燕豫齊魯諸區而以滑縣李文成大興林清爲之魁文成黨數萬清善內侍密邇宮禁內外勾通先是十六年夏星見占主兵教黨中人謂應在十八年九月望日午時清運告終文成遂與林清謀是時車駕幸木蘭可舉兵據京師謀定中外莫之知也滑縣知縣強克捷微聞之捕文成下獄斷其脰其黨泊不及待期遂於九月七日起兵陷滑縣殺克捷出文成於獄直隸山東等處同時響應帝命陝甘總督那彥成爲欽差大臣直隸總督溫承惠提督馬瑜河南山東巡撫高杞同興等俱受節制又命陝西提督楊遇春來直隸協剿此始事之發見於京南也不旋踵而禁門之變又作是林清結大監劉金劉得財王福祿閻進喜等爲內應分攻東西華門皇次子綿寧聞變急發兵禦之殲其徒黨時帝狩熱河倉猝還宮

林清在黃村待援兵不至被擒而文成猶據滑號召直隸山東諸黨數省督撫皆按兵不敢發賴那彥成楊遇春楊芳劉清等馳往追擊文成於司寨山文成縱火自焚死天理教又平同時有陝西南山木商夫役罷工掠食焚木箱之事旋即滅其後十九年有江西民胡秉輝等擁一朱氏子假託明裔建號後明徧發僞札謀逆二十二年有臨安邊外夷民高羅衣等聚衆劫掠江外土司窺伺邊郡二十三年羅衣從子老五又僭稱王號渡江薄臨安府皆以地方官覺察甚早掩捕較速得不致釀成大亂嗚呼清自世祖開基經聖祖六十一年之建設以寬大培國脉世宗十三年之整飭以嚴峻戢官邪蔚成高宗六十年太平之治四夷賓服逾康熙版輿生齒倍雍正何其盛也詎知其身未死而各省之叛亂四起幸而嗣皇帝材畧不凡雖非英明神武之君其亦可謂守文之中主矣而僅能削平禍亂國勢卒因以衰弱不復振履霜堅冰由來者漸繫誰之過歟當天理教匪變未發生之先於嘉慶八年閏二月二十日帝進宮齋戒將入順貞門有內務府厨役成德徑前行刺變起肘腋猝不及防幸賴固倫額駙喀爾喀親王拉旺多爾濟從侍左右立擒之下廷訊究主使不肯供但云若事成則公等所坐之處卽我之坐處而已帝不欲興大獄卽命以凌遲處死其二子祿兒對兒一年十六年十四並磔殺之迄不知爲何人所使也越十年林清變起後山東金鄉縣知縣吳堦捕獲林清黨崔士俊始知成德卽林清黨山東巡撫以事屬旣往刪不入

奏其案遂爲千古之疑獄云

第二章

是時承和珅亂政以後吏治腐壞將卒驕惰賄賂公行上下蒙蔽我聞有建昌道石作瑞者侵蝕帑銀至五十餘萬兩皆爲餽送長官之需其延諸將帥會飲多在深箐荒麓之一席之費輒至三四百金賞賜優伶犒賚僕從不與焉總督福康安初至任作瑞饋珍珠三斛蜀錦一萬匹他物稱是其贈遺之奢侈爲古今所罕聞一時貪婪之風大率類是帝雖極意整飭如絞殺廣興胡齊嵩褫革汪志伊王紹蘭等案而錮習已成不可挽救且河務大興國家糜帑無算官吏則視爲利薮其奢縱尤甚如是則民安有不叛國安有不衰此內政之所以日壞也至於外交之狀況朝廷內苦教匪海賊之騷亂深以宗教迷信與海上貿易爲致亂召寇之媒以是對於歐人通商布教之事亦排斥限制惟恐不力先是基督教之在中國自康熙時已嘗極盛一時全國信徒不下十餘萬中更雍正乾隆兩朝政府嚴禁異教凡外國布教師非以學術列仕籍者不得留滯境內犯禁者率處禁錮或誅殛之刑而彼等百折不撓往來傳播自若及白蓮教禍作彼等益被異端邪說之嫌疑於是嘉慶十年御史蔡維鈺奏請嚴禁西洋人刻書傳教會廣東民陳若望私代西洋人德天賜遞送書信地圖至山西事發下刑部嚴鞫德天賜坐禁錮熱河厄魯特營房

若望及其他滿漢人民任教會會長者悉發遣伊犁給厄魯特爲奴凡教會所刊漢譯經卷三十一種並檢查銷毀嗣後地方官視基督教徒殆與叛逆同科至二十年而湖南官吏又於永陽縣地方訪獲西洋人蘭月旺者遂以夷人潛入內地遠歷數省收徒傳教煽惑多人等辭處以絞決之罪至是而國初以來風靡一時之天主教幾無容足之地矣西人在中國通商亦已爲百餘年來之成局至是會英人與法國失和法帝拿破崙頒布大陸條例禁歐洲各國與英人通商葡萄牙梗命法遣兵併其地英人恐法并奪澳門於嘉慶十三年遣海將度路利率戰艦十三艘進舶香山雞頭洋旋以三艘入黃浦並有三板船入省河以防禦法蘭西保護中英葡貿易爲詞且願與中國協勦海賊以其意作書投粵督遂登岸分兵守住澳門礮臺朝廷恐其將實行占領之策飭粵督吳熊光嚴詞拒絕且封禁水路以絕其糧食英人苦之啟碇引還印度自是英國兵艦輒違舊制出入虎門至嘉慶十九年粵督蔣攸銛奏定防閑五策一嚴禁民人私爲夷人服役一洋行不得用歐式建築一店號不得用夷字一清查商欠一內地民人不得私住夷館並得旨允行英人以乾隆時浙江之貿易既不得遂其請願近來廣東之貿易又受種種之籍束乃於嘉慶二十一年復遣使臣司當冬等來中國詣闕陳訴使臣不遵成例於粵岸收泊徑駛至天津海口登岸及入京又以覲見禮節之紛議臨時稱病而出彼並非爲覲見而來也朝廷自以爲天下之共主英

使如此倨傲侮慢荒謬無理嚴旨斥逐回國並寄勅諭英皇一書備責使臣之不合是時英廷無一人通解華文者故皮之未嘗啟視也而此次英使司當冬等又與乾隆時之馬戛爾尼等同一不解所謂悵悵而去於是中英之邦交感情日失潛伏無形之禍機於不覺中有識者於此早有隱憂焉

第三章

帝在位二十五年帝承高宗後亦每歲幸木蘭行秋獮禮嘉慶二十五年七月帝駐蹕避暑山庄亦將舉秋獮之典在途感暘暑不豫崩於行在壽六十有一謚曰睿皇帝廟號仁宗先是嘉慶四年帝以皇次子綿寧名遵用世宗密建之法諱置於乾清宮嘉慶十八年禁門之變綿寧又以功封智親王至是扈從熱河奉遺詔即皇帝位更名旻寧以明年爲道光元年是時亂事滋繁其大者爲天山之回部湖廣之猺民是當乾隆朝之平定天山南路也回酋大和卓木波羅泥都之子薩木克亡命浩罕其第二子張格爾驥桀得回衆心中國官吏治回疆者如南路參贊斌靜等類需索財物廣漁回女回民大憤張格爾乘機於嘉慶二十五年襲攻喀什噶爾近邊領隊大臣色普徵額不能制帝即位知色普徵額斌靜不勝辦賊任且或別有他故乃命伊犁將軍慶祥往勘果得斌靜貪淫諸罪狀詔逮問代以永芹道光五年領隊大臣巴彥克圖又縱殺布魯特婦孺百餘人西四城回衆大亂巴彥克圖全軍陷沒詔以長齡代慶祥守伊犁

而以慶祥代永芹視師喀什噶爾張格爾乞援於浩罕得安集延兵安集延兵驚惶善戰時有百回兵不如一安集延之語六年夏張格爾浩罕先後以兵至官軍大敗喀什噶爾陷慶祥死之於是葉爾羌和闐英吉沙爾三城亦同時失陷先是朝廷遣陝甘總督楊遇春山東巡撫武隆阿分領陝甘及東三省兵出關以長齡爲揚威將軍節制之期會軍阿克蘇軍未集而西四城已陷敵且近逼阿克蘇烏什庫車均戒嚴賴阿克蘇辦事大臣長清以少數兵擊之兩戰皆捷及十月而大兵集阿克蘇東四城始恃以保全七年春長齡楊遇春武隆阿同進勦累戰悉勝薄喀什噶爾諸城盡復時張格爾已先遁楊遇春欲急追之長齡不從僅獲張格爾之甥姪以聞帝嚴旨切責令尅期擒賊遇春及楊芳乃分道追捕遇春屯色勒庫芳軍至阿賴嶺遇浩罕兵亡失甚衆帝以道遠糧絕議罷兵長齡疏言乾隆中故回酋阿布都哈里及其族在京旗若使歸主喀什噶爾和闐葉爾羌英吉沙爾西四城而我軍專力守喀喇沙爾庫車阿克蘇烏什東四城庶永遠無邊患帝憤長齡老怯與贊成此議之武隆阿均獲譴仍令相機偵賊務獲乃止而別遣直隸總督那彥成以欽差大臣赴回疆代長齡策善後張格爾本白山黨領袖其據喀什噶爾時虐殺黑山黨徒頗衆以故黑山黨多陰通官軍者芳因密遣黑山黨出邊縱反聞言官兵盡撤喀什噶爾空虛日夜翹首以望和卓木張格爾信之以是年十二月杪潛入阿爾古城覺所聞不實折奔出邊楊芳追擊

至喀爾銖蓋山斬餘騎殆盡遂擒張格爾八年正月捷報聞於朝帝效康熙乾隆間故事獻俘午門勒碑太學封長齡楊芳等公侯爵有差張格爾之就擒也長齡檄浩罕布哈爾等國獻張格爾家屬浩罕不從帝亦知其必不能致姑任之惟諭那彥成楊芳等嚴守邊境絕浩罕貿易以困之於是那彥成馳逐浩罕商民出邊且沒收其財產斷離其眷屬浩罕曾摩訶末阿利怒迎張格爾兄摩訶末玉素普至以道光十一年八月大舉侵邊幫辦大臣塔斯哈全軍盡沒喀什噶爾英吉沙爾葉爾羌諸回莊皆被奪包圍諸城變聞帝命楊遇春楊芳長齡等調兵赴援褫那彥成職會浩罕與布哈爾失和將治軍相攻不暇東逞解圍歸玉素普又故慈善不好殺亦引軍西還十一年冬浩罕遣使請和歷述七十餘年通商之舊好請復修改互市條約朝廷許之互還俘虜許其通市免稅並給還前抄沒浩罕人資產浩罕自互市後連年與布哈爾構兵摩訶末阿利以道光二十二年戰敗死其族庫達雅爾嗣位國內悍徒復思嗾張格爾子弟起復讐之師於是和卓木加他漢等七人募集同志連合布魯特部以道光二十七年春入寇邊是年十一月伊犁兵赴援始敗去是謂七和卓木之亂蓋自張格爾之役至此天山南路蒙兵禍者已三次矣嗚呼自是役之後中國兵威不復能及葱嶺以西浩罕之約既許通市復許免稅又將前所抄沒之貲產一律給還始則視爲外藩茲則居然敵國讓步至此極矣欲復如康熙乾隆時武功之盛安可得哉

猺爲苗族之一種所居皆山峒自成村落湖南衡永郴桂四郡界與廣東之連州廣西之全州均跨五嶺之脊與漢民雜處而不與漢民交通漢民每欺之黨連官役以肆其虐待凡遇訴訟官吏亦皆左袒漢民以抑猺猺之積怨於漢民久矣道光十一年楚粵間有奸民創立天地會亦稱添弟會屢刦奪猺寨之牲糧天地會奸民類通官吏猺民無所告愬於是湖南江華縣錦田鄉猺趙金龍以復讐煽衆令常寧縣猺趙福才糾廣東散猺三百餘合湖南九沖猺都六七百人以紅巾裹首爲號焚掠兩河口殺會黨二十一餘人江華知縣林先梁等往捕毀其巢格殺男婦十四生擒猺卒五餘均竄人江華之藍山所至誘脅積衆達三千餘圖據九疑山爲巢窟敗參將成喜兵遂旁擾寧遠湖南提督海凌阿往勦猺佯爲夫役昇兵械及行抵山谷隘處伏兵四起槍械皆爲所奪於是海凌阿全軍盡覆猺勢益披猖衆號數萬分三路犄角出沒時朝廷已命湖南巡撫盧坤湖北提督羅思舉貴州提督余步雲會兵赴勦續又命戶部尙書禧恩盛京將軍瑚松額馳往勦辦而禧恩瑚松額與盧坤羅思舉等意見不合羅思舉建議由新田遏猺南竄與桂陽北路兵夾攻并扼其西通道州零陵桂陽小路於是三路猺皆東竄常寧逼歸一路失其翻山長技與詔旨相符乃密檄北路兵齊赴又移各守隘兵進逼合圍殲猺六千人金龍中鎗死會禧恩瑚松額抵衡州忌盧羅等先奏功詰趙金龍死狀虛實思舉舉其尸及所佩劍印以上乃已而猺黨趙子青等

尙據麻崗聲言爲金龍復仇盧坤余步雲又往剿獲子青餘衆悉就戮廣東連州八排猺又起滋事襲敗官軍禧恩馳疏中傷粵督李鴻賓革職戍邊而已代其位旋又以盧坤補授禧恩聞盧坤將至又急欲邀功苦猺峒天險不易攻乃遣人賂猺說降會獲黃瓜寨附近猺人遂潦草歲事倖叨封賞而悉委善後事宜於盧坤時道光十二年八月也盧坤又續平廣東曲江乳源兩縣亂猺至十六年又有湖南武岡州猺藍正樽等之亂爲湖南巡撫訥爾經額等所破二十七年又有湖南新寧猺雷再浩等之亂爲廣西巡撫鄭祖琛等所破二十九年又有廣西五排猺李沅發等之亂爲湖南提督向榮等所破猺亂始一律肅清嗚呼猺族以太古愚民糾烏合之衆而朝廷竭三省之兵力以剿之旋滅旋起前後經二十年而始獲底定國家之元氣損傷兵機大起不可遏抑未幾而太平軍起於廣西金田村矣

自餘雲南有永北廳夷人唐老大等之亂河南有新蔡敎匪朱麻子等之亂廣東有黎人韋色容等之亂山西有趙城敎匪曹順等之亂湖北有崇陽縣民鍾人杰等之亂湖南有耒陽縣民陽大鵬等之亂四川有果洛克番及越巂峨邊夷人桑樹格等之亂臺灣有黃文潤陳辦洪協等之亂雖皆不旋踵而即平然而盜賊滿天下人孰不欲身家性命豈肯甘心爲盜賊而作亂大率苦於官吏之敲剝而無所聊生不得已而出於萬死一生之途是誰之咎歟

第四章

自康熙以迄嘉慶中國對於歐洲各國之邦交自視何等尊崇無一非我中國之朝貢國也至是而英國以鴉片貿易之紛議生意外之變乃至以兵力相見於是重門洞開西力東漸一日千里吁何其暴也鴉片舊爲藥品產於印度華言爲阿芙蓉唐貞元時阿刺比亞商人以鶯粟輸入中國卽鴉片也明萬曆間列入關稅表中是則鴉片貿易之通行於我中國由來已久明季以來民間漸有用以吸食者雍正朝曾嚴布禁令乾隆初輸額亦尙不多猶以葡萄牙人爲主至乾隆中葉以後其特權握於英吉利於是輸額日增吸食之害亦日甚嘉慶初又嚴旨厲禁而沿海官吏貪利納賄聽其自由輸入迄至道光中葉輸額比嘉慶季年又幾增至五倍之多於是內閣學士朱嶟給事中許球御史朱成烈鴻臚寺卿黃爵滋等先後奏請嚴塞漏卮湖廣總督林則徐覆奏語尤剝切至謂鴉片不速行禁絕則國日貧民日弱數十年後豈惟無可籌之餉抑且無可用之兵偉哉斯言也帝大感動卽命林則徐爲欽差大臣馳驛赴粵實行杜絕鴉片貿易之策時道光十八年也明年則徐至廣東盡焚英國鴉片之在澳門者計二萬二百八十三箱值金六百餘萬並絕英人薪蔬食物且令退出澳門並波及美法荷諸國商人朝廷又乘是下詔停止英吉利貿易先是英政府之意務主和平英領事甲必丹義律亦欲以平和政策恢復商利一反前貿易

監督官律勞卑羅頻孫等之所爲母輕失中國之感情至是亦不能忍遂以兵艦攻澳門不得逞轉而攻福建又爲閩督鄧廷楨所敗遣使調停請仍許英商回居澳門則徐復嚴斥不許乃更攻浙江陷定海乍浦等處旋北攻天津入大沽復投書請和要求六款一償還貨價二開放廣州廈門福州定海上海爲商埠三兩國交際用平等禮四賠償軍需五不得以夾帶鴉片累及居留英商六盡裁華人經手洋商經費天津道陸建瀛議請先決廢止貿易鴉片之事倘英人承諾則許以免稅代第一款以開放澳門代第二款以海關監督與之平行代第三款其餘令回廣東與則徐定議是時中國承平日久沿海空虛諸文武大臣懼禍及皆不悅則徐所爲遂各造蜚語上聞中傷則徐當事者不知所措亦欲加罪則徐以謝英人於英人所請一切不答覆遂命兩江總督伊里布赴浙與英人議休戰以大學士直隸總督琦善爲欽差大臣赴粵查辦褫則徐職大局爲之一變時爲道光二十年明年琦善至粵悉反林則徐所爲恐和議之不速成也先撤海防以媚英人徐議許償鴉片價歸英俘開放廣州割讓香港等事草約雖成會英兵已攻陷虎門外大角沙角等礮臺帝大怒命御前大臣奔山爲靖逆將軍提督楊芳尚書隆文爲參贊大臣赴廣東調江督裕謙爲欽差大臣赴浙江飭伊里布回江督任奪琦善大學士職大局又爲之一變英人以和議中變又益兵攻陷虎門礮臺提督關天培戰死各要隘大礮三百餘門並則徐前所購西洋礮二

百餘門盡被奪英兵乘勝深入盡扼珠江咽喉楊芳至東手無策然是時英軍雖所向披靡而各國商船以停市日久損失甚鉅皆以英人所爲爲太激於是美法兩國商人出而調停楊芳據以入奏朝廷初欲拒絕會英兵又連攻陷廣州城西北之天字礮臺及泥城港與北山頂各礮臺奔山等屢次失利廣州危在旦夕大局又爲之一變遂以道光二十一年四月先定停戰條約凡四條一將軍等允於煙價外先償英國軍費六百萬元限五日內交付一將軍及外省兵退屯城外六十里地一以香港之割讓爲未定問題俟後日協商一英軍退出虎門和議既定奔山等以此六百萬之償金議由藩運海關三庫擔認四百萬廣州行商擔認二百萬於是粵民大憤有三元里民萬餘樹平英團之旗職以與英人爲難義律陷重圍不得出知府余保純往解之挾義律出圍至償金交畢英軍撤去廣州卽促將軍等離城奔山退屯金山飾詞入告謂英人窮蹙乞撫請准照舊通商帝亦微聞之不之詰也尋以廣東兵政廢弛臨事無實用追論歷任總督罪並遣則徐戍伊犁論者謂當與英人齟齬初起時廷寄則徐訓旨有不患卿孟浪但戒卿不可畏葸等語至是反坐以決裂遣戍萬餘里外蓋欲以謝英人也時人皆冤之雖然則徐赤心謀國祛毒強民固自有先見之明但狃於尊大之習不諳外情操之過急致貽中國後世無窮之禍君子援春秋之義蓋亦不能無責備於賢者焉然帝始力主之繼而悔之終則罪之與漢景帝斬鼃錯以謝七國古

今同出一轍不亦大可慨乎英兵旣退出虎門以二十年所索六款及香港割讓之約未得中國政府之決答不肯罷兵復移兵北進會伯麥新自印度續調戰艦來粵遂與義律兵合以六月同發遇颶風破其坐船頗有損傷粵督祁塏遂鋪張入告謂獲神祐撞碎洋船漂沒洋兵無數浮尸蔽海朝廷方發藏香謝海神允廣東保舉守城文武至數百員而英遣大使璞鼎查海軍少將巴爾克突至遂使其將臥烏古巴爾克率軍艦九艘汽船四艘運送船二十三艘以七月進迫廈門陷之尋復棄去僅占鼓浪嶼進兵攻浙江再陷定海總兵葛雲飛王錫朋鄭國鴻皆戰死並陷鎮海督師裕謙自殺又陷甯波而慈谿餘姚居民亦皆逃散一空事聞帝又主戰乃命大學士奕經爲揚威將軍率兵往浙江謀恢復又以廣東巡撫怡良爲欽差大臣移駐福建調河南巡撫牛鑑總督兩江分任南北沿海防務師或潰或死均寡效乍浦再陷寶山上海鎮江亦皆相繼失守一時驍將如陳化成海齡等皆殲焉英兵逼江寧帝大恐意又變改用浙江巡撫劉韻珂言力主和議以尙書耆英爲欽差大臣署杭州將軍起伊里布赴浙效力會同兩江總督牛鑑籌商議和事尋以英人謂耆英等未得全權委任拒不與議並任耆英伊里布牛鑑爲全權大臣是時英人兵勢旣盛要索遂多耆英等以事急一切應之爰於道光廿二年七月締結中英修好條約於江寧所謂南京條約是也約之要項凡八條一中英兩國將來當維持平和二中國政府向英政府納軍費

一千二百萬圓商欠三百萬圓鴉片賠償六百萬圓共二千一百萬圓限一千八百四十五年歲末清付三開廣州廈門福州寧波上海五港許英人通商及居住且一切不課關稅四以香港之主權讓與英政府五放還英人之爲俘虜者六戰役中爲英軍服役之華人一律免罪七將來兩國往復之文書用平行款式八條約得皇帝批准償金交付六百萬圓之後英軍當自當時所占領之長江沿岸等地撤兵惟舟山及鼓浪嶼在條約實行之前仍由英軍占領英艦遂於是月出江寧盡調碇泊長江之艦隊還屯定海南京之約由耆英等主持於外穆彰阿等力贊於內敗辱伊始一蹶遂不能復振庸臣誤國豈淺鮮哉先是兩國戰爭中英艦兩過臺灣一於道光二十一年八月在淡水港遭風觸礁一於二十二年二月在大安港擗淺皆爲臺灣義勇所捕計白人二十四黑人百六十五礮二十門軍械甚衆總兵達洪阿兵備道姚瑩飛章奏捷賞達洪阿太子少保姚瑩二品頂戴會南京條約成兩國常交還俘虜達洪阿等遽將黑人百六十五名盡行槍斃僅遺白人等還英艦英使璞鼎查乃以鎮道虐殺難民冒功捏奏徧訴江浙閩粵四省大吏督令上聞帝命閩督怡良渡臺查辦至二十三年春逮達洪阿姚瑩等下刑部獄幸帝知其枉革職不深咎是獄也論者皆謂由於軍機大臣穆彰阿之指授及欽差大臣耆英與閩督怡良等之媚嫉人莫不以爲冤至咸豐元年奉特旨昭雪中外始翕然稱頌焉是年夏五月南京條約既得兩國皇帝

之批准詔命廣州將軍耆英與英國全權公使於香港交換條約秋耆英又於虎門與英人續訂補遺條約十七條以爲南京條約之附錄自是美利堅法蘭西亦各援英之成例於明年夏秋先後締結中美及中法條約中外之條約由此日繁外人之勢力由此日張中國之主權由此日替沿海之土地由此日削而鴉片之禁令遂公然開弛吸食販賣之弊風不啻爲國家法律所默許矣

第五章

是時歐美文明日見進步而我國學人猶大率豐蔀自喜幾若中國外輒不復有天地者雖間有一二卓識之徒如阮元之著天象賦疇人傳魏源之著海國圖志徐繼畲之著瀛寰志略等然皆爲世所非笑而帝又深信大學士曹振鏞振鏞柄政專伺人主意旨又復拘牽文義毛舉瑕疵以箝制天下之人心會帝倦於大政厭言官之多事振鏞爲帝言曰今天下承平臣工好作危言指陳闕失以邀時譽若遽罪之則蒙拒諫之名惟有抉摘其細故之外謬者交部嚴議則臣下震於聖明以爲察及秋毫自莫敢或縱帝從之嗣後凡遇章奏如有疑誤無論鉅細輒譴責由是中外惶悚皆矜矜自持不復有敢言者又自乾嘉以前臺閣書體雖稱整齊然尙多稚氣碑帖古字時見層出詩亦有拗體者而振鏞奉命衡文字則專搜點畫詩則泥黏平仄不問文章之工拙若有破體帖字平仄失調者皆置下第海內承風士習因以闡葺臘

慨無生氣論者謂一時吏治日墮學風日替民俗日壞民生日困內外兵禍紛至沓出開千古未有之變局皆振鏞一人有以造而成之庸人誤國甚於凶人其言亦不爲過矣帝晚年又偏任穆彰阿穆彰阿之閭庸無識怙勢攬權不減和坤當時有大學士王鼎者憤激自盡效史魚之尸諫帝卒爲所蒙蔽而毫不加疑帝之昏憒亦可知矣然聞帝生平服用之儉爲史冊所罕聞其小節蓋亦有足稱焉帝在位三十年道光三十年正月帝疾大漸召諸王大臣宣不秘諱立皇四子奕詝爲皇太子頃之帝輒崩壽六十有九謚曰成皇帝廟號宣宗皇太子奕詝卽帝位以明年爲咸豐元年初宣宗最鍾愛皇六子奕訢欲立爲皇太子金合緘名時書奕訢名者數矣以皇四子奕詝齒居長無失德故遂巡未決一日命諸皇子校獵南苑皇四子師傅杜受田語皇四子曰今日圍場中但坐觀他人騎射弗發一鎗一矢並約束從人弗捕一生物復命時祇言時方春和鳥獸孕育不忍傷生命以干天和且不欲以弓馬一日之長與諸弟競爭也是日皇六子所得鳥獸最多顧盼自豪皇四子一無所獻宣宗詢之具如杜受田所教以對宣宗大悅曰是眞有君人之度者儲位遂定受田其爲帝之吳質歟故帝甫即位卽以受田入內閣受田雖無大才識然其爲人謹篤敏學愛惜人才如疏薦林則徐周天爵及保全向榮等大節較然天下頗覩其效或謂清十帝之文學以咸豐帝爲最優亦多得受田啟沃之力帝初即位朝野延頸企踵以望治以帝能斥

穆彰阿耆英累詔求直言通民隱起廢員興賢能文瑞倭仁羅惇衍曾國藩諸廷臣先後應詔論列時政並優旨褒答其先朝緣事降革者若林則徐周天爵等以時論所推亦皆相繼被召而罷廢之太常卿唐鑑亦屢徵召入都覲見一時名臣輩出如曾國藩胡林翼江忠源羅澤南左宗棠李鴻章等如雲而至以曾國藩爲尤契帝心雖以祁雋藻翁心存兩大學士之觭乾齋雋藻至謂國藩以匹夫居鄉里一呼而從者萬餘人恐非國家福而主志終不爲搖奪故雖太平軍大起而卒收得人之效以樹戡亂之本亦未嘗非明主也或曰大學士文慶在內閣時時左右國藩嘗密請破滅滿漢藩籬不拘用人資格滿員中有此識解非所謂鐵中錚錚者歟然不知尤以肅順之功爲最鉅肅順在當時驕恣暴戾人莫不切齒以痛罵之如咸豐八年順天科場一案通榜關節原係嘉道以來積習擇尤懲治誰曰不宜何必羅織株連故爲已甚自考官以及士子斬絞軍流降革者數十人不過因忌柏葰一人藉端以誅鋤之而已其好殺專橫大率類是無怪當時有羅網漫天斯文掃地之語嗚呼慎重制科法律嚴峻亦清廷家法然也昔在順治二年河南鄉試四年會試十一年順天鄉試十四年順天江南河南山東山西鄉試以及康熙三十八年順天鄉試五十年江南鄉試嘉慶三年湖南鄉試道光十七年順天鄉試等科屢興大獄衡文獲咎者不可勝數其最稱冤者爲康熙三十八年順天鄉試副考官編修姜宸英逮死獄中滿朝臣僚

莫不以爲冤刑部尙書王士禎至有我爲刑官令妻宸英以非罪死何以謝天下之語由此觀之則清代科場之案大率駢首就戮從未比附輕典非獨咸豐八年一案已也肅順但對滿人如是至對漢人乃極意搜羅人才汲汲不可終日或引爲羽翼或倚爲腹心如匡源陳孚恩高心夔輩皆爲肅順所素心折者至曾國藩胡林翼等之握兵柄肅順尤力主之肅順常與人言曰滿族中無一人可用者國家遇有大疑難事非重用漢人不可聞其受賄也亦惟待滿人爲然若漢人之一絲一粟迄不敢受故滿人深惡恨之嗚呼肅順以宗室之滿族何乃揚漢而抑滿若是異哉然帝自咸豐八九年以後見時局之大亂恐難收拾林則徐既道卒向榮與周天爵烏蘭泰諸將帥又復齟齬不相能軍事日紊戰氛徧地帝遂早已荒怠政事溺情聲色前後若出兩人然其無毅力若是最可慨者咸豐九年帝壽三旬是時東南大局已土崩瓦解兵連禍結而帝猶引歷朝聖壽開科之成例因而頒恩詔開慶榜咸豐十年英法聯軍逼京師帝倉卒幸熱河間關奔走之餘亦猶御行殿受朝賀作樂宣表賞賚近支親藩等大宴其殆陳叔寶絕無心肝者歟帝旣惑於聲色遂多疾病日飲鹿血以療之咸豐十一年七月帝在熱河痰疾大作復患暑濕倉卒求鹿不得可疾遂增劇急召宗人府宗令怡親王載垣右宗正鄭親王端華御前大臣肅順景壽軍機大臣穆蔭匡源杜翰焦祐瀛八人至避暑山莊行宮受顧命立皇長子載淳爲皇太子並諭以八人爲贊襄

政務王大臣翌日帝遂崩春秋三十有一在位十一年謚曰顯皇帝廟號文宗諸臣請皇太子即正尊位擬明年爲祺祥元年爲載垣等所議也尊皇后鈕祜祿氏及生母懿貴妃那拉氏均爲皇太后時雖以兩后並尊而仍微示區別皇后稱母后皇太后貴妃稱聖母皇太后援明萬曆朝故事也那拉后不悅尋改上太后徽號曰慈安皇太后生母太后徽號曰慈禧皇太后並諭嗣後詔書奏牘皆以慈安慈禧並稱不復有母后聖母之別矣是時有御史董元醇者疏言皇上冲齡未能親政暫請皇太后垂簾聽政並派近支親王一二輔政疏入太后召見贊襄王大臣命照所奏行載垣等抗論以爲不可有臣等奉遺詔贊襄皇上不能聽命於太后等語退復以本朝家法禁母后臨朝令軍機處設還時恭親王奕訢已至熱河太后將召見杜翰復言恭王於太后嫂叔不通問太后居喪尤宜遠嫌後奕訢設計得見太后太后慮載垣等專恣與奕訢密謀誅之召鴻臚少卿曹毓英密擬摺問各旨以備到京之日即發表奕訢還京啟行後太后亦卽下詔奉大行皇帝梓宮回京師命肅順護送梓宮載垣等扈蹕先從閏道行於是大學士賈楨周祖培尙書沈兆霖趙光等合疏請太后垂簾旣豫督師內閣學士勝保亦奏請簡近支親王輔政太后旣至京師卽下詔授恭親王奕訢爲議政親王及大學士桂良尙書沈兆霖侍郎文祥寶鋆鴻臚少卿曹毓英並爲軍機大臣解載垣等八人贊襄王大臣職暴其罪狀並降旨摺問奕訢捧詔宣示畢卽命

侍衛執載垣端華二人擁至宗人府幽之時肅順方密雲亦逮至京旋賜載垣端華自盡棄肅順於市景壽穆蔭匡源杜翰焦祐瀛俱革職嚴治黨援尙書陳孚恩等皆獲罪有差自是垂簾之局以定皇太子始行即位禮於太和殿改明年爲同治元年年方六齡奉兩宮皇太后御養心殿垂簾聽政慈安居宮東所之綏履殿慈禧居宮西所之平安室世於是又有東太后西太后之稱載垣端華肅順三人世皆稱爲咸豐朝之三奸文宗之娛志聲色皆肅順輩有以導之也賀襄之詔亦爲肅順輩所矯誣嗚呼載垣端華實皆庸懦無能一任肅順之所爲肅順平日專權自恣殺人無算怨者刺骨肅順之罪亦固不容逭矣然必以導淫矯詔爲肅順等之罪狀或者那拉后欲垂簾擅權怒肅順諸人之沮格故爲鍛鍊成獄以致之死地歟欲加之罪何患無辭厥後太平軍等之殲滅實皆肅順輩重用漢人之力有以遺之也

第六章

清自咸豐同治以來外交日敗內亂日繁有識者於此早知清之必將亡矣是時外交之禍最烈者爲英法其次爲俄其次爲日本

英法與美自道光二十二二十四等年先後在南京澳門黃埔訂立條約中國許以五口通商英人於道光二十六年來粵請踐約會廣州紳民自三元里決戰後與英人有積怨合詞訴諸大府請毋許英人入

城粵督耆英知與條約不合置而不答紳民遂傳檄遠近自起團練駿與官爲仇英人又執條約來責讓耆英不得已與期二年後以緩之乃自謀內用屆期耆英果已內召改授徐廣縉爲兩廣總督而以葉名琛爲廣東巡撫道光二十九年英人以兵艦圍粵河申前約廣縉等密召諸鄉團練兵十餘萬以禦之衆志一心呼聲洶洶動天地英人懼香港總督文翰乞更定商約毋入城朝廷大悅封廣縉子爵名琛男爵風示天下咸豐二年廣縉移督湖廣名琛坐遷總督俄拜大學士益自負凡遇交涉事輒嚴詞峻拒或竟置不答會英香港新任總督包冷廣東領事巴夏禮亦皆憤懣負氣與名琛積不相能日夜思搆釁適東莞會匪圍廣州按察使沈棣輝督官紳兵練力戰却之名琛格不上其功兵練皆解體棣輝憂死而悍民從賊者紛紛投英籍賊首關鉅梁楫等獻策巴夏禮請攻廣東巴夏禮猶以師出無名爲慮咸豐六年九月會有亞羅船者自外海入粵河桅張英旗而所載皆華民巡河千總見之疑爲奸民託英籍自護者遽登艇大索拔其旗械繫舟子十三人以獲匪報巴夏禮大恚移文詰名琛責以具狀謝罪名琛怒命錮十三人於獄中顧絕不爲戰備於是英艦大攻黃浦礮臺而巴夏禮尙請入城面議名琛夙以雪大恥尊國體爲言慮既見受辱拒不許巴夏禮復請於城外擇地爲會場又不許是年十月朔英兵遂攻陷省城兵少旋退初非爲入城計特藉以威嚇耳粵民見英軍退爭起爲暴動縱火焚英人洋樓并及美法各商

館十三家洋行亦同時被燬於是巴夏禮一面與法美聯合一面馳書英政府請增兵宣戰而巨禍以起
名琛既不講交鄰之道與諸國聯絡又不審諸國之虛實強弱謀所以應之徒狃前功蓄矜氣好大言故
終至於敗咸豐七年九月英使額爾金率軍艦抵香港貽書名琛請約期會議償欵重訂約章名琛斥其
狂悖置不復法美領事亦移文責償損失且願居中調停復不聽英法同盟軍遂以是年十一月逼廣州
先是朝廷密戒名琛當保持和平毋信浮言輕開釁端名琛夷然不以措意至是事迫省中諸大吏皆相
率就名琛商戰守名琛迷亂語謂過十五日必無事矣仍傲然不爲備同盟軍竟以十二日遣六千人登
陸十三日據海珠礮臺併力攻城十四日陷廣州名琛倉皇走匿英人括督署財賄及藩庫銀二十萬兩
劫將軍巡撫都統等大搜名琛卒以二十二日得之挾以登舟送至印度加爾各答越年餘病死嗚呼名
琛真妄人也鬼神之說虛謬無憑稍有識者靡不知其爲誣也名琛以其父志銑好扶乩名琛爲建長春
仙館祀呂洞賓李太白二仙一切軍機進止咸取決焉其敗不亦宜乎但以使相之尊爲俘虜之賤是則
歷史之污點中國之奇辱也名琛被虜朝廷以侍郎黃宗漢代爲兩廣總督英法兵旣得廣州迫中國政
府改訂約章酌給償金增開商埠相約在上海待命久不得復乃決議北行復連同美俄兩國兵陸續發
上海向天津咸豐八年三月齊集白河口四月初突入大沽口陷礮臺詔命科爾沁親王僧格林沁馳赴

天津京師戒嚴英人雖踞礮臺仍欲修好俄美諸國居間排解朝廷因派大學士桂良尙書花沙納赴天
津議款又賞已革大學士耆英侍郎銜飭令赴津耆英往拜英使不見懼而還津帝震怒賜自盡桂良等
至津英人出所訂新例五十六條其中最重要者一增開牛莊登州臺灣潮州瓊州等處又於長江一帶
許選擇三口一洋人得帶眷屬在京師長行居住一議償商虧軍費各二百萬兩清款後交出粵城法人
所定四十二條與英略同軍費賠款則減英人之半朝廷皆曲從其請和約旣定四國兵艦同時起碇出
天津適粵東練兵銜英人懸賞購巴夏禮首英人復藉端乞撤回黃宗漢解散粵民團桂良等亦一一曲
從之事駿駿就緒矣而僧格林沁至天津憤和議之辦理過柔咎海疆之先事無備首劾直隸總督譚廷
襄罪旋卽調馬隊購巨礮經營防務甚備咸豐九年夏各國赴天津換約告以大沽口設防令改由北塘
口進英將額爾金弟卜魯士領軍艦不從遽於五月二十四日駛入大沽且狃於往歲之無備開礮轟擊
中國礮臺兵還擊沈英艦數艘殺登岸英兵數百領隊官亦傷股殞僅餘一艘逸出沿途測量旅順威海
等各要口而去朝廷方動色相慶謂外事可有轉機識者皆知英必大報復而朝廷恃勝而驕欲盡改八
年原約又命撤北塘之備退保大沽北塘紳士御史陳鴻翊密疏言非計不聽編修郭嵩燾時在僧格林
沁幕亦力爭之亦不聽嵩燾遂辭去咸豐十年六月英將額爾金法將噶羅率兵卽由北塘登岸始陷內

港新河繼陷大沽礮臺等據天津擾及河西務進薄張家灣奉詔勤王之副都統勝保迎戰不勝奔潰僧格林沁與大學士瑞麟防通州兩軍皆退至京城外文宗奔熱河於八月八日啟行鄭親王端華尚書肅順軍機大臣穆蔭匡源杜翰等從命恭親王奕訢留守京師仍督僧瑞二軍駐師海淀詔設總理各國事務衙門專司外國交涉事宜時和議復起怡親王載垣赴通州與巴夏禮議不合遽密令僧格林沁誘擒巴夏禮解京拘於刑部獄英人大憤奮力攻城甚急索還巴夏禮或請殺之衆不敢決時議論蠭起或請召南軍曾國藩胡林翼等入援或欲往西秦遷鼎正紛擾間敵兵已攻海淀破之爰釋巴夏禮巴夏禮出欲洩忿遂縱火焚燒圓明園三日夜不絕盡掠園中所有珍物而去或曰內閣中書龔自珍之子龔橙導之也圓明園者明武清侯李偉清華園舊址清康熙間修之改名暢春園後於園中闢地築室賜雍邸命名圓明雍正三年乃大宮殿朝署之規以避暑聽政乾隆中又大事修飾增置離宮別館列景四十所費不計億萬歷雍正乾隆嘉慶道光百餘年每歲皆以夏首幸園冬初還宮咸豐改元粵中兵起文宗傷禍亂恒夜分痛哭繼乃託詞抑解縱情聲色廣集漢女於園中分居亭館有四春之寵所謂杏花春武陵春牡丹春海棠春是也合之那拉氏所居之天地一家春號曰五春至是被燬一空悉成焦土矣英法兵益聲言攻禁城旋以俄使居中調停再訂和約先予鈔款五十萬兩巴夏禮額爾金等各陳兵仗至禮部訂

約六十五條於八年原定外英續增九條償銀一千二百萬兩法亦續增十條償銀六百萬兩割九龍之半予英增開天津牛莊烟臺九江漢口潮州瓊州臺灣爲商埠許西人傳教遊歷內地并互遣公使駐京城時咸豐十年九月也是役也皆誤於僧格林沁始則狃於小勝不肯換約以致英法之再來中則輕視強敵撤北塘之備以致津沽之迭陷終則謬聽妄論捕巴夏禮以致海淀之被焚僧王雖名藩上將千載下有餘責焉越十年又有天津教案之交涉基督教之來中國自唐建中二年始所謂大秦景教是也嗣後元則有羅馬教徒若望高未諾明則有利瑪竇明清之間則有湯若望等自是外國教民來中國者絡繹不絕道光季年至載列條約於是天主耶穌教徒益紛紛入內地而中國之教案亦因而漸起同治元年湖南江西有拆毀教堂之案貴州有殺害教士之案同治六年八年四川有民教互相殺害之案至同治九年天津之教案尤鉅是年四月天津有匪人迷拐人口並傳有挖眼剖心用以製藥之說據獲犯供言爲天主教民所使時在津辦理通商大臣崇厚與法領事豐大業商定令道府縣帶同獲犯赴堂指勘所歷地方房屋與原供不符亦卽帶犯歸案旋聞有民人在教堂口角爭毆正在派弁前往彈壓忽豐大業洶洶來署向崇厚及知縣放鎗擊死知縣僕從一人於是民人奮起羣毆豐大業致死遂焚燒教堂及拆毀仁慈堂並殺傷教民數十人又誤殺俄商三名誤毀英美講堂一所天津大擾會直隸總督曾國藩

方在病假詔命馳往天津查辦先將俄商及英美講堂交涉設法議結次訊所謂教徒迷拐人口挖眼剖心等事全係愚民誤會至殺害領事焚燒教堂一節以既緣拐匪牽涉教堂府縣赴堂查勘領事對官放鎗衆怒故不可遏此皆當日之實在情形也而法使羅淑亞肆意要挾必欲府縣官議抵國藩不許傳言法調兵艦到津國藩嚴爲戒備持議如前惟以粵捻初定不肯與鄰邦構釁慮四國合縱敗約變生不測力主維持和局津民大怨國藩而政府諸人亦群起掊擊至呼爲賣國賊彈章紛紛舉國欲殺於是國藩以病重請罷免詔調爲兩江總督以李鴻章代爲直隸總督命迅速赴津辦理嗣仍由國藩與法使議結定滋事人犯正法者二十人軍流者二十五人天津府縣張光藻劉傑皆遣戍派崇厚前往法國道歉其事乃已是時國藩所辦各情不無過重實爲中國永遠之患國藩事後恐亦不能無悔然能保全和局而原案外並無所讓視後來辨教案者尙較勝一籌也

第七章

俄自雍正五年訂約與中國通商僅有陸路恰克圖一處當嘉慶八年俄人商船駛至廣東求貿易爲兩廣總督那彥成所拒道光二十八年俄船又駛抵上海圖互市爲兩江總督李星沅據約嚴却之俄人因是深以所屬西伯利亞東嚮無通航海口爲不便至是咸豐三年行文中國謂自黑龍江格爾必齊河上

流以達於海未設立界標請派員會勘欲以嘗試中國也實則道光末年俄人早已私移外興安嶺界碑又潛於黑龍江北岸屯兵占守攘爲殖民地匪伊朝夕矣咸豐四年俄艦又忽順黑龍江而下通過愛璣中國官止之不聽五六年間中俄迭議界務不成而罷咸豐八年俄人又移其居民於烏蘇里河口朝廷爰於是年四月命黑龍江將軍奕山與俄使木哩斐岳福訂界約於愛璣城是爲愛璣條約自此約一成於是黑龍江北岸地全入於俄不惟康熙時尼布楚條約內格爾必齊河舊界爲之一變即雍正時恰克圖條約內以烏特河爲兩國中立地亦成陳迹矣且此次訂約既以黑龍江爲界而約文內又牽涉於松花江似明則允其以外黑龍江爲界默又許其在內松花江行船語近模糊故後來歷次辨論迄歸無效是時英法兵陷天津礮臺俄人一方經營滿洲一方以兵艦隨英法之後是年五月英法和議成俄人亦援例另訂天津專約十二條其重要之點如除前定邊界陸路通商外准由上海寧波福州廈門廣州臺灣瓊州七處海口通商若他國再增添口岸俄國一律照辦又准俄國在各通商海口設立領事並駐兵艦自是俄人在中國通商海陸皆獲大利在歐美各國之上矣咸豐十年英法同盟軍陷北京俄使調停其間又挾以厚索報酬於是年冬十二月再訂北京條約續增十五條其第一第二兩條爲國界之關係至重大者大約首條以東邊言謂烏蘇里河東屬俄國西屬中國自松阿察河源至圖們江口其東皆

屬俄國西屬中國次條以西邊言謂西界尙在未定此後應自雍正六年所立沙濱達巴哈之界牌末處起往西直至齊桑淖爾湖自此向西南順天山之特穆圖爾淖爾南至浩罕邊地爲界自斯以後烏蘇里河以東地又悉入於俄俄人遂於其地建阿穆爾州沿海州經營海參崴軍港而中國邊防乃日亟至於西界經同治初年議定并特穆圖爾亦畫置界外統計中國所失與俄所得之地東西廣二十餘經度南北長十餘緯度彼時中國不諳輿地之學不知實在之界究竟在何處坐使滿洲舊壤驟失數千里不亦大可慨乎

日本建國當中國周時厥後通使於漢修貢於魏而賓服於唐五代及宋彼此不通聞問元時世祖窮兵東伐喪師十餘萬於是日本遂有輕視中國之心明時屢擾海濱爲總兵戚繼光俞大猷等所敗其患始漸息清初與中國政府無大交涉然自順治迄道光間日本商民多通市於江浙咸豐以後蘇浙閩商往長崎貿易寄居者絡繹不絕是時日本迫於外患下詔變法廣事外交與泰西諸國互訂條約念與中國鄰近宜亟通好以冀同心協力禦外侮乃於同治九年遣外務大臣柳原前光少臣花房義質等來中國預商通好事宜通商大臣成林代爲上書命留天津候命朝廷許通商不必訂約前光力爭始允與之訂約至同治十年五月日本以大藏卿伊達宗城爲正使前光副之來締盟約朝廷命直隸總督李鴻章爲

全權大臣辦理日本通商事務是爲中日議約之始先是疆臣有以前明倭寇爲辭奏請拒絕者李鴻章奏駁之大學士兩江總督曾國藩亦上疏力爭謂東西各國宜一律待遇不宜有所異同致滋口實爰於是年九月定修好條規十八條通商章程三十三款附以中國日本海關稅則約既成日使宗城歸日政府以不能盡同西約意尙觖望以事免宗城官乃以同治十一年二月遣外務大臣柳原前光兼少辦務使來議改約李鴻章却之謂萬國公法最忌失信今兩國修約於旣訂未換之間遽爾遣員議改旋允旋悔於全權立約之命不幾白相枘鑿乎前光囁嚅而退明年四月遂換約同治十三年派公使駐日本國都先是十年十一月有琉球船遇颶風漂至臺灣爲牡丹社生番刦殺五十四人十二年二月日本小田縣民四名亦漂至遇害日本諸臣喜事者因謂生番豺狼不可不痛爲懲治特以生番熟番有異宜先質經界於中國中國政府答以生番化外民不任責日本遂自發兵至臺灣征生番爲琉球人雪仇然臺灣本中國版圖琉球又久列藩屬中國至是不能坐視先約日本退兵日將西鄉從道不聽乃命船政大臣沈葆楨爲欽使辦治臺防勢將決裂賴英使威妥瑪調停其間與日本專使大久保利通交涉立約三條償日本軍恤銀共五十萬兩令撤兵歸國至臺灣生番中國自行設法妥爲約束事始平是役也日本糜費六百餘萬圓將土疫死者甚衆然是時已昌言琉球爲其屬地琉球難民被害與中國政府無涉中國

政府未之知也越三年日本夷琉球爲沖繩縣中國始遣使與抗議不得直自後琉球遂終歸日本矣

第八章

是時內亂以太平軍爲最大自明季以來人民秘密結社以宗教迷信之力號召愚衆反抗政府者無慮十餘種如白蓮青蓮白陽紅陽八卦天地無爲等名目其源流分合要不出釋道二宗嘉道以還歐人東漸者日衆於是有以基督教煽動徒黨潛蓄勢力者卽太平軍之首領洪秀全は也秀全故廣東花縣諸生先是有朱九濤者倡上帝會於廣州秀全與其中表馮雲山並師事之九濤死秀全別奉基督教自樹一幟謂之上帝教其會名三合會道光十六年移其會於廣西居桂平武宣二縣間之鵬化山中陰事布教雲山與秀全妹婿武宣蕭朝貴及桂平楊秀清桂林韋昌輝貴縣石達開等分赴各縣勸教明年秀全返廣東親就美國牧師羅巴爾特受洗時入教者寔衆皆稱秀全爲先生遂公推爲教主秀全稱耶和華爲天父耶穌爲天兄而已爲其弟在教皆平等禁驕矜作眞言寶誥諸書以爲訓各畜髮藏山箐間及秀全再至廣西則雲山等勢已大張信徒之多達二千人以上是時東南數省盜賊蠭起廣西尤甚如慶遠之張家福柳州之山豬羊武宣之劉官方象州之區振組潯州之謝江殿等不啻數十股疆吏老病憚事地方官無可如何秀全亦乘是赴平南藤縣間之金田村起兵貴縣民林鳳祥揭陽海盜羅大綱衡山諸

生洪大全等皆不期奔赴時道光三十年也詔奪廣西巡撫鄭祖琛職起前雲貴總督林則徐爲欽差大臣兼署巡撫則徐至潮州病卒詔以前兩江總督李星沅代爲欽差大臣以布政使勞崇光署巡撫提督張必祿兵敗死之詔又以前漕運總督周天爵署廣西巡撫李星沅與周天爵以事相齟齬疏請統帥詔命大學士賽尙阿爲督師星沅曾任廣西學政洪秀全出其門故有師生之誼詔命星沅赴粵從事招撫星沅不敢去朝旨敦促大恐行至斷藤嶺仰藥死周天爵復與提督向榮有隙劾榮不遵節制詔罷周天爵以鄒鶴鳴代爲廣西巡撫時有廣東高要人張嘉祥擁衆數百造秀全語不合去掠潯州據之賽尙阿至軍合都統烏蘭泰提督向榮擊嘉祥嘉祥敗降向榮改名張國樑數月以來將帥屢易文武不利秀全得以其間從容布置附從日多官軍屢敗衆推秀全爲太平王以咸豐元年閏八月進破象州據永安定國號曰太平天國稱天王楊秀清爲東王蕭朝貴爲西王馮雲山爲南王韋昌輝爲北王石達開爲翼王洪大全爲天德王秦日昌胡以晃等以下四十餘人稱丞相軍師等官有差移檄遠近以恢復中原掃除胡虜爲詞震動人心時有道州舉人胡孝先者往謁秀全初疑爲閒諜繫之孝先自獄中上書暴政府罪惡秀全得之大喜釋之與論大計孝先曰關中天府之國周秦之所以興欲爭天下必先取咸陽然後出山右定燕京天下可傳檄定也秀全稱善置之左右稱先生而不名楊秀清忌之破興安全州回孝先

在軍秀清殺諸道以陷敵聞秀全甚悼焉是時官軍雖迭殄土匪而太平軍之勢已橫行不可問矣雖有烏蘭泰之擒洪大全而旋即戰歿賽尙阿軍亦毫無進步迄被効罷太平軍遂進窺湖南長沙賴有新寧舉人丁憂在籍知縣江忠源倡辦團練於其鄉以兵法部勒鄉人子弟旋改爲楚勇至是聞警率鄉勇往援乘敵兵未至扼於下游蓑衣渡激戰焚舟礮斃馮雲山敵兵始懼雲山能謀善斷多所規畫至是陣沒秀全大哭之慟曰天不欲我定天下耶何奪吾良輔之速也自有蓑衣渡之捷官兵之勢稍壯援師大集太平軍敗退蕭朝貴死焉長沙以全太平軍引兵渡洞庭克岳州陷漢陽破武昌朝廷大震是時國家軍政廢弛京旗綠營等兵皆老弱無所用詔起湖南湘鄉丁憂在籍侍郎曾國藩治團練駐長沙先是湘鄉諸生羅澤南王鑫等在鄉辦團練有聲至是湖南巡撫張亮基令各募一營至長沙備防守並請國藩主之國藩以團練保衛鄉里不能越境剿敵疏請募爲官勇仿明戚繼光成法束伍練技編爲湘勇令羅澤南王鑫塔齊布鄒壽璋周鳳山儲玖躬及其弟國葆等分將之是爲湘軍陸師編制之始尋又用江忠源及編修郭嵩燾等所建水攻之策購造兵船編成水師以成名標諸殿元楊岳斌彭玉麟鄒漢章龍獻琛褚汝航夏鑾胡嘉垣胡作霖等分統之是爲湘軍水師編制之始是時欽差大臣向榮駐兵湖北大學士琦善駐兵河南相應聲勢頗盛初秀全欲從胡孝先遺策取常德趨漢中襲咸陽出山右以窺燕薊至是

聞黃河一帶已有重兵乃決意東下取蘄黃順流取九江安慶進取江寧分兵取鎮江揚州由臨淮入鳳陽用浙江歸安人錢江策也江初在廣州鴉片之役聚衆抗英坐法遣戍遇赦歸至是獻策洪秀全勸其效法漢高祖明太祖秀全大喜留參帷幄旋以東王楊秀清忌遁去太平軍既得江寧秀全復欲趨江北圖汴定都洛陽渡黃河以圍燕都或建言明太祖亦席金陵有天下宜先建國俾天下知趨向秀全納之羣下上尊號升江寧爲天京燔柴於上帝大赦立妻賴氏爲皇后子福琪爲太子置六官立朝儀制法律設學校定新曆依西法進楊秀清等軍師丞相主將將軍及其餘文武百官封賞各有差開科取士赴試者二萬餘人考取王茂爲狀元由是各省年少無賴豪富恩亂者皆聞風響應天下大亂時咸豐二年二月也是時向榮兵自武昌追至江寧城外屯孝陵衛是爲江南大營琦善兵自河南馳抵揚州是爲江北大營聲威甚振而其實八旗綠營之積弱久已暴於天下故太平軍雖受兩路官軍之夾擊而其兵鋒之銳竟不爲少減遂分兵一出河南攻山西以窺京畿一由安徽攻江西以爭長江之上游出河南之師林鳳祥將之以是年四月由開封南懷慶不克則自山西入直隸是年九月攻陷深州距都城僅六百里爲科爾沁王僧格林沁所敗走攻天津又不利退據靜海分屯獨流楊柳青等處明年正月大雪兩兵不習寒凍死者十六七又爲僧格林沁等所乘大敗趨據阜城然半年之間橫行四省轉戰四千五百餘

里攻江西之師胡以晃將之以是年五月再陷安慶進圍南昌時江忠源以功遷署湖北按察使奉命赴江南大營行次九江聞警東援戰屢捷又飛書湖南曾國藩處告急編修郭嵩燾等率湘勇千二百楚勇二千營兵六百以至諸生羅澤南復率子弟鄉人自成一軍與偕南昌之圍遂解九月胡以晃復引軍出湖口趨九江入湖北境江忠源兵又赴援九江敗績於田家鎮突圍走廣濟十一月胡以晃兵復取廬州時江忠源已授爲安徽巡撫聞廬州事急率兵由六安州進援入城堅守逾月城破投水死明年正月太平軍水陸兼進逼陷黃州湖廣總督吳文鎔爲巡撫崇綸所牽制又戰敗自殺而武漢等處望風瓦解滿目殘破詔命曾國藩往援咸豐四年二月曾國藩督水陸師北進而水師初出湖遇大風輒壞數十艘陸師至岳州一戰又不利走長沙太平軍乘勝溯湘而上列舟靖港復以一軍出閒道襲陷湘潭踞長沙上游國藩親督水師擊之大敗於靖港發憤投水獲救不死會塔齊布率陸師援湘潭出敵不意與搏戰大捷國藩聞之益遣水師往助八日之間水陸十戰十勝遂復湘潭由是乘勝分兵三路以塔齊布胡林翼江忠淑等將之肅清湖南又會同湖南巡撫骆秉章湖廣總督楊霈荊州將軍官文等所遣各路兵略定湖北而北方直隸山東等省亦漸次爲僧格林沁勝保等所剿滅官軍始驥驥有起色矣然是時太平軍之勁將翼王石達開英王陳玉成等悉萃於贛皖開江西外江而內湖官軍孤懸其間不得出於是武昌

已定而復陷疆吏又畏葸莫敢擗其鋒咸豐五六六年間江西七府一州五十餘縣又皆陷塔齊布羅澤南先後歿於軍澤南以諸生辦團練數年之間轉戰兩湖江西克城二十餘由訓導擢道員加布政使銜至是戰死聞者莫不惋惜江南大營又以頓軍堅城分兵出援之故大敗於孝陵衛提督向榮憂憤發病卒官軍又大挫會太平軍內變太平軍自佔踞金陵以來天王洪秀全皆深居宮禁諸王亦罕得見者軍國大事悉決於東王楊秀清至是官軍江南大營陷秀清自以功莫與京陰欲自立惟懼沛王羅大綱多謀善戰功最大大綱有疾秀清遣醫毒殺之遂迫秀全禪位秀全以血詔召北王韋昌輝自江西歸令密圖之以計誅秀清盡屠其家屬並殺其徒黨男女達二萬人以上翼王石達開在湖北聞變馳歸責昌輝昌輝謀並殺達開達開覺縋城走寧國昌輝悉殺其母妻子女又恣殺秀全侍衛秀全大恐復密約秀清餘黨襲攻昌輝府昌輝逸渡江爲邏者所獲送江寧秀全磔殺之夷其族召達開回輔政如秀清故事而陰疏忌之達開危不自安走安慶不復歸自是太平軍始起諸王略盡而一切政事出於秀全兄弟安仁發福王仁達於是太平軍遂衰弱無能爲矣而官軍得乘其時大張勢力官文胡林翼兵再定武昌漢陽楊岳斌李續賓兵克復九江和春張國樑兵克復瓜州鎮江曾國荃兵克復吉安蕭啟江等兵克復邵武湖北江西之太平軍將漸漸蕩平矣未幾而官軍又有三河之敗李續賓自縊死曾國華及員弁兵勇死

者六千人先所復太湖潛山桐城舒城四縣又復失湘軍精銳殲焉續竇爲澤南高弟從澤南辦團練身經大小六百餘戰克復四十餘城由諸生迭擢至浙江布政使戰歿遠近痛哭國藩大懼深恐湘軍不復振矣時咸豐八年十月也九年太平軍又攻陷廬州李孟羣及其妹素貞死焉十年揚州六合合肥宿松太湖黃梅等郡縣及浙江防守十五營又皆爲太平軍忠王李秀成所破而江南大營又以汎地太廣兵單士騎之故爲李秀成所襲張國樸和春皆戰歿江南大軍三百營悉夷爲平地李秀成與陳玉成爲太平軍中後起之雄者而陳玉成不過以勇聞李秀成又復以仁著有大度秀成自出師不一月而逐北七百里拔城六十餘聞其師至蘇州時有亂民千百掠不止聞忠王至皆釋戈羅拜到處問民疾苦民皆歸心焉由是江蘇之蘇常松浙江之杭嘉湖皆相次失陷於李秀成而石達開又壓攻安徽江西福建等省大局瓦裂將不可爲矣詔授曾國藩爲兩江總督辦江南軍務先是國藩治軍七八年轉戰於兩湖江皖等省皆與地方大吏有主客之勢志不獲伸至是始得事權歸一乃奏保左宗棠專任浙事李鴻章專任蘇事其弟國荃專攻圍安慶而又有胡林翼之撫湖北沈葆楨之撫江西晏端書之謀餉粵東皆聯絡一氣而餉有所出呼應皆靈如身之使臂臂之使指矣故雖始困於祁門一時糧餉通信之道幾絕有人勸國藩退師國藩不聽懸劍帳外以自矢曰去此一步無死所堅忍數旬乃漸得脫而旋即聞安慶之克

復安慶失守者已九年咸豐十一年四月曾國荃鮑超等掘長壕以困之敵帥陳玉成赴援李秀成聞之曰英王新得衆必驟驕則皖危矣玉成果敗曾國荃等遂於是年八月克復安慶玉成遁去敵兵死者萬六千人被俘者數千人太平軍之精銳盡於此矣於是江北諸州縣亦皆望風而解捷書至文宗已崩於熱河而胡林翼亦卒於武昌林翼撫湖北而總督官文爲滿人林翼巧於操縱使官文聽其言大小事皆任之不疑由是湖北屹然爲中國重鎮皆林翼一人之力也林翼卒國藩悼之曰赤心以憂國家小心以事友生苦心以調護諸將天下寧復有似斯人者哉陳玉成之敗也走至廬州又爲多隆阿所敗走壽州依苗沛霖沛霖執送勝保營勝保命之跪玉成叱之曰爾乃吾之敗將何向我作態爲曾記合肥官亭一戰爾騎兵三萬有一生還者乎勝保怍其言予酒食說之降玉成曰吾今日自投羅網有死而已何多饒舌爲遂見殺死年二十六玉成眼下雙疤軍中號曰四眼狗驍勇富謀略曾國藩深畏之李秀成聞其死歎曰吾無助矣自安慶之下朝廷方以恭親王奕訢當國專倚湘軍湘軍之名大震曾國藩遂專意金陵使其弟國荃帥兵圍之分令左宗棠自衛州謀浙李鴻章提淮軍用英將戈登美將華爾等自上海攻蘇常左李之軍所向皆捷同治二三年間蘇常浙江各處皆相繼克復左宗棠爲浙江巡撫李鴻章爲江蘇巡撫同治三年四月蘇省自金陵外悉已收復於是官軍遂全力進攻金陵先是李秀成屢勸洪秀全親

征鄂贛握上游以號令天下襟帶蘇浙以利餉源秀全不聽秀成父請奉太子監軍萬一天京不幸奉幼主以圖恢復如唐肅宗靈武之故事秀全亦不省至是官軍四集城中糧_和食草根本皮而軍殊死守秀全憂憤成疾仰藥死秀成輔秀全太子福瑱卽位秀成知人善任恩威並用人心服之若子之於父然奈城中藥盡國荃等偵知之挖掘隧道入秀成夜出死士三千衝國荃營官軍大驚幾潰會李臣興等率新兵馳救僅力獲免而秀全寵臣等_陰逃款國荃國荃等遂得以六月十六日由地道入金陵城掘秀全屍斬首焚之諸王皆自殺城中將弁三千餘人皆戰歿軍民十餘萬爭蹈河死屍墳溢如橋城_郢宮室縱火焚之三日夜不絕后賴氏及諸妃嬪投御河死者以百十計福瑱爲秀成弟揚王李名成所挾以遁秀成惟率九騎登方山至暮下山渡河村民至集殺已渡六騎見秀成皆跪而自投曰此忠王也愛百姓厚吾儕當護之至湖州大營會他村民醫至挾秀成送國荃軍國荃盛陳儀衛訊之秀成背立言曰何必爾速以紙筆來吾當書之吾史館實錄爾輩焚燬吾不述奚以傳信自是月十七日至二十七日凡十日間在站籠中慷慨吮筆記述數萬言書畢被殺年四十後村民夜刦蕭孚泗親兵王三清去殺而投諸水中三清即手斬秀成者秀成廣西藤縣人與陳玉成同里篤實忠厚尚信義富謀畧恩撫士卒皆樂爲之死自五王死後賴秀成支柱危局縱橫盪決於長江數省且六七年秀全倚爲柱石廷爭直諫有大臣風去

蘇州日男女老幼流涕送之解至國藩營中松王等見之皆長跪請安國藩恐民心未去黨羽之爲變卽決計除之不欲解京以免生意外之患及死人爭痛惜之金陵捷聞詔封國藩爲侯國荃李鴻章爲伯李臣典子蕭孚泗男餘各獎叙有差福瑱尋走至江西省城爲席寶田所擒送巡撫沈葆楨殺之太平天國以亡太平軍之餘衆分竄各地者翼王石達開自爲秀全所疏忌以後倉皇出走西南擾廣西貴州四川雲南等省先於同治二年四月走至四川老鴉漩爲川督駱秉章檄官軍與土司會擒之送成都被殺將弁二百銳卒數千無一降者扶王陳得成先擾河南陝西湖北與川匪藍大順合保鑿屋多隆阿雖攻下之而旋被傷死至是僧格林沁與湖北軍會剿得成無巢可歸服毒自斃侍王李世賢爲忠王李秀成弟也與康王汪海洋自江西入福建廣東奔亡之際自相猜貳是年八月海洋刺殺世賢於鎮平左宗棠鮑超方耀等合兵擊海洋於嘉應海洋中礮死詔封左宗棠伯鮑超子餘各封賞有差而太平之餘黨亦悉平統計太平軍之始末經歷凡十有五年淪陷及十六行省勢亦盛矣其所以卒底滅亡者自得金陵以後志驕意滿諸王內訌遂開遠颺秀成束手蹙由自作天奪其魄也我聞太平軍之攻上海也有蘇州諸生王曉上書李秀成具陳攻取上海之策勸其構和西人藉其勢以圖中原其書洋洋數千言皆足以致官軍於死命秀成知其善而微嫌其毒置不肯用王曉去而之美其後李鴻章用美將華爾英將戈登等

先後將常勝軍以克復蘇常亦皆用西人之力也秀成亦可謂失計矣或曰其人即王弢又聞洪秀全初起兵長沙時有一人布衣單履與秀全論攻守建國之策多中要害并勸其棄天主耶穌專崇儒教秀全不能用其人乘夜逃去後湘人欲誅此獻策者不知其姓名不能得事遂寢或曰此其人即左宗棠也其說之然與否今不可得而知矣

清之衰弱九

當太平軍之據於江南也淮北有捻黨初起於山東之兗沂曹濟後漸蔓延於河南之南汝光安徽之潁亳壽江南之淮徐海湖北之襄棗鍾隨康熙時已有之始則鄉人行讎逐疫捻紙燃脂爲龍戲省會擊之咸豐元年太平軍之變作朝廷益下令嚴捕山東安徽間捻黨遂大起抵抗官吏沿海地方動搖三年江南安徽省城陷於太平軍捻黨益乘機爲亂五年捻黨巨魁張樂行以安徽之蒙城亳州爲根據地北犯河南之歸德府與太平軍互爲聲援其勢益張甚欽差大臣袁甲三都統勝保等屢破之咸豐八年甲三勝保等大破捻黨於固始六安捻酋李兆受以降初咸豐三年兆受已降於何桂珍旋復戕桂珍叛至是再降於勝保後賜名世忠未幾曾文宗狩熱河捻黨又乘而北犯山東陷濟寧界曹州附近山

東大亂科爾沁王僧格林沁奉命往討初至急功負氣欲一戰遂殲焉尋連戰於荷澤皆敗績明年捻黨與叛練苗沛霖陷壽州沛霖故壽州諸生捻事起爲團練長咸豐八年勝保曾招撫之以功擢至川北道持兩端受官不冠服命其下稱爲苗先生而陰懷異志至是遂結捻黨踞懷遠攻壽州并遺其黨苗景開竄擾河南袁甲三始亦惑之繼知其奸奏請剿辦而皖撫翁同書以失守定遠遁至壽州依沛霖爲殺州紳徐立壯等以媚之沛霖陰通款於太平英王陳玉成受太平封爲平北王翁同書猶力保其非叛督師勝保尤袒庇之時朝廷方專意於太平軍及捻黨不暇討苗沛霖且欲利用之以攻捻黨以故益跋扈當時稱爲苗亂明年同治元年沛霖執獻太平英王陳玉成於勝保因隸於僧格林沁是歲僧格林沁大率山東河南直隸山西四省兵討捻黨明年正月僧格林沁破捻黨於尹家溝其驍將陳國瑞亦破捻黨於雉河集捻黨巨魁張樂行敗走宿州又爲苗沛霖所執以獻遂伏誅而捷奏則言樂行竄宿州爲知州英翰所獲云苗沛霖既連擒獻陳玉成張樂行恃功驕動輒脅制官吏不遂所欲懷怨望是年七月復叛陷壽州圍蒙城據懷遠欲乘勢北趨中原大震各路官軍皆來援十一月會沛霖部下有曾爲陳玉成親兵者爲玉成復仇殺其首以獻並生擒其黨苗景開等苗亂以平捻黨巨魁張樂行雖伏誅其從子總愚繼之領其衆走山東與捻黨任柱牛洪及太平將賴文光合爲四大首領明年同治三年又與太平扶王陳

得成合擾河南湖北等處僧格林沁往剿會太平軍亡其餘衆復合於捻黨勢益盛僧格林沁兵勇敢無
節制暴亂甚於捻黨淫掠無所不至民皆失望太平扶王陳得成聞太平亡仰藥死僧格林沁遂自喜恃
勇輕進連敗於麻城廣濟間狼狽走光山尋復走鄧州又屢中敵伏連喪其良將垣齡舒通額蘇克金等
僧格林沁大憤怒日夜追二三百里會捻黨步隊足腫裂不能行願就撫僧格林沁又不聽復追至曹州
督部下奮力激戰大敗退至一無名之空堡反戈衝陳捻兵外入全軍覆沒僧格林沁屍被八創陳國瑞僅以身免官
三者初由捻黨來降俟其出堡反戈衝陳捻兵步隊足腫裂不能行願就撫僧格林沁乘夜突圍走其部下有桂
軍大挫京師震動急召曾國藩入衛尋命國藩督師剿捻黨國藩以前所募湘軍裁撤殆盡李鴻章所部
淮軍頗盛乃薦李鴻章以自代名將劉銘傳劉松山等皆屬焉是時捻黨分東西二部西捻入陝以張總
愚爲首東捻出入河南湖北山東江蘇以任柱賴文光爲首同治六年十月劉銘傳兵迭破捻於灘縣日
照贛榆等處捻黨潘貴升殺任柱以降文光竄揚州亦爲吳毓蘭所殺東捻平張總愚由陝入晉由晉入
豫由豫入畿南京師戒嚴李鴻章左宗棠之師皆集朝廷復命恭親王奕訢欽差大臣都興阿督神機營
兵會剿而張總愚由天津趨滄州南下淮軍躡其後直追至茌平總愚投水死西捻亦平詔封劉銘傳爲
男爵李鴻章左宗棠等各叙賞有差

是時又有回部之亂回部始雖一平於乾隆再定於道光而亂機仍伏而未已咸豐同治間西南之雲南
西北之陝甘新疆皆有回亂雲南之回亂自咸豐五年以迄於同治十二年歷十有九載內結諸營將卒
爲奧援外聯黔西苗族爲策應其著名渠帥駐大理者曰杜文秀據曲靖者曰馬聯陞占省垣者曰馬得
新挾滇撫徐之銘爲傀儡之銘亦恃以自固總督潘鐸迫令解散乃被戕於是前後新授督撫如劉源灝
福濟賈洪詔林鴻年等皆憲懦不敢赴任及勞崇光爲總督諸回民頗畏之未一年又卒故滇中回亂益
熾至同治六年詔命劉嶽昭爲雲南巡撫與布政使岑毓英督兵剿辦始漸有條理尋擢嶽昭爲總督毓
英爲巡撫二人皆善知兵有馬如龍者爲回中翹楚毓英知之厚結以恩義如龍深感愧願爲朝廷效力
於是回事遂有把握矣時楚雄澂江各府縣多陷嶽昭毓英以次收復尋攻殺馬聯陞以曲靖爲根據地
進剿黔西不靖之苗又收曲靖附近各郡迤西既定進規迤東總兵楊玉科等克大理杜文秀服毒自殺
岑毓英入大理擒文秀之三子一女年皆尙幼並其黨楊榮等百三十人盡殺之又屠殺城中兵萬餘人
未幾迤南之順寧騰越思茅蒙自各地亦一律肅清時同治十二年夏五月也同時貴州之興義新城等
處亦悉爲滇軍克復雲南自回亂以來蔓延將二十年淪陷至五十三城至是始平陝甘新疆之回亂自
同治元年其部中首領起於新疆者曰白彥虎起於陝甘者曰馬化龍土匪董福祥應之滇匪藍大順等

又自川入陝以助之關內外同時騷動西北諸省囂然不靖雖經將軍多隆阿軍進剿藍大順走死都統穆圖善等堵擊敗退藍二順犯西安之兵而新疆回民金相印迎浩罕酋阿古柏圍喀什噶爾遂次第攻奪南路八城北路則妥得璘索煥章踞烏魯木齊伊犁等九城亦先後陷并陷肅州同治七年捻事既竣朝廷命左宗棠督湘軍至西安議分南北兩路以進南路則宗棠率郭寶昌魏光燾等渡渭水沿涇水由甘肅涇州而至平涼北路則劉松山金順張曜等繞山西渡黃河而攻陝西北部之榆林綏德降董福祥直逼甘肅之寧夏時回教徒悉萃於寧夏之金積堡以抗官軍松山既捷於靈州進攻馬五寨中飛礮陣亡宗棠令松山從子錦棠統其軍卒破金積堡遂平寧夏誅甘回馬化龍父子而其黨馬壽馬文祿合陝回之餘衆又踞西寧河西大擾同治十一年宗棠督諸軍勦撫兼施錦棠俘馬壽於大通西寧克復是年白彥虎由永安進據肅州馬文祿走附之錦棠與金順宋慶張曜等合攻肅州破之馬文祿乞降尋伏誅關內陝甘二省肅清白彥虎逃往關外至新疆哈密金順張曜追之不獲及至光緒元年左宗棠爲欽差大臣督辦新疆軍務二年三月駐軍肅州四月遣劉錦棠出關由巴里坤進圍古城阿古柏遣兵來援錦棠擊敗之六月遂收復烏魯木齊三年錦棠攻哈密土魯番開展三城皆下阿古柏自殺天山北路略定時阿古柏子伯克胡里新立思保南境而王而人心不附官軍乘之於是年九月悉復南路東四城四年

二月又復南路西四城俘阿古柏妻女及其幼子並金相印父子誅之尋安集延布魯特並自俄境入犯謀襲喀什噶爾亦皆爲錦棠所攻敗走新疆亦平詔晉封宗棠侯爵封錦棠男爵餘各叙賞有差由是新疆遂自建爲省不隸於甘肅焉我聞新疆之平也廷議欲援長齡平張格爾之例封左宗棠爲公爵太后曰前曾國藩克復金陵亦僅獲封侯左宗棠爲曾國藩所薦其所用得力之老湘營亦爲國藩所練將領劉松山等亦爲國藩所舉若左宗棠封公則前賞曾國藩爲侯爲太薄矣初曾國藩之克復金陵也遵文宗顧命當封爲王廷臣以爲舊制所無因析而爲侯伯子男各一人嗚呼其所謂舊制者不過漢臣不得與滿臣同爵耳

第十章

同治帝在位十三年一時號曰中興以東戡太平軍西定捻黨也是時羣材輩出衆正盈廷曾國藩左宗棠李鴻章等將兵於外文祥沈桂芬李棠階等秉政於內恭親王奕訢尤能公忠體國破除積習信任漢人以平國難媾和歐美諸國以維邦交滿族親貴吾於奕訢首屈一指焉稽當時之善政其最優者如設同文館於京師於是通各國之語言文字設船政廠於福建於是識各國之軍艦器械派員赴東西諸國遊歷得以增各種之見聞派員往有約各國辦理交涉得以廣國際之經驗朝野上下學問知識皆日見

進步大除從前閉關自守之錮習他如從曾國藩李鴻章之請而減蘇松太之糧額從閩敬銘之請而停止山東之敵捐德泰以疏請修理園廷褫職左宗棠以奏產瑞穀請宣史館彼責邊寶泉以劾李鴻章奏進瑞麥恐滋流弊嘉獎恤民生之艱難杜臣工之容悅從諫如流有裨於主德者亦非淺鮮也惟對於安徽之陷以翁心存故而曲庇其子同書不竟其獄湖北尹隆河之戰聽劉銘傳一面之詞而嚴責名將鮑超不當其罪賈鐸以奏太監演劇被斥沈淮以請緩修圓明園忤旨勝保何桂清貪庸驕蹇植黨營私爲其所蒙蔽雖廷臣彈章數上而仍尙優容袒庇迨罪狀昭著始不得已而罷誅賞罰之不明亦可謂甚矣然帝頗聰明奈冲齡踐阼政出宮闈即位十二年始親政甫一年卽晏駕中外莫不惋惜是時兩宮太后雖同號垂簾而東宮慈安優於德惟大誅賞大舉錯實主之西宮慈禧優於才一切判閱章奏裁決庶政悉主之兩宮性情適相反慈安見大臣呐呐若無語者每有奏牘必慈禧爲之講誦之常經月不決一事然關於軍國大計及舉賢進能每行一事天下無不額手稱慶如重用曾國藩雖以大學士彭蘊章及御史穆緝香阿等竭力抵制恣意造毀蘊章至云湘軍偏天下國藩懼太重恐有尾大不掉之患而迄毅然不少動遂以開一代中興之局焉慈禧性警敏銳於任事召對臣下諮詢利弊必中窺數故慈安之權悉爲慈禧所攘慈禧始尙每事皆諮慈安然後行旋乃專攬一切不復知有慈安矣或謂宮文宗在時已心

鄙慈禧屢欲廢之而未忍以誕生同治帝故也及在熱河臨危之際密書遺詔以付慈安曰西宮援母以子貴之義不得不並尊爲太后然其人絕非可倚信者卽不有事汝亦當專決之彼果安分無過汝姑始終曲全恩禮倘或恃子爲帝驕縱自恣汝可召集廷臣將朕此旨宣示立即賜死以杜後患如是則慈禧之爲人亦概可知矣至文宗崩後慈安以先帝密詔示慈禧欲以警之也而慈禧亦慄慄危懼不敢自佚先意承志以事慈安幾於無微不至如是者數年慈安以爲其心無他矣尋慈安娶小疾數日太醫進方不甚效忽一日不服藥竟愈慈安喜甚見慈禧左臂纏一帛詫之慈禧泣對曰前日於薦汁中割臂肉一片同煎聊盡心耳慈安大傷感曰吾不料汝竟如此好人先皇帝何爲尙疑汝哉遂取先帝密詔面慈禧焚之嗣是慈禧遂日漸放縱語多不遜專權自肆不與慈安協商慈安始大悔悟然已無及矣帝雖爲慈禧所生尤爲慈安所鞠愛帝亦孝事慈安逾於慈禧以慈禧之行爲頗爲帝所不悅時有安得海者直隸議政權嗣乃籠絡朝士使奔走其門聲勢煊赫幾若明季之魏忠賢帝年寢長心惡之嘗因事斥安得海爲慈禧所申責帝益憾之時於宮中以小刀斷泥人首左右私請其故則曰殺小安子會山東巡撫丁寶楨入覲帝見其遇事敢爲密商於慈安令寶楨俟機誅安得海將往廣東必過山東

境請執而殺之以其罪奏聞同治八年七月安得海果奉慈禧命往南方織辦龍衣舟過德州自稱欽差身服龍衣船上有日形三足烏旗船外有龍鳳旗幟並帶有前站官標兵蘇拉僧人及妻妾太監女樂等數十人品竹調絲沿岸觀者如堵寶楨聞之一面具疏奏其僭越無度招搖煽惑一面逕飭東昌府知府程繩武追捕之繩武奉飭躬笠屨馳騎烈日中躡其後三日不敢動復檄總兵王正起率兵協拿至泰安獲之械至濟南得海大言曰吾奉皇太后命誰敢犯者徒自速死耳官吏皆讐焉寶楨念朝旨未可知不如先論殺之遂夜棄得海於市駢誅其黨二十餘人當寶楨之奏至京師慈禧聞而皇駭莫知所措帝奉慈安召軍機王大臣等議之以祖制宮監不得出都門犯者殺無赦當就地正法羣臣皆如議然其諭猶留中二日未得發聞爲慈禧所默阻也及醇親王奕譞復力爭之朝旨始下時安得海已伏法五日矣慈禧不懌同治十一年帝年十七兩宮爲帝擇后慈安欲婚尚書崇綺女阿魯特氏慈禧欲婚侍郎鳳秀女富察氏不能決令帝自擇之帝如慈安旨以崇女對因遂立阿魯特氏爲皇后富察氏爲慧妃慈禧大不悅帝大婚後以皇后阿魯特氏才德兼備勦必以禮益愛敬有加而慈禧以偏愛富察氏故每值皇后入見從未少假以顏色且語帝曰慧妃賢明宜加眷豫皇后年少未嫻禮節皇帝母輒至宮中致妨政務又陰使內監時時監視之帝懊喪遂不入皇后宮亦不幸慧妃終歲獨宿乾清宮內侍有陰導帝以微行者

起居多不律尤與貝勒載澂侍讀王慶祺洽載澂奕訢子也奕訢聞之切諫帝而幽載澂帝怒欲殺奕訢大學士文祥泣訴太后事乃寢帝遂以是而致疾同治十二年正月帝始親政十三年十月帝不豫命軍機大臣李鴻藻代批章奏鴻藻爲帝之師傅也十二月帝疾大漸召鴻藻入見寢宮時皇后方問疾在帝側聞鴻藻至欲引避之帝曰師傅先帝舊臣吾召之方有要言何用引避耶鴻藻入見后在免冠伏地帝命之起執其手曰朕疾不起矣因顧后曰朕倘不諱必立嗣子汝意何屬后對曰國賴長君我不願與朝政擁委裘之幼主而貽宗社之實禍帝莞爾曰如此朕無憂矣乃與鴻藻謀以貝勒載灝入承大統且口授遺詔令鴻藻就榻旁書之凡千餘言鴻藻出宮戰栗無人色馳至慈禧宮中請急對出袖中草詔以進慈禧閱之大怒立碎其紙擲於地叱鴻藻出移時帝駕崩年甫十有九時是月初五酉刻也外間尙秘不之知是日薄暮忽奉慈禧懿旨命軍機王大臣入議要政諸臣趨詣養心殿問帝病狀慈禧時尙含笑應曰皇帝無恙語畢默然少頃復言曰聖躬頗虛弱脫有不測宗室中誰可承大統者內務府大臣文錦頓首曰請擇溥字輩中之賢者而立之慈禧色變久之乃曰我欲以醇親王奕譞之子載灝承繼文宗顯皇帝爲子入承大統卿等以爲何如諸臣皆惶懼不敢言知太后意已決頓首曰唯惟慈禧始厲聲曰皇帝已駕崩矣諸臣皆失聲大哭時嗣皇帝載灝年甫四齡即由醇邸移居禁中卽皇帝位俟皇帝生有皇

子繼大行皇帝後以明年爲光緒元年仍由兩宮皇太后垂簾聽政封大行皇帝皇后阿魯特氏爲嘉順皇后載澍文錦皆得罪旋上大行皇帝謚曰毅皇帝廟號穆宗或曰穆宗亦非慈禧所出實爲文宗後宮某貴人產也慈禧攘爲己子潛使人酊殺其母而文宗不知穆宗旣長微聞之乃陰求其生母遺像慈禧知之大懼密毒之此穆宗之所以夭折也其說不知然否慈禧之不爲穆宗立後而立光緒帝其原因有三慈禧之意苟爲穆宗立後則已當爲太皇太后尊而不親此其原因一也醇親王奕譞之福晉故爲慈禧之妹實生光緒帝載湉因其私親而立之此其原因二也光緒帝之立年甫四齡慈禧利其幼冲可以遂已之所欲爲此其原因三也故於穆宗之崩也始則密詔大臣定議然後發喪繼則命李鴻章駐兵京師以防他變是時中外果以太后不爲穆宗立嗣而噴有煩言光緒帝初卽位內閣侍讀學士廣安先上疏略言大行皇帝冲齡御極蒙兩宮垂簾勵治十有三載天下底定詎料皇嗣未舉一日龍馭上賓幸賴兩宮擇繼咸宜以皇上繼文宗顯皇帝爲子俟皇帝生子繼大行皇帝爲嗣計之萬全未有過於此者惟嘗讀宋史竊有感焉昔宋太祖遵母后之訓傳弟不傳子不意太宗因趙普之言而遽廢母后之成命以自傳其子使當日后以詔命鑄之鐵券趙普安得有是言我皇上將來生有聖子自必承大行皇帝爲嗣第恐事久年湮或有爲趙普之言者敢請頒立鐵券以爲奕世良謨疏入奉懿旨申飭至光緒五年穆

宗奉安又有吏部主事吳可讀上疏自殺之事可讀前在同治朝官御史以言事憤激降調主事入繼事起奮然草疏擬由都察院呈遞繼以降調人員不得越職言事乃希冀在廷諸臣有所論列旣久候又不得大失望爰於穆宗梓宮赴山陵時懇本部堂官添派隨同行禮至大行皇帝奉安畢乃自盡於陵寢之旁以託於古戶諫之義遺疏略謂同治十三年十二月初五日懿旨嗣後皇帝生有皇子卽承繼大行皇帝爲嗣將來大統之歸未奉有明文必歸之承繼大行皇帝之嗣子敢請太后明白降諭將來大統必仍歸承繼大行皇帝之嗣子疏入下王大臣議旋王大臣等及尙書徐桐翁同龢潘祖蔭翰林院侍讀學士寶廷黃體芳國子監司業張之洞御史李端棻先後覆奏均以繼統迹涉建儲不敢參議乃奉懿旨皇帝將來誕生皇子自能慎選元良續承統緒其繼大統者爲穆宗毅皇帝嗣子皇帝必能善體此意所有吳可讀原奏及王大臣等會議摺並諭旨均另錄一分存毓慶宮而予吳可讀卽興初穆宗崩越二月而穆宗皇后阿魯特氏亦崩后自正位中宮後以慧妃故失歡於慈禧太后非一日矣穆宗病時慈禧尤訓責備至后欲問帝疾未得懿旨不許擅專及慈禧至帝宮見后未至又以爲無夫婦情半穆宗彌留之際后不待召哭而往問有遺旨否穆宗力疾書一紙與之閱未竟而慈禧至厲聲曰汝何得擅至此尙欲效狐媚以死爾夫耶帝與爾何物后不敢匿慈禧取而閱之笑曰汝竟敢如此好大膽立焚之或曰卽與口授

李鴻藻之遺詔同意言繼續之事也穆宗崩嗣皇帝立后以與大行皇帝所草之遺詔不符悲慟甚慈禧召后至批其頰曰爾既害殺我子猶欲作皇太后耶后跪泣不已久之始命還宮后遂誓以身殉不復進飲食旦夕悲啼目盡腫有內侍見其狀奏聞慈禧曰皇后既如此悲慟即可隨大行皇帝去內侍出未移晷而后遂薨歲年僅二十有二時光緒元年二月距穆宗之喪未百日也

第十一章

清之外交至光緒初年益漸繁棘始而英人馬嘉理被戕於雲南於是又有烟臺之約繼而俄據伊犁而復有伊犁之約尋而法越構兵而又有越南之約

煙臺之約在光緒元年初同治末英國繙譯官馬嘉理領中國總署護照往緬甸迎印度派遣中國副將柏郎等既而折回雲南至是行抵雲南騰越廳屬蠻允地方被戕英人謂爲滇督岑毓英所主使交涉遂起詔命鄂督李瀚章前往查辦覆奏謂馬嘉理前赴緬甸沿途地方均已妥爲保護由緬返滇未經知會地方官中隔野人土司地界向多匪徒聞當時洋人施放子鎗戕其夥匪一名以致匪徒藉詞起劫殺害馬嘉理及其從人四名地方官實無指使戕害情事而英使威妥瑪堅執由岑毓英主使請將全案人證提京覆訊朝廷不允威妥瑪遂自出京詔命直督李鴻章前往會商會於煙台威妥瑪仍堅持前議鴻章

與之反駁駁詰以滇案業經欽派大員確查明白若必欲將督撫大員提質須將所得岑毓英指使文札信據交出查驗然後據情請旨否則中外各國均無此辦法繼而威妥瑪又以上年秋間在總署議定辦理滇案優待駐京大臣整頓通商事宜三大端須一並議辦乃可結案其欲甚奢所言甚肆逼俄德法美日奧六國使臣及英德兩國水師提督均在煙臺鴻章故示整暇往來談讌並詣英德兩國兵船閱操會萬壽節鴻章又邀請各使臣提督宴飲慶賀聯絡情誼於是各使臣公議亦謂旣無確據請提京覆訊非是威妥瑪迫于公議允議辦法乃于光緒元年七月訂定會議條款三端一昭雪滇案賠償卹款及用費關平銀二十萬兩二兩國官員往來會晤及一切公文均須平等審辦案件事宜各按本國法律審斷三通商事務除洋藥另議辦法在新關併納釐稅外所有各口租界一律免收洋貨釐金并添開宜昌蕪湖溫州北海四處口岸作爲領事官駐紮處所又准於大通安慶湖口武穴陸溪口沙市六處起卸貨物另專款一條英擬派員由中國京師啟行徧歷甘肅青海一帶或由四川等處入藏抵印度探訪路程中國應發護照並知會沿途地方保護所謂煙臺條約是也尋以洋藥稅釐併征載在煙臺條約迄至數年尙未開辦迭經商議藉詞延宕又於光緒十一年五月命駐英使臣曾紀澤與英外務大臣沙力斯伯里續訂洋藥入口專條十款實行稅釐併征辦法所謂煙臺續約是也

伊犁之約在光緒五年至七年初左宗棠之復新疆也惟伊犁爲俄人所據藉口於俄商之被害不肯交出詔命侍郎崇厚充使俄大臣旋又命爲全權大臣赴俄議收復伊犁時光緒五年五月也崇厚至俄與俄人商議久不得要領旋與定議於釐窪薩俄雖許以伊犁歸還中國要求償給兵費俄國銀五百萬盧布又以可西河之西及麗山之南之地以至於底克斯河盡讓與俄又於喀什噶爾庫倫兩地外再在嘉峪關科布多哈密吐魯番烏魯木齊庫車等地各添立俄領事又俄商貨物往來於蒙古天山南北路等處均不納稅又議設領事官之地方並張家口各立一通商局又俄商販運貨物至張家口嘉峪關天津漢口等處者可過同州西安漢中等府路種種迫使既喪疆土又失利權崇厚一一許之與立約十八條已畫押啓送回國朝野大憤廷臣交章論劾朝廷因撤崇厚歸國褫職逮治定爲斬監候於明年正月改命太僕少卿曾紀澤使俄商改崇厚前約紀澤旣行疏稱崇厚問擬死罪有關俄國顏面而郭嵩燾亦以爲言於是命暫行監禁繼詔免罪釋放時俄聲言將派艦隊東來詔命左宗棠劉錦棠金順防西陲曾國荃防遼東皆謹修戰備以待之而鮑超亦奉命募兵駐防津海是時中國官吏多主戰議而英人戈登往訪李鴻章力言中國礮臺及軍艦之微弱兵制之不備且言伊犁若一旦開鬪則由黑龍江以襲滿州不逾兩月敵兵將出於北京城下總督王大臣聞之駭然色變曾紀澤亦上書以戒主戰者之狂躁略謂伊

犁地勢險隘難攻而易守主逸而客勞俄人之堅甲利兵與西陲回匪不可同日語今欲興大軍越險阻以侵強隣是所謂孤注一擲不能操必勝之權也且伊犁本中國地以中國之兵力恢復舊土而獲勝於俄亦無所損而戰端一開後患無窮是伊犁雖倖復而中俄構怨交戰之權興以起夫豈計之得哉朝議於是始漸就和平紀澤至俄俄人初以崇厚爲頭等全權大臣紀澤爲二等公使拒不與議既而又欲遣員至北京議約駐京俄使亦以去留相要挾嗣經紀澤反覆辯難困難百端始行定議時爲光緒七年正月俄國外務大臣爲格爾斯相與改訂新約於聖彼得堡計條約二十款專條一款又陸路通商章程十七款崇厚前約之最招物議者爲底克斯河等地新約首將此條除去僅限於可爾郭斯河西劃定界限至嘉峪關通商仿照天津辦理西安漢中兩路及漢口字樣均刪去領事僅准於吐魯番一處添設天山南北路貿易前約均不納稅改爲暫不納稅此外增償兵費四百萬盧布爲九百萬以此次中國對於前約故意拒絕致俄國多耗餉糈不能不添賠需費也奏入奉旨允准伊犁之事乃結是約也崇厚既定議商改若議者謂強國成約尚可遺使更改執此以例其餘他日交涉必有承其弊者紀澤之言眞持平之偉論也然而伊犁雖還而伊犁河可通航路之大部分悉爲俄有中亞細亞一帶更不必論矣

清史要略

越南之約在光緒十一年初光緒九年越南苦法之侵略告急於中國詔命直督李鴻章馳往廣東督辦越南事宜越南與法之構釁非祇一日亦非祇一端也其繼因咸豐中越南殺害教民與法構兵後立和約割南圻之嘉定邊和定祥名爲外三省以界法同治末又開兵釁再訂和約復割永隆安江河仙名爲內三省以界法自是南圻全爲法所踞改嘉定爲西貢法儼視越南爲保護國而中國尙未之知此又一端也光緒七八年間法人欲實行紅河通商有黑旗黨魁劉永福者太平軍故將也自太平國亡以所部入越越王授以宣光興化山西三省提督聽其自行取稅贍軍法人藉口有碍商務率兵迭陷河內南定河陽時永福駐山西軍絕悍又得滇督岑毓英助軍火故屢與法戰皆大勝法人憚之別以兵船陷東京順化河岸砲臺至是越王阮福時歿國中多故嗣子幼弱乃乞援於中國鴻章旣奉命督師援越未行先至天津與法使寶海訂約三條分界保護越南議既成中國方許退軍而法忽翻成約召寶海回國以脫吉利代之認越南爲自主國中國不能干涉約遂敗脫吉利聲言將乘兵船入京朝廷亟命鴻章還直督任脫吉利又揚言至廣東詔命兵部尙書彭玉麟督辦廣東海防又命滇撫唐炯駐山西桂撫徐延旭駐北寧援助越南明年春延旭在北寧爲法軍所敗失守唐炯出關見敵勢益中途折回雲南山西亦陷皆革職逮問劉永福兵亦

多潰敗法越事益亟會廣東稅粉司德人德璀琳力任調停招授李鴻章爲全權大臣與法水師總兵福祿諾在天津議定簡明條約五款大略爲不侵犯中國撤還北圻防營不索償金不碍國體等語議旣成福祿諾臨行與鴻章言擬派隊巡查越境及驅逐劉永福黑旗軍鴻章不以上聞奉旨申飭改命江督曾國荃往上海與法使巴德諾會議詳細條約會法以巡邊爲名遽犯諒山法提督孤拔復率兵艦來福州馬尾要索兵費國荃議許給五十萬兩又爲朝旨所嚴飭和議破朝廷遂一意主戰時光緒十年閏五月也自是中法構兵互有勝負六月法人攻陷臺北基隆砲臺又攻陷滬尾砲臺幸爲督辦臺灣軍務劉銘傳擊却之七月法兵闖入馬江擊沈揚武等軍艦七艘燬船政局及福州馬尾各砲臺船政大臣何如璋會辦海疆欽差張佩綸皆遁走事聞交部議處發遣軍臺八月廣西提督蘇元春等敗法人於越南陸岸縣同時提督方友升等與法人戰于郎甲敗績十月蘇元春等又敗法軍於越南紙作社十一月越南提督劉永福受朝廷招撫以提督記名又攻復越南之宣光興化山西三省各府州縣十二月法船攻浙江鎮海口提督歐陽利見擊却之明年正月法兵大攻諒山蘇元春潘鼎新等力戰不能守法兵進攻鎮海關提督楊玉科等戰死廣西大震朝廷惶恐二月法兵攻小南關提督馮子材等奮死激戰走之遂乘勝拔隊窮追連蹙之於文淵於諒山於谷松於威坡於長慶於船頭由北而南八日夜追至二百餘里而諒

山遂復法人大懼其國內又新爲德意志所殘破難能久持於外乃潛託總稅務司英人赫德爲言於李鴻章請成諒山之捷朝廷未之知也乃遽許停戰議和四月命李鴻章與法使巴特納在天津訂越南新約十欵越南遂讓於法矣時曾紀澤駐使於法密電法國情形請力戰約既成乃已知者莫不惜焉

第十二章

光緒中葉東方及西南之屬國盡失初當英人爭滇案俄人據伊犁法人擾越南日人乘閒而滅琉球夷爲沖繩縣至越南新約成中國以越南讓法日人遂援以爲例以琉球讓歸日本英亦乘是而取緬甸以爲印度之屬地中國與之交涉英人許代其納貢議定滇緬商務界務而緬甸之主權又全歸於英暹羅與緬甸越南相毆連英人既得緬甸因扼暹羅湄公河上流以通雲南法人以湄公河東地曾屬越南爲口實迫暹羅割讓暹羅許之英恐其妨害緬甸與雲南之交通因與法人約指定湄公河上流方五十餘英里爲中立地兩國俱不得侵佔由是暹羅以英法交爭得幸存然自是純采西法兀然自主與歐美諸國通商立約朝貢不入於中國而暹羅又失矣未幾而朝鮮又失

朝鮮在中國之東北境周初箕子封於此漢初衛氏繼之爲漢所滅其南部爲三韓故或亦稱曰韓尋其國分爲新羅高句麗百濟唐滅高句麗百濟其地悉歸於新羅五代時王建繼之國號高麗至明初李成

桂繼之受明冊封復號朝鮮自新羅以來世爲中國藩屬清咸同間法英兩國與之構難中國不之間同治十二年日本兵艦入朝鮮燕華島遭砲擊日人興兵問罪以其爲半主之國依公法其外交當由上國主之因遣使來問朝廷又以畏事故答以自與理論於是日人遂以光緒元年正月與朝鮮訂和約認朝鮮爲自主國五年英美法德諸國亦皆相繼往朝鮮求互市朝鮮拒之時李鴻章不明國際公法貿然致書於朝鮮國相李裕元勸其與各國立約且以聞於朝謂藉此備禦俄人牽制日本由是朝鮮遂先後與英美法諸國立約會有興宣大院君是應者朝鮮王熙木生父也先是王年幼大院君攝政力持鎖國主義至王親政閔妃參政大反大院君之所爲開海禁聯外交大院君不平陰使都監營兵以索餉譁變藉清君側爲名殺大臣及辦外交者數人并攻日本使館戕日本數人日使花房義質跳而免亂兵入王宮殺王妃閔氏並囚國主熙與世子祐大院君餘出鎮撫之日人乘釁以兵艦至朝鮮中國命廣東提督吳長慶率兵東渡誘執大院君詔安置保定令其閉門思過其黨百餘人悉捕殺之朝王與日本訂約許以償金開埠駐兵時朝鮮政府分新舊二黨舊黨爲閔泳翊等附中國號事大黨新黨爲金玉均等附日本號獨立黨光緒十年十月獨立黨攻事大黨日本出兵助之時袁世凱爲辦理朝鮮商務委員助事大黨擊敗獨立黨日人大憤明年朝廷命李鴻章與日使伊藤博文訂約於天津載明將來朝鮮有事中日兩

國欲派兵往必先互行知照於是朝鮮遂認爲中日兩國公共保護國非中國藩屬矣光緒二十年甲午
朝鮮有東學黨之亂黨首崔福成因抵制日幣事激變中國聞之派兵往依津約照會日本日本亦派兵
往先至中國援師尙在中途而朝鮮之亂黨已悉平及中國兵亦至朝鮮大震日本以共革朝鮮內政爲
辭派兵入踞朝鮮王宮幽朝王中國拒之不從遂各爲戰備時中國將兵爲葉志超衛汝貴丁汝昌左寶
貴等率皆外強中乾不堪任戰事於是開戰以後陸師一敗於牙山再敗於平壤左寶貴死焉葉志超衛
汝貴皆遁走而水師丁汝昌亦大敗於大東溝外日兵遂渡鴨綠江入奉天境連陷九連鳳凰大連灣旅
順口海城復州蓋平營口各地宋慶劉盛休豐伸阿聶桂林依克唐阿李光久吳大徵等皆敗走龔照璵
則棄旅順船塢雜亂軍中遁日軍復自旅順渡海入山東境陷榮城文登劉公島威海衛并分遣艦隊陷
澎湖逼臺灣丁汝昌仰藥死志超汝貴照璵等皆獲罪或降革或逮問是役也中國將卒死者無算軍艦
沈燬殆盡朝廷大震於是命李鴻章爲全權大臣往日本議和先是朝廷已命侍郎張蔭桓巡撫邵友濂
往議和日人以非全權大臣拒絕之送回國故改派李鴻章鴻章馳抵日本馬關與日總理伊藤博文外
務陸奧光宗會議於春帆樓博文笑謂鴻章曰與中堂別來十年中國毫無改變成法以至於此同深抱
歎鴻章大慙及開議鴻章請先停戰博文要以大沽天津山海關爲質議不諧鴻章自會所出途遇刺客

小山豐太郎中槍傷左額創甚警耗播歐美歐美諸國皆不平日人恐乃許停戰訂約六款尋定和約十
一款又另約三款時光緒二十一年三月也認朝鮮爲自主國又割遼東半島及臺灣澎湖與日償兵費
二萬萬兩開蘇杭沙市重慶爲商埠並允其通航內地又每年貼交暫駐威海日軍兵費五十萬兩以劉
公島威海衛口灣沿岸在五日本里以內爲日軍駐紮之所華軍不得逼近或紮據所謂馬關條約是也
約既定中國乃重賂俄人聯合法德魯日本還遼東中國增償兵費三千萬兩馬關之約中外洶洶交詆
李鴻章奏疏凡百十上江督劉坤一直督王文韶鄂督張之洞爭尤力至請將李鴻章交刑部治罪朝廷
因將先後辦理緣由及不得已之苦衷明白宣示國中割臺之諭下臺灣臺民大憤激自建爲民主國舉
巡撫唐景崧爲總統總兵劉永福主軍政以抗日本未幾餉竭軍士潰土匪蜂起引日人入唐景崧劉永
福倉皇內渡而臺灣亡聞馬關和約之未定也張之洞主以臺灣予英以制日本英人不受及臺人之建
自主也又議將臺灣抵押於法亦不成至是臺灣遂爲日本領地矣

自臺灣割於日本各國皆效尤遂紛紛要索軍港及鐵路利權以擴張勢力於中國俄首以索還遼東求
報光緒二十二年李鴻章許以東三省鐵路之利權並借膠州灣爲軍港德人知之藉口山東曹州教案
突以兵艦佔膠州灣迫中國立約租借以十九九年爲還期并索膠州至濟南鐵路建築權光緒二十三

年約成俄以膠州灣既爲德據要求中國改訂新約租旅順大連灣二港爲其西伯利亞鐵路之終點以二十五年爲期鐵路所經并允俄人駐兵保護英人見俄既租旅大亦援利益均沾之例租威海衛以抵制之租期如俄國之旅順法亦效德之故智矣據廣州灣迫中國訂租借約亦以九十九年爲還期英又以法人既得廣州灣南方勢力將爲法占復索租香港對岸地廣其舊九龍界之範圍所謂大鵬灣深州灣海面悉皆在內租期亦如法國之廣州灣此皆光緒二十四年及二十五年間事也嗚呼自光緒二十一年以迄二十五年六年之間我國疆域之喪失又達數萬里所有我國險要之軍港悉爲各國所佔踞矣

第十三章

慈禧太后前在同治朝格於慈安太后在其右雖慈安務極謙讓韜晦而慈禧終尙有所戢而不敢甚肆至光緒七年三月慈安太后崩慈禧獨垂簾聽政遂惟己意之所欲爲而無所忌憚矣或曰慈安之崩其事甚秘外間不得知其詳是時惟慈禧有疾頗劇御醫治之無效詔各省督撫進良醫每日皆慈安出視朝是日晨慈安亦尙召見軍機王大臣御容怡豫無疾色午後內廷忽傳東宮太后崩人皆疑爲西宮之誤也大臣驚入內見慈安已小殮矣往例后妃薨必召戚屬入內瞻視歷朝以爲常獨慈安之喪椒房無預其事者衆咸詫爲創聞或曰是日慈安在東宮慈禧命進餅餌至慈安取而食之覺不適然亦無大苦

頃遽逝其說不知然否自慈安崩後慈禧年餘未嘗視朝用人行政往往積數日始一裁決翰林院侍讀溫紹棠因奏請太后厲精勤治太后大怒奉旨申飭是時奕訢罷政奕譞當國吏治腐壞賄賂公行就雲南報銷一案而言道員崔尊彝關說於外太常卿周瑞清包攬於內諭臣景廉王文韶等亦均受賂遺鉅萬揭參以後牽連大臣數十人其他贓營官缺賄抑冤獄者不可勝數有識者於此早知清之必亡矣其尤關鉅要者爲寵任李蓮英修治頤和園二大端奄宦禍國古今同慨覺羅氏之家法尤嚴安得海之前車不遠而慈禧寵任李蓮英視安得海倍加優渥李蓮英本河間一無賴子曾以私販硝礮繫獄後得脫改業皮工人呼爲皮硝李以內監沈蘭玉薦入侍爲梳頭房太監尋擢爲總管權傾朝右一時夤緣無恥之徒爭奔走於其門醇親王奕譞巡閱北洋海口亦請派李蓮英同往監視於是海軍諸將丁汝昌衛汝貴衛汝成葉志超龔照璵等皆奉厚贊稱受業御史朱一新因奏恐蹈唐代監軍覆轍疏中至有深宮或別有不得已之苦衷等語奉旨嚴飭鑄級而蓮英又往往侮辱大臣藐視一切莫可如何慈春之隆一時無兩園工自咸豐末年圓明園被毀後屢議修復迄無經費慈禧乃以興辦海軍爲名詔各直省年解鉅款僅提十之一二給辦海軍餘悉撥修清漪園改其名爲頤和園以爲游覽之所日夜嬉娛其中甚至以太后之尊躬親演戲以爲笑樂園內需費日須萬二千金是時內苦天災外多邊釁民不聊生太后不以

爲務而獨汲汲於園林之修治厥後甲午之敗李鴻章歎曰使當日海軍經費按年如數發給十年之內北洋海軍船礮可甲地球矣何至大敗此次之辱我不任咎也良可慨已至光緒十五年正月帝大婚皇后葉赫那拉氏爲慈禧太后弟副都統桂祥女也二月帝親政人皆以太后爲實行撤簾矣不知帝仍但廷式本爲帝所寵瑾妃珍妃之師太后以帝爲二妃故引擢私人奉懿旨降瑾妃珍妃爲貴人且命褫衣廷杖廷式褫職不叙又有御史安維峻者奏皇太后旣歸政皇上何仍遇事牽制李蓮英是何人斯敢干國政律以祖宗法制李蓮英豈可復容太后以其肆口妄言革職遣成都中諭傳蓮英惡維峻甚必欲得杖二妃逐朝臣蓄志廢立日逼帝爲蕩博之戲及吸食鴉片別令太監李蓮英及內務府人員在外廷散布流言稱帝之失德又將大興土木修圓明園連材乃長跪太后榻前流涕曰國危至此老佛爺卽不爲祖宗天下計獨不自爲計乎何忍更縱遊樂生內變也時宮中稱帝曰佛爺稱太后曰老佛爺太后以爲狂叱之去連材乃乞假五日歸訣其父母兄弟出其所記內廷事一冊授其弟記事中最要者一太后驕侈淫佚絕不以帝爲念后亦與帝不睦帝伶仃異常一帝每日御膳其饌羅列數十品然離御座稍遠

之饌半已腐臭故帝每食不飽有時偶欲易一饌品太后輒以儉德責之一太后待帝每日訓斥之聲不絕稍不遂意常加鞭撻或罰令長跪故帝見太后如對獅虎膽爲之破至今每聞鑼鼓聲吆喝聲雷聲輒變色一帝每至太后前長跪請安不命之起不敢起甲午六月高麗軍事旣起帝請停頤和園工程以充軍費太后大怒自是至乙未九月間凡十餘月不與帝交一言每日必跪至兩點鐘之久始命之起連材旣還宮上摺凡十條一請太后勿攬政權二請勿修圓明園以幽皇帝餘亦皆爲人所不敢言者太后閱之大怒召而責之曰本朝成例內監有言事者斬汝知之乎曰知之奴才若懼死則不上摺也命殺之臨刑肅衣冠望闕九拜乃就義時編修宋育仁在京師聞耗大哭曰清亡無日矣余不忍見銅駝臥荆棘中也遂棄官歸於此可見當時政柄之一班矣帝英明銳意圖治強鑿於咸豐同治以來疊經外患屢受劫盟當事者雖漸知變法創行新政不一而足如設製造局以製新械方言館以養譯才招商局以爭航利派學生以游學外國用客卿以聯絡邦交其他練兵通商造路開礦諸大端外皆次第舉行然變而不知其本故行之數十年而國勢不少振帝於此有深慮焉甲午敗後各國皆相逼而來瓜分之說騰於全球帝亟欲實行變法時帝師翁同龢輔政力贊其說而御史楊深秀侍讀徐致靖亦相繼上書請定國是帝乃赴頤和園白慈禧太后爰於光緒二十四年戊戌四月下詔國中曰數年以來中外臣工講求時務多

主變法自強邇者詔書數下如開特科汰冗兵改武科制度立大小學堂皆經再三審定籌之至熟惟是風氣尙未大開論說莫宗一是或託爲老成憂國以爲舊章必應墨守新法必當屏除衆喙嘵嘵空言無能制梃以撻堅甲利兵平朕惟國是不定號令不行極其流弊必至門戶紛爭互相水火徒蹈宋明積習於國政毫無裨益卽以中國大經大法而論五帝三王不相沿襲譬之冬裘夏葛勢不兩存用特明白宣示中外大小諸臣自王公以及士庶各宜努力向上發憤爲雄以聖賢義理之學植其根本又博采各學之切於時務者實力講求以救空疏迂謬之弊專心致志精益求精母徒襲其皮毛母競騰其口說務求化無用爲有用以成通經濟變之才詔下臣民大悅皆翹首而望太平矣先是有康有爲者於光緒十五年以諸生伏闕上書極陳時局請及時改革以圖自強格不得上二十一年又集公車千三百人上書請變法亦不達旋通籍授工部主事自是四年之間凡七上書皆寢不報乃退立強學會保國會於京師上海等處至是以翁同龢及徐致靖薦得召見帝深然其說命在總理各國事務衙門行走旋先後擢用其徒梁啟超及楊銳林旭譚嗣同劉光第等參預新政自四月至七月督責中外大臣實行新政之詔凡數十下大端如廢八股改科舉興學堂汰冗員廣言路保薦經濟特科人才刪改各衙門則例廢祀典不載

之寺廟以除迷信裁老弱無用之額兵以節糜費等當時國政實煥然一新詎是時朝臣分新舊二黨新黨爲帝黨舊黨爲太后黨舊黨以帝進用新黨不利於舊黨緣是日短帝於太后前而宮庭之間嫌隙大起先疏斥帝師翁同龢以孤帝黨帝性嚴峻遇左右宦者無少假借於是總管李蓮英尤嫉帝甚乃共爲讒閒慈禧太后遂日謀廢帝密令榮祿諷御史李盛鐸奏請帝奉太后至天津閱兵蓋欲至津脅帝而廢之也擇期九月中會帝欲開懋勤殿設顧問官命譚嗣同查歷朝成案將據以請於太后帝見慈禧太后於頤和園慈禧大震怒以帝爲輕躁浮動紊亂祖制叱其謬誤帝大懼出急召楊銳賜以衣帶詔有朕位幾不保命四卿與康有爲速設法籌救之語諸人捧詔痛哭而帝手無寸柄特擢袁世凱爲侍郎專辦練兵欲以自衛也尋帝密詔康有爲迅速出京時宮中之變已作矣革職禮部尙書懷塔布及御史楊崇伊等已密至天津謁榮祿與定圖帝之策檄調聶士成兵駐天津董福祥兵駐彰義門外令袁世凱赴天津榮祿乘專車進京與懷塔布楊崇伊等馳至頤和園上封事於太后請訓政翌晨散布謠言謂新黨謀圍頤和園欲害太后太后遂遽自頤和園還宮下詔垂簾訓政時是年八月初六日也是日晨帝尙入中和殿閱禮部擬祀社稷壇秋祭文甫出殿突有侍衛太監及榮祿軍隊稱奉太后命引帝入南海瀛臺瀛臺四面環水一面設板橋通出入臺中約有十餘室太后隨挈李蓮英至責帝曰汝自五歲入宮即帝位撫

養成人以至歸政予何負於汝不料昏昧妄爲一至於此今朝中親貴重臣無一愛戴汝者皆請予來訓政命李蓮英遴選親信太監監守瀛臺撤門外板橋以斷出入帝之太監或處死或發往軍臺無一存者令軍衛門及護軍營派兵在紫禁城分段嚴密巡邏太后初欲乘是卽行廢立飭軍機密電各省各督撫令其具覆江督劉坤一粵藩岑春煊及南洋羣島諸華商等皆抗電力爭坤一電尤激有君臣之分已定中外之口宣防等語其謀乃止是日首捕康梁而有爲先出京啟超亦已走收御史楊深秀京卿楊銳林旭譚嗣同劉光第及康有爲之弟廣仁六人殺之往例捕獲罪犯必加訊鞠深秀等被收詔命軍機大臣會同刑部都察院嚴問刑部尙書趙舒翹曰此輩無父無君之禽獸殺無赦何問爲遂徑命處斬聞者皆訝異深秀當未就逮之先猶抗疏詰問帝被廢之故援引古義痛陳國難請撤簾歸政及被縛獄中有詩十數章愴懷國事眷念外患忠盡之氣溢於言表論者方之明之方孝孺楊繼盛光第臨刑時太息曰吾屬死正氣盡其嗣子伏屍哭一日夜以死嗣同初聞變竟不出門以待捕者既而捕者未至乃與大俠王正誼謀奪門迎辟事不成正誼勸之行願以身護不可日本志士數輩亦苦勦東游復不聽曰各國變法無不從流血而成中國未聞有因變法而流血者有之請自嗣同始旣被繫頤詩獄壁曰望門投止思張儉忍死須臾待杜根我欲橫刀向天笑去留肝膽兩崑崙指康有爲與王正誼也廣仁在獄中言笑

自若高歌聲出金石臨刑語嗣同曰今八股已廢人才將輩出中國其強矣由是一時與新黨有連者如侍郎張蔭桓徐致靖及其子編修仁鑄仁鏡禮部尙書李端棻四品京堂王照三品卿銜黃遵憲湖南巡撫陳寶箴與其子吏部主事三立四品京堂江標庶吉士熊希齡湖北巡撫曾鍊等皆獲罪或發遣或革職或查抄並奪前協辦大學士翁同龢職交地方官嚴加管束前帝所頒行新政無論是非一律停罷復舊緣是變法半載之成績悉歸於烏有矣事旣定太后傳賞聶士成軍銀六千兩袁世凱軍四千兩董福祥軍三千兩是之謂戊戌之政變嗚呼帝自十五年以來名爲親政而手無尺寸權康有爲等不審其實質貿然要求以種種創見駭聞之大改革其敗也不亦宜乎若慈禧太后自同治以後已三次臨朝矣前猶得藉幼主爲口實然已大違祖宗之法制戊戌之舉則又復何說明年廢立之議又起欲立端郡主載漪之子溥儕爲皇帝康有爲梁啟超等在海外聞之聯合華僑立保皇會電致政府力爭朝廷懸賞購拿上海紳商知府經元善等三千餘人志士蔡元培等及海外僑民數十萬亦相繼電爭各國亦皆不允太后不得已乃祇詔立溥儕爲大阿哥以繼穆宗後而廢帝之議又已是時湖南志士唐才常亦在上海設立正氣會尋改爲自立會與康有爲等爲內應舉容閔爲會長唐才長爲總幹事林圭及沈蘆爲幹事其旅館在漢口者曰賓賢公襄陽曰慶賢公沙市曰制賢公荊州曰集賢公岳州曰益賢公長沙曰招賢公

廣發富有票聯絡各省營兵及會黨分立五軍大通爲前軍秦鼎彝統之安慶爲後軍田邦璣統之常德爲左軍陳猶龍統之新堤爲右軍沈盡統之漢口爲中軍林圭統之唐才常任爲各軍總統初約光緒二十六年七月十五日起事以部署未定屢愆期而二十五二十九會事機不密爲鄂督張之洞所知事遂敗乃於舉事前二日爲二十七日捕繫唐才常等二十餘人於漢口湘撫余廉三亦訪獲唐才常之弟才中等於瀏陽先後皆見殺湖南之黨人多爲廉三所捕斬一時志士駢死者百餘人大通新堤軍先舉事亦皆敗走或曰唐才常之自立會與康有爲之保皇會其宗旨絕殊觀其序言有曰低頭腥羶自甘奴隸又曰非我族類其心必異此爲自立軍之真相也其所以稱勤王者以內地風氣未開聞談民權變法者莫不色駭而却走唐氏深知之非藉忠君愛國之名不足以號召天下嗚呼唐氏之心益良苦矣

清史要略

第四編 滅亡時期

第一章

瑞安陳懷孟沖編輯

清自甲午之敗藩籬已大破至庚子之亂而大局遂不可收拾矣是時慈禧太后以謀廢立故爲外人所持不成意憤甚日夜圖攘夷端王載漪因其子溥儕立爲大阿哥屢諷各國公使入賀不應且有違言亦憤甚協辦大學士剛毅夙有嫌於帝亦因而並仇外人於是遂釀成庚子之亂光緒二十六年庚子夏五月朝廷招集義和拳以破滅洋人義和拳本名梅花拳又稱金鐘罩爲白蓮教遺孽其祖師爲洪鈞老祖梨山聖母蓋始於嘉慶時至光緒中葉其黨彌滿於山東曹州沂州等縣以仇殺洋教爲名光緒二十五年殺英教士卜克斯時毓賢撫山東英公使訴諸朝廷詔撤任而以袁世凱代之一意主剿東境以安餘黨竄入直隸毓賢時簡晉撫欲建奇功以自贖知太后意嫉外人乃貽書朝貴謂義和拳皆義民有神術可用之以滅洋人載漪剛毅等深然之以白於太后時裕祿爲直督遂聽其蔓延於是拳民益公倡邪說號召鄉愚言有神附其身即精武藝不畏鎗礮故又稱曰神拳其宗旨自謂扶清滅洋凡遇洋人及入洋教服洋服通洋語用洋貨者輒殺之又有紅燈照者其會皆十餘齡女子左手持紅燈右手持紅巾亦云

有術人皆呼爲師姑與之相輔而行沿途焚劫掘鐵路毀電線燒教堂殺教民裕祿皆不之究且待之如上賓而鄉里無賴棍徒持義和拳三字名帖即可身入衙署與總督分庭抗禮匪中頭目如曹福田張德成韓以禮等裕祿爲之稟名入奏加以考語朝廷優答之命剛毅與順天府尹趙舒翹前往查視二人回京覆命言天降義和拳以滅洋人請太后召集爲團練以端王統之莊王載勛貝勒載灃輔國公載瀾左都御史英年大學士徐桐及其子侍郎承煜與總管太監李蓮英力質其說大后遂密令招集入京召見大師兄曹福田獎其義勇賞銀二千兩慰勞有加於是諸親貴爭相信從設壇建醮棚場殆遍王公府第及大公主邸皆招集拳民以爲保護滿漢各營卒亦居大半詔命載漪管理總理各國事務衙門禮部尙書啟秀工部侍郎溥興內閣學士邢桐均在總理各國事務衙門大臣上行走檄調甘肅提督董福祥率兵入衛福祥本降匪所部甘勇亦皆匪徒素無紀律旣入京遂與拳民合攻教堂焚掠街市火勢蔓延至萬餘家之多燒及城闕烟燄三日夜不絕甘勇又戕殺日本公使館書記官杉山彬裂其屍於道時巡閱長江水師大臣李秉衡亦帶兵入京力言拳民可用拳民之勢益盛而禍益烈會直督裕祿奏報洋人力索大沽礮臺請朝廷即與宣戰太后大怒卽召軍機會議載漪啟秀邢桐復呈上外交團照會一件內請太后歸政廢大阿哥並許聯軍入京其書爲載漪命軍機章京連文冲僞造也太后閱之益怒曰彼族竟

敢干預我家事此能忍孰不能忍誓必報之載漪因請攻使館大學士榮祿以爲不可太后叱之出宣帝至厲聲曰皇帝自認不克執掌政權豈外人所能干預諸臣當同心協力以報國家問帝意何如帝遲疑久之乃請太后聽榮祿言弗攻使館太后弗聽刑部尙書趙舒翹請發明諭滅除內地洋人以絕間諜吏部侍郎許景澄太常卿袁昶皆力爭載漪斥爲漢奸戶部尙書立山以謂拳民烏合術多無效載漪憤然曰用其心耳奚問術乎內閣學士聯元亦言使臣不可不保載漪怒請詔誅左右力救獲免自是無敢進言者帝持景澄手泣曰一人死不足惜如天下何太后陽慰解之叱景澄出卽日下詔宣戰傳諭各省率兵入援南省督撫皆不奉詔江督劉坤一粵督李鴻章東撫袁世凱等皆電請保衛使臣太后皆不聽出示懸賞殺一男洋人者賞銀五十兩殺一女洋人者賞銀四十兩殺一洋孩者賞銀三十兩於是德使克林德被戕載漪命以首級梟示東安門袁昶力爭乃止昶爲之棺殮之自是拳燄愈熾首禍諸人皆揚揚得意甚而尙書啟秀又言五台僧普濟有神兵十萬請召入京會殲逆夷知府曾廉編修王龍文亦請引玉泉山水淹灌使館學士彭青藜御史劉宗謨彭述徐道焜陳嘉言郎中左紹佐主事萬秉鑑等皆紛紛獻攘夷之策狂言怪誕不可思議載漪遂令焚燒順治門法教堂又命甘勇縱火翰林院冀以延燒使館也太后皆立宮中高石上觀之是時東南各省督撫自與各國駐滬領事訂立東南保護條約不奉朝廷

詔命而東北各省文武大吏奉令召集拳民殺戮洋人惟謹幾於全體一致晉撫毓賢尤甚老弱婦孺無一漏網者優詔嘉獎榮祿切諫太后笑不聽時各國公使已告急於其本國英俄德法美日奧意八國遂聯軍進攻大沽礮臺陷之總兵羅榮光戰死尋進攻天津會一日大阿哥呼帝爲鬼子徒弟帝泣訴於太后嚴責之載漪大怒率領拳匪入宮聲勢洶洶呼殺鬼子徒弟太后聞大怒叱載漪出斬匪首一名於外宮門以載漪爲荒謬不可恃各國兵將入京下諭停攻使館命榮祿赴使館議和適裕祿自天津馳電至報大捷洋兵在津僇滅幾盡太后之宗旨又變主戰剿矣聯軍攻天津以綠氣礮轟擊提督聶士成陣歿天津又陷綠氣礮者實毒藥於礮彈中人觸其氣立死爲文明戰爭所厲禁聯軍以野蠻視拳民故特用之朝廷亟詔調李鴻章督直令即日北上鴻章七電言不能速行且謂太后非改變政策不可許景澄袁昶因請剿拳匪懲禍首太后怒命車裂以殉以大學士王文韶諫改命立斬又傳諭殺前侍郎張蔭桓於新疆戍所尋又命殺立山聯元及兵部尙書徐用儀聯軍節節北上將入京朝廷懼復下詔停攻使館命榮祿派兵護送各國公使往天津授李鴻章爲全權大臣命電商各國停戰議和鴻章請立將妖人正法罷黜信任邪匪大臣誠心議和方可北上否則徒死於亂兵妖民之手於國毫無益也是時楊村又失守裕祿自殺詔授李秉衡爲欽差大臣往河西塢視師秉衡率拳民三千人以從親拜其大師兄擁引

魂幡混天大旗雷火扇陰陽瓶九連環如意鉤火牌飛劍八寶以行秉衡至河西塢連戰皆敗績死者無算秉衡走通州聯軍又進據通州秉衡走至武清之馬頭兵潰仰藥死警報至北京榮祿入告君臣相對泣太后始欲奔熱河繼言出走不如殉國令帝殉之榮祿力諫請降諭斬載漪等首以謝外人時太后猶望拳民有術可救北京是日召見榮祿八次載漪五次軍機五次皆默對無一言聯軍至京董福祥迎戰於廣渠門外敗績縱兵大掠而西聯軍先後入京是日黎明太后與帝易裝漢民農服出奔珍妃請帝留京以鎮人心太后命李蓮英推墜之於井中遂與帝徒步出宮北門乘驛車行從者溥儏奕効載漪與剛毅那桐趙舒翹等大臣數十人時是年七月十九日也京城陷各國畫界佔守四出剿捕拳民星散徐桐崇綺自殺榮祿遁至保定旋赴行在其餘小臣留京者爲洋兵所陵辱不堪間矣太后與帝在途下詔罪己並宣布將狩太原八月至大同命慶親王奕効會同李鴻章劉坤一張之洞商辦和議尋太后與帝至太原命開毓賢巡撫缺以錫良代之李鴻章奏陳各國之意皆請回鑾不允於是西狩西安奕効李鴻章在京與各使會商議和各使索懲罪魁急指名端一董二莊次及剛毅爲四凶鴻章再四辯護迄不允聯軍統帥瓦德西曰我今所列罪魁皆其從者首罪不便言其意蓋指太后也鴻章因亟電告行在太后不得已將首禍諸臣皆革職各使仍不允奕効李鴻章又電奏和議大綱十二條其要旨爲派遣親王代表

皇上至德致信戕害德使優卹戕害日本書記官嚴懲肇禍諸人分別斬決賜死永禁及永不叙用凡百餘人昭雪冤殺各員賠償卹款及兵費海關銀四百五十兆兩許各國自駐兵隊護衛使館平毀大沽等處礮臺永禁軍民人等仇視各國改變總理各國事務衙門並改各國駐使觀見禮節且言各國詞意決絕不容辨論宗社陵寢均在他人掌握存亡之機閒不容髮請速裁覆太后意遲疑不能決會張之洞致電辨難太后乃命奕劻等再設法磋商李鴻章謂樞臣不知敵情張督作官數十年亦猶書生耶旋各國擬備哀的美敦照會卽戰書也事將決裂奕劻等亟電聞又聞各國有另立政府之謀擬戴李鴻章或袁世凱爲中國皇帝太后懼因照允時爲二十七年辛丑正月也命載漪載灃均發往新疆永遠監禁載勦賜自盡毓賢正法英年趙舒翹斬監候董福祥革職剛毅追奪原官徐桐李秉衡革職撤銷卹典開復已故兵部尙書徐用儀戶部尙書立山吏部侍郎許景澄內閣學士聯元太常卿袁昶原官並復已故戶部侍郎張蔭桓原官降諭宣示拳匪構亂朝廷一切委曲難言之苦衷並彙呈二十六年五月二十四日以後七月二十日以前諭旨將所有矯擅妄傳各旨提出銷除命既下各使以加懲禍首仍有未允爲辭因再詔命加重將載漪載灃定爲斬監候加恩發往新疆永遠監禁英年趙舒翹賜令自盡添入啟秀徐承煜正法餘照前辦理又降諭懲處各省不能實力保護教士牧民之地方官共百餘人撤去溥儏大阿哥

名號賠償各國卹費四百五十兆兩命醇親王載灃赴德那桐赴日致謝改總理各國事務衙門爲外務部位在各部上毀大沽礮臺及天津城事既定李鴻章卒八月太后與帝自西安啟程回鑾至十一月始還京師太后與帝見臣工涕泣引咎不止清廷於此遂不能復振矣

第二章

當義和拳之亂俄人一面與七國聯軍合攻京津一面獨自進兵佔齊齊哈爾黑龍江將軍壽山死焉尋又次第據吉林破營口奪遼陽入奉天關東三省幾盡爲俄之屬地矣及聯軍議和俄人藉口於前光緒二十二年李鴻章赴彼國賀加冕時曾訂密約得有東三省鐵道礦務軍港駐兵之特權東三省事應另歸兩國自行商議與聯軍入都別爲一事至聯軍知約成俄另提出議訂交還東三省條約要索甚苛李鴻章將許之東南疆吏劉坤一張之洞及各省士紳皆力爭日本亦以俄迫還遼東又與彼爭朝鮮故憾俄甚欲藉是以圖報復乃會同英美兩國相與抗阻俄之另約遂不成爰與各國合立公約分期撤兵還至期各國皆按約撤兵惟俄據遼東之兵不肯撤重增兵佔據奉天等處中國不敢出一言以相責問雖外省督撫疊電請戰士民紛紛倡立義勇隊與對俄同志會等朝廷皆嚴旨謝絕之惟聽日本與俄之協商俄人藉辭支吾事乃決裂兩國各下旗歸國刻期決戰其戰地悉在中國與朝鮮界內朝鮮介乎兩

大國之間日夜惶懼不能以自保對於兩國之戰事自不敢過問中國新受大創亦任其擾閩甘居局外宣告中立是時俄之海軍厚集於旅順而分駐於海參崴陸軍則厚集於奉天而分布於朝鮮之北境日人爲先發制人之計乃於光緒二十九年十二月乘俄人之未備突以海軍襲攻俄艦隊於仁川俄海軍大敗臺艦沈沒統帥淪亡者頗衆明年春日人遂乘勝渡鴨綠江下安東克九連城破鳳凰城同時俄陸軍亦挫於定州於是日麾所指俄軍望風披靡矣夏日兵分爲二軍第一軍攻佔岫岩之大孤山由大孤山上陸佔據金州以絕旅順之援第二軍又攻佔熊岳城進陷蓋平俄兵腹背受敵日人遂佔大石橋營口牛莊及析木城海城等處俄兵死者萬餘人俄自出師以來軍士皆疾視政府無勵志故連戰皆敗績警耗至俄京俄皇憂憤廢寢食其國內革命黨又起波蘭亦謀獨立俄之國勢岌岌乎危矣秋日第一軍又連敗俄軍於細河沿湯河紅沙嶺大西溝孫家砦弓張嶺雙廟子石嘴子大西蠻嶺香山子益友溪孟家坊等處第二軍亦連敗俄軍於雷家堡黑牛屯余家臺曹方屯壞瓦溝新立屯徐上堡等處俄軍遂不支退保遼陽日兵亟追之燬遼陽車站迫壓俄軍至太子河右岸俄軍擠入河水死者無算日人遂得佔領遼陽全部矣時中國日望日俄之議和俾歸我東三省各國亦以俄人經如此之鉅創當必出於和而俄人偏若不甚措意惟日夕籌備波羅的海艦隊東行思大逞志於日本以雪恥於是各國皆相顧失色

中國亦亟飭沿海各省戒嚴冬俄國旅順守將又出降於日本日人遂得進佔旅順城初日本海陸軍圍攻旅順苦戰經年不獲下始而仰攻繼而堵塞終而決鬥大小數十戰皆無效是年秋奮力大攻頃擬於日皇誕日必長驅陷落以爲慶賀然亦不能得至是俄守將力竭餉竭忽自將礮臺及兵艦等悉數炸毀詣日營乞降非日人之所及料也三十一年春日人又敗俄兵於奉天省城據之俄人退守鐵嶺又爲日兵所敗退開原又敗績夏俄波羅的海艦隊又爲日兵截擊於日本海之對馬島海峽殲焉日兵益乘勝窮追連敗俄兵至庫頁島據之秋八月美國出爲調停日俄兩國各派使臣抵美之朴子茅斯城會議和約磋商月餘始成約計十條其大要爲許日本在朝鮮得有最大之權日俄兩國各撤退滿洲駐兵俄將滿洲交還中國中國開放滿洲門戶庫頁島日俄兩國各得一半俄割讓哈爾濱以南鐵路權予日本又償日本供養俄國俘虜費日金一百五十兆是役也自光緒二十九年十二月至三十一年八月歷二十一月乃定其結果東三省之主權名雖歸還中國而實則自長春以南爲日本勢力之範圍長春以北爲俄國勢力之範圍中國徒虛有其表而日俄兩國之協謀至今仍未已推原禍始皆由於李鴻章之密約貽之也或謂鴻章憤爲日人所刺傷積不能平俄人陰窺其意爲甘言以誘之鴻章墮其術中而不覺在彼之意冀以雪前忿而杜後患也而不知養虎適以自噬鴻章之謬誤雖百喙不能以自解矣日俄之戰

既定日人以伊藤博文爲朝鮮統監已居然視朝鮮爲彼掌握中物矣而朝民深憾之故至光緒三十二年朝鮮有志士安重根者狙刺伊藤博文於哈爾濱朝人又密議派使至海牙萬國和平會求援助藉以脫日本之羈縛三十四年日本遂乘是以攻陷朝鮮滅之朝鮮遂完全爲日本之領地矣是時俄人又與英人爭西藏初中日戰爭以後藏人知中國之不可恃欲結援於俄以禦英及聯軍陷北京中國之威信掃地俄遂與藏結密約至日俄開戰英人乘其時俄兵不能南下急率遠征隊襲破西藏與中國駐藏大臣有奏議改前光緒十六十九等年所訂藏印條約而西藏之實權全歸於英於時俄德美意四國公使皆起而抗議俄國尤激烈聲言中國對於英國若輕易開放西藏則中國須將庫倫新疆等地權讓俄由是藏印之改約暫廢旋朝廷又命外務部侍郎唐紹儀赴印度與英使議改約磋商年餘舌瘡筆秃迄無成議至日俄戰已俄人已自有特別之利權而中英藏印之改約始成於北京於是西藏之事權遂悉受英人之干涉西藏不啻爲中英兩國之公同保護國矣嗚呼朝鮮中國之藩屬也而任日俄之攻奪西藏中國之土地也而聽英俄之戰爭滿洲爲有清祖宗發祥之地而爲日俄兩國勢力之鷄圍中國尙復有主權之可言耶厥後雲南邊境片馬之地復爲英人所佔中國益莫能與之爭悲夫弱國與強國交涉殆無有不失敗者

第三章

慈禧太后經庚子之亂恍然知排外之非計因亟思改革以圖補救乃於光緒二十六年冬在西安行在輒下詔變法臣民聞之大悅自是以後新政迭頒如二十七年詔設督辦政務處清釐京外各衙門例行文藉裁汰京外各衙門書吏及差役整頓翰林院課編檢以上各官以政治學復開經濟特科停止捐納實官命直省河運海運一律改徵折色改各省書院爲學堂命京師先立大學堂派管學大臣管理大學堂事宜詔各省選派學生出洋肄業准滿漢通婚二十八年復詔廢八股改鄉會歲科各試用策論停止武科籌建武備學堂歸併詹事府於翰林院令新進士授職翰林部曹中書者皆入京師大學堂分門肄業裁撤東河總督開館編纂新律簡派出洋遊學生監督二十九年頒布學堂章程改管學大臣爲學務大臣訂商律設商部設立練兵處三十年詔裁粵海淮海關監督及雲南湖北巡撫三十一年詔裁廣東巡撫設學部巡警部考試出洋畢業學生賜舉人進士有差停止鄉會試及歲科各試刪除凌遲梟首戮屍三項重刑三十二年詔升孔子爲大祀頒定教育宗旨設立各省提學司頒行破產律嚴禁鴉片限十年以內種吸連一律淨絕是歲又下詔預備立憲其原因鑒於日俄之戰俄以專制而敗日以立憲而勝於是中國士大夫遂紛紛主張改專制爲立憲恐專制之不容存在於今日之世界也朝廷迫於公論亦

不能不爲立憲之籌備爰先於光緒二十一年夏詔派載澤戴鴻慈端方徐世昌紹英五人爲考察政治大臣分赴東西洋各國考求憲法是爲立憲之起點秋載澤等五大臣行甫抵正陽門車站突遇吳樾張榕二人攜炸彈迎擲五大臣於車中吳樾張榕素具種族思想日夜謀炸鐵良以鐵良在滿族中爲最知兵至是聞載澤等出洋考查憲法恐立憲成清廷之國基鞏固益不利於漢族乃以炸鐵良者轉而炸載澤等不料惟載澤紹英二人微受傷餘皆無恙而樾之下體已碎遂自斃榕變名姓遁去紹英徐世昌懼不敢行於是改派尙其亨李盛鐸二人冬命政務處籌定立憲大綱設考察政治館是年秋載澤等回國因宣示預備立憲之諭旨先行釐定官制內閣軍機處外務部吏部學部禮部皆如舊改巡警部爲民政部戶部爲度支部兵部爲陸軍部商部爲農工商部添設郵傳部又改理藩院爲理藩部歸併財政稅務二處於度支部太常光祿鴻臚三寺於禮部練兵處太僕寺於陸軍部又改刑部爲法部專任司法大理寺爲大理院專司審判又改政務處爲會議政務處改軍機章京爲實官設京師內外城總廳明年三十年改盛京將軍爲東三省總督奉天吉林黑龍江各設巡撫各省按察司改爲提法司增設巡警勸業道裁撤分巡分守各道各省審判廳命按地分年逐設限十五年辦齊設禮學館軍諮府改考察政治館爲憲政編查館歸併會議政務處於內閣再命汪大燮于式枚達壽三大臣分赴英德日本三國考察憲

政尋又命達壽回國改以李家駒代之詔京外大臣薦舉人才命各部院設立統計處各省設立調查局詔設資政院及各省諮詢局三十四年頒行資政院及各省諮詢局章程並各議員選舉章程又頒違警律是年八月頒布憲法大綱暨議院法選舉法要領及議院未開以前逐年應行籌備事宜令刊列謄黃分發在京各衙門在外各督撫府尹司道懸掛大堂責成依限辦理每屆六個月將籌辦成績臚列奏聞溯自光緒二十六年冬以迄三十四年秋凡八年所有各項新政皆已次第頒行其規模亦似燦然足觀矣而國勢日益頽國事日益非抑何故歟不知其名雖是其實則遠甚觀所行之新政類皆枝枝節節而爲之而又大率徒改易其形式而絕乏精神此不過聊以粉飾觀聽遷延歲月耳故連年紛更而迄無效果況其所頒之憲法又皆由皇帝欽定不許人民干預故人皆稱爲欽賜之憲法其用意可灼然見矣而所派考求政治製定憲法及辦理各新政之人又皆親貴大臣泄沓敷衍毫無實心且更專擅自用壓抑人民無異往日如諭禁學生干預政治及不許京師開會演說等事不一而足而又刑律既改沈盡以鞭背而死獄中言路既開趙啟霖以奏參道員段芝貴購歌妓楊翠喜獻貝子尙書載振超擢黑龍江巡撫而奪職禁煙之詔令厲下而親貴大員大都皆公然肆吸而毫無忌憚官吏莫敢如何他如官箴廢弛賦案纍纍習視故常恬不爲怪嗚呼以是而言立憲非所謂差其質而虎其皮者哉適越而故北其轍其不

欲至也審矣是年冬十月二十一日帝崩在位三十四年年三十有七謚曰景皇帝廟號德宗先是帝患疾甚太后亦不豫詔授帝弟醇親王載灃爲攝政王至帝崩之前一日太后命取攝政王載灃之子溥儀入宮醇王太福晉大哭抱之不肯釋手以太后爲既殺我子復戕我孫名爲皇帝實等幽禁耳諸臣婉勸始釋溥儀旣入宮令皇后鞠之年僅三歲次日帝崩奉太后詔以溥儀即皇帝位嗣穆宗後兼承大行皇帝之祧以攝政王爲監國尊慈禧太后爲太皇太后大行皇后爲隆裕皇太后改明年爲宣統元年翌日太皇太后亦崩是時都中謠言四起或謂德宗未崩之前數日太后病瀕憊甚有譖德宗於太后前者謂帝聞太后病殆有喜色太后勃然怒曰我不能先彼死於是命禁門增兵衛稽出入伺察非常十九日內闈出東華門淨髮卽昌言駕崩矣次日寂無聞至二十一日皇后入省帝於瀛臺寢宮不知帝氣何時絕也哭奔告太后惟聞長嘆而已其說之然與否不可得而知也我聞德宗自入承大統以來失禮於慈禧太后非一日矣常自言不能爲亡國之君太后益嫉之戊戌政變後幽廢瀛臺日坐無聊西安回鑾仍處瀛臺韜居養晦絕不聞政事徒寄位而已德宗崩時有人見其病室中陳列極陋一土坑前置泥火爐裱壁破爛雖貧民之居亦不啻也而慈禧則自西狩東歸痛經鉗創仍復奢恣自肆逾於昔日增修頤和園日夜歌舞遊宴於其中流連荒惑以迄於終清之滅亡不亦宜乎或曰慈禧太后爲葉赫之族初太

宗滅葉赫屠戮之慘目不忍覩耳不忍聞而男丁罕免者部長布揚古臨歿憤言曰吾子孫雖存一女子亦必覆滿洲以復此讐以此清之祖制宮闈不選葉赫氏文宗違祖制而選之德宗后隆裕太后又爲慈禧太后之姪女慈禧太后寵太監安得海李蓮英隆裕太后亦寵太監小德張貪賄驕倨甚於安李清室遂由是而滅亡其殆天歟

第四章

自光緒三十二年宣示立憲以九年爲預備之期而數年以來籌備之事大率有名無實人民頗失所望至是宣統改元攝政王欲一新國人之耳目爰再下詔申明實行預備立憲降革各省官吏玩誤憲政者若干員頒行府廳州縣及城鎮鄉地方自治章程是年九月一日爲各省諮詢局開會日期降諭誥誠議員及各督撫詞頗懇摯人皆以謂憲政自此當駿駿有起色矣詎知攝政王之意仍如慈禧太后之徒具文飾而無誠心初光緒三十三年御史陸寶忠江春霖給事中忠廉等先後疏請開國會不允尋都察院又代遞湖南舉人蕭鶴祥等條陳請速開國會並交政務處一並議駁至是各省諮詢局成立有直隸諮詢局議員孫洪伊聯合各省諮詢局諮詢員及人民等二十餘萬人於宣統元年冬及二年夏連次入都請願速開國會亦皆見拒奉詔仍俟九年籌備完全再行降旨召集國會二年秋資政院亦成立資政院

議員大半由皇帝欽派人皆稱爲欽賜議員是年冬各省諮議局及各人民代表等又聯合入都爲第三次請願速開國會並請組織責任內閣而資政院議員亦決議上請朝廷不得已始詔允於宣統五年召集國會三年先行釐訂官制組織內閣編定憲法於時論者謂朝廷含國會而先組織內閣當國會未開之先所謂責任內閣者將何所附麗且人民請願皆云責任內閣而詔刪責任二字無責任之內閣爲我國向來所夙有何俟宣統三年而始成立又何俟再下詔書爲之規定況當是之時一方下詔縮短籌備之年限一方降諭所有各省代表人等著民政部及各省督撫剏切曉諭令其卽日散歸各安職業尋又命民政部與步軍統領衙門將東三省請願速開國會代表送回原籍不准逗遛並命各督撫開導彈壓如有違抗查拏嚴辦尋又發遣天津人溫世霖於新疆以其在天津組織第四次國會請願也於是人民悉知朝廷之意旨矣故雖先後遞頒法院編制法暫行新刑律幣制則例三年預算案及申諭各省停止刑訊設立各省審判廳等而皆不愜於人心世人至目之爲僞立憲蓋以議院之議決與政府之施行往往歧出不生効力且議決借款及預算爲議院惟一之特權而朝廷亦得專擅獨斷不許資政院開臨時會議其他皆爲敷衍之計不問可知且更有乖違立憲之原理者爲親貴之擅權初光緒三十二年第一次釐訂官制除奕効向爲軍機處領袖大臣外其餘十一部尙書則那桐溥頤溥良鐵良壽耆榮慶載振

等滿族占居其七至是宣統三年爲第二次釐訂官制組織新內閣仍以奕効爲總理大臣以那桐爲協理大臣其餘十國務大臣則善耆載澤蔣昌載洵紹昌溥倫壽耆滿族又居其七此外軍諮大臣則又屬之載灃毓朗全閣之中皇族居其大半故人皆稱爲皇族內閣各省諮議局議員以其不合立憲之公例聯同呈請都察院代奏請朝廷另行組織內閣奉旨申飭以黜陟百司係君上大權議員不得干預嗚呼以一國之政權而私之一家之親貴猶自命曰立憲其誰信之哉先是御史江春霖已痛參奕効爲老奸竊位多引匪人如直督陳夔龍爲奕効之乾女婿皖撫朱家寶之子朱綸爲奕効子載振之乾兒詔斥其荒誕不經江春霖益力爭之奉旨著回原衙門行走給事中陳田御史趙炳麟胡思敬等先後籲請收回成命皆不允於是全臺激憤聯名上疏謂言路無所遵循請明降諭旨亦不省四川提學使趙啟霖聞之又抗疏嚴劾奕効皆留中不報江春霖趙炳麟趙啟霖三人皆爲當日臺諫中之錚錚者時有三霖之日彈疏雖不中而人皆引爲大快而朝廷以親貴故袒護之且倍加信任焉嗚呼是時清室之亡象已逼近眉睫而朝廷猶如此倒行逆施其殆所謂大愚不靈大惑不解者歟自光緒戊戌以後朝廷日防黨人如光緒二十九年厲禁各省革命黨排滿之風說三十三年斥罷暗通報館分布黨羽之大學士瞿鴻璣等其明令也而不知黨禁愈嚴黨人亦愈多黨禍亦愈亟如光緒二十二年中日戰後興中會領袖孫文等

先起事於廣州敗遁走抵英爲駐英使臣龔照璵所誘獲尋得脫二十六年即爲唐才常之變而孫文之黨鄭弼臣等亦起事於惠州餉竭潰散是年冬華興會領袖黃興陳天華宋教仁等亦謀事於長沙事洩亡日本三十一年即爲吳樾之變三十三年光復軍首領徐錫麟與其黨陳伯平馬宗漢等鎗斃巡撫恩銘於安徽就獲剖心死自謂并欲次第殺端方鐵良良弼也是年冬孫文又與黃興等合立同盟會由^或南攻廣西之鎮南關奪礮臺尋以軍火不繼敗走明年孫文又與黃興等會攻雲南之河口並佔南溪壩酒等地旋又敗退至是宣統元年安慶馬礮隊官熊成基乘秋操起事率衆襲城不得入遁去後於哈爾濱被捕死於吉林二年汪兆銘等謀刺監國攝政王載灃於北京事洩被獲永遠監禁三年溫生才刺殺將軍孚琦於廣州就獲死黃興與福建林文江趙聲安徽宋玉琳等由香港入廣東攻督署敗黃興趙聲縋城出還走香港餘死者七十二人叢葬於黃花崗趙聲尋死於香港於時革命黨之事雖屢敗而革命黨之志彌堅忍不少衰會朝廷擬將各省鐵路收歸國有激動全國人民之公憤革命黨遂藉是以圖大舉鐵路收歸國有之議發之者御史石長信主之者郵傳大臣盛宣懷爲新內閣成立之第一政策由政府借英法德美四國款千萬磅尋又加入日本借款千磅以爲收回鐵路之基金宣示國中凡全國幹路均歸國有將從前批准商辦鐵路舊案一律取銷停止川楚鐵路租股宣布收回川粵漢鐵路辦法一

時川鄂湘粵四省人民爲之大譁以川粵漢鐵路始由政府售與美商合興公司竭四省人民之血資僅得爭回集股自辦組織甫成朝廷忽借外債以收歸國有不啻奪四省人民之生命財產以授之外人故有擬舉代表赴京抗爭者有議俟諮詢局開常年會不赴召集而工商同時罷業以爲後應者紛議未決會湘撫楊文鼎川督王人文代兩省諮詢局奏請收回成命俱奉嚴飭御史趙熙歐家廉又據鄂粵兩省民情入告皆謂力能自辦不甘借債亦無効果乃退而商爲自保之策設立保路同志會以反抗政府就中川人士尤激烈無何朝廷以趙爾豐代王人文爲川督拘保路同志會會長鄧孝可及諮詢局議長蒲殿俊副議長羅綸等十餘人於署中人民相率至署求釋放衛隊開鎗擊斃四十餘人以致激成民變趙爾豐乃以謀亂入告於時各省諮詢局皆大起公憤而浙江諮詢局議長陳黻宸首電請速斬盛宣懷趙爾豐首以謝天下朝廷不省命督辦大臣端方帶兵入川復起前粵督岑春煊馳往會同趙爾豐辦理剿撫事宜岑春煊先至武昌與鄂督瑞澂商議不合趙爾豐又恐岑春煊至則川事真相畢露乃僞稱川亂敉平岑春煊遂不行朝廷以川事辦理迅速嘉獎趙爾豐瑞澂等功人民於是益大不平憤莫能制而革命軍遂大起於武漢武漢爲南北樞要先是革命軍已屢議在此舉義以防範頗周未敢猝動至是鐵路事起川省難作鄂督瑞澂遣兵西援而武漢空虛革命軍遂潛運鎗彈尅期起事而又爲瑞澂所知大事

搜捕並疑及新軍革命軍遂聯合新軍號曰民軍於宣統三年八月十九日大舉攻督署瑞澂倉皇遁走民軍遂據武昌旋佔漢口並有漢陽之兵工廠第二十一混成協統黎元洪爲都督照會駐漢各國領事聲明從前條約皆繼續有效極力保護各國商民財產權利俾令安心嚴守中立又一面禁殺掠維治安人民大悅京師戒嚴不一月間各省皆景從湘撫余誠格聞警遁走湘人舉礮隊營長焦大竑爲都督尋兵變焦大竑被戕改舉諮議局議長譚延闔爲都督贛九江先舉五十三標標統馬毓寶爲都督南昌又舉十七協協統吳介璋爲都督巡撫馮汝驥自殺尋介璋告辭改舉彭程萬爲都督尋又辭迎九江都督馬毓寶爲贛全省都督陝舉張鳳翹爲都督巡撫錢能訓出走晉舉混成協統閻錫山爲都督巡撫陸鍾琦父子死之清廷命第六鎮統制吳祿貞爲晉撫以祿貞爲民黨鉅子欲解其兵柄也尋遣人刺殺之於石家莊營次演舉三十七協協統蔡鍇爲都督總督李經義先避免黔舉新軍教練官楊盡誠爲都督巡撫沈瑜慶出走浙舉浙路總理湯壽潛爲都督巡撫增韞被拘尋釋之蘇舉巡撫程德全爲都督滬已先二日舉陳其美爲都督桂舉巡撫沈秉堃爲都督尋秉堃託故辭改舉提督陸榮廷爲都督皖舉巡撫朱家寶爲都督尋家寶避去改舉孫毓筠爲都督粵將軍鳳山被炸死粵人舉總督張鳴岐爲都督鳴岐陽允棄去改舉胡漢民爲都督閩舉第十鎮統制孫道仁爲都督總督松壽將軍樸壽死之海軍各艦亦

多歸附民軍於時清廷大震懼諭開黨禁釋汪兆銘等於獄下詔罪已罷親貴執政命資政院會議憲法先將憲法內重大信條十九條議定刊刻謄黃宣示天下而民心大去朝廷之詔諭不足以取信於人各省皆已紛紛獨立不可收拾朝廷因急電召袁世凱初命爲湖廣總督節制軍隊繼促其入京組織內閣初宣統帝之入繼大統慈禧太后主之張之洞成之也而袁世凱不與焉故宣統帝初卽位輒命開去袁世凱軍機大臣缺令其回籍養疴或曰攝政王之意本欲置之於死地也或曰是隆裕太后述德宗之遺言欲殺之攝政王不忍乃去其職而放歸田里也至是事亟朝廷之人不得已而又召之攝政王載灃慶親王奕劻皆退歸藩邸舉國全權悉委之於袁世凱或曰此次袁世凱之出與民軍皆已有成約而清廷未之知也時川中亦起響應舉諮議局議長蒲殿俊爲都督前總督趙爾豐署總督端方皆被殺尋兵變蒲殿俊避免改舉陸軍小學總辦尹昌衡爲都督魯撫孫寶琦亦已宣告獨立尋又取銷民軍大舉攻南京總督張人駿將軍鐵良江防會辦張勳等死守不能下越一月始告克張人駿鐵良乘日艦走青島張勳走徐州蘇都督程德全移駐南京同時奉天伊犁庫倫等處亦相繼獨立清廷益無可爲矣民軍既克南京乃遂組織中華民國政府定紅黃藍白黑五色國旗適同盟會首領孫文自香港歸國各省民軍代表相與選舉孫文爲臨時大總統而以鄂都督黎元洪副之改用陽曆以是年陰曆十一月十三日爲中

華民國元年元旦先是民軍之起於武漢也清廷聞之命廢昌率軍南下戰不利廢昌還京師清廷以馮國璋代之攻民軍漢口漢陽相繼下詔封國璋爲男爵至是袁世凱召國璋回京充禁衛軍總統官遺唐紹儀赴南京與民國議和會軍諭使良弼被民黨彭家珍炸斷左股家珍自斃良弼死而復蘇謂其母曰殺我者好英雄也眞知我者也又語其友曰我死不足惜惟清廷宗社從此滅亡爲可慟耳曩者我奏請釋黨人開國會皆不我聽今已無及矣今年秋變我請以禁軍赴前敵又不我用而委之廢昌果無功內廷紛爭外患四起我宗社之亡必無日矣我見政府不可爲乃組織宗社黨甫就緒而我又受此慘毒我死清廷必亦隨之而亡也我死不獲瞑目矣語畢而逝時袁世凱亦遇炸彈幸而未傷炸斃衛隊官長三人刺客張先培等皆就獲伏誅於是北軍諸將領段祺瑞等四十六人遂皆贊成共和合電請清廷遜位袁世凱與民國議和代表伍廷芳等議定優待清皇室八條一清帝但卸政權不廢尊號民國以待各外國君主之禮相待二清皇室經費歲需銀四百萬兩由民國照撥三清帝暫居宮禁日後移居頤和園四清宗廟陵寢由民國設兵保衛五清德宗陵制如舊妥修經費由民國支出六清宮內各項執事人員仍照常留用惟不得再招閹人七清皇室私產由民國特別保護八清原有之禁衛軍由民國陸軍部編制額數俸餉悉如舊又議定待遇清皇族四條待遇滿蒙回藏各族七條都十九條清帝溥儀遂於民國

元年二月十二日奉隆裕皇太后命下詔退位時爲宣統三年十二月二十五日也於是民國南北乃統一改舉袁世凱爲臨時大總統而副總統黎元洪如故清室以亡清自世祖入關君臨中國都十主凡二百六十有八年至是乃亡或曰清之興也以攝政睿親王多爾袞清之亡也以攝政醇親王載灃以攝政始以攝政終先後一轍豈非天哉嗚呼清廷雖退位然至今尙擁尊號居帝宮受民國之優禮其歲費由民國供給之其資產由民國保護之自古亡國孰有如清之優者我不知覺羅氏有何積德累仁而獲此厚報也

江戸市
123
写
分